

新大陸遊記節錄

新會梁啓超任公著

中華書局印行

標商冊註



飲冰室專集

新大陸遊記節錄

徐序

余遊美數年。以余所見。舉美國一學校也。舉美國一兵隊也。舉美國一商店也。舉美國一工廠也。舉美國一家族也。舉美國一花園也。以語任父。任父曰。良信。吾因而返觀比較於我祖國。覺我同胞。匪惟不能自治其國而已。乃實不能自治其鄉。自治其家。自治其身。乃至所行者。不能謂之路。所居者。不能謂之室。所以者。不能謂之榻。此豈恥惡衣惡食。亦以覘文明程度之標準也。吾又覺吾同胞。乃至言者。不能謂之能言。立者。不能謂之能立。步者。不能謂之能步。此寧細故耶。國民之性。凡知一國強弱所由基也。細故如此。大者可知矣。余非崇拜西人者。余倔強之僻性。凡知我者。靡不知之。雖然。余以我民族與彼民族比較。余惟有忱息。余惟有流涕。余不忍道。余又不忍不道。任父之在美也。余與之同游者。月餘。任父將爲游記。余尼焉。既乃見其稿。則皆余之所欲言。而不能言者也。且彼以十月間所觀察所調查。乃多爲吾三年間所未能見及。人之度量相越。不亦遠耶。以是公諸世。其影響於民族前途者。必非淺尠。豈徒小道可觀云爾。任父索序。乃弁數言。光緒二十九年十二月。同學三水徐勤。

自序

余遊新大陸。日拉雜有所記。將詮次爲一小冊。君勉至紐約。尼余曰。子毋爾。凡遊野蠻地爲游記。易。遊文明地爲遊記。難。子以爾許之。短日月。遊爾許之大國土。每市未嘗得終一句淹。所見幾何。徒以遼豕爲通人。余笑。耳頷其言。欲中止者屢。願性好弄翰。有所感觸。不能不筆之。積數月。碎紙片片盈尺矣。自一覆視。雖管蠶之見。可笑實甚。然容亦有爲內地同胞所未及知者。宋人之獻其曝。曝寧足貴。惟獻焉者之愚誠。欲已不自己也。因積兩旬之力。詮次叢稿。既成。乞序於君。勉而布之。志余懷諫之咎。且以自贖。癸卯除夕著者識。

新大陸遊記節錄

凡例

一 茲編本遊歷時隨筆所記。但叢稿盈尺。散漫無紀。令讀者有恐臥之想。故返日本後。以兩旬之力重理之。如今本一段中所記。或非在一時也。

一 中國前此遊記。多紀風景之佳奇。或陳宮室之華麗。無關宏旨。徒災棗梨。本編原稿中亦所不免。今悉刪去。無取耗人目力。惟歷史上有關係之地特詳焉。

一 茲編所記美國政治上歷史上社會上種種事實。時或加以論斷。但觀察文明複雜之社會。最難得其要領。況譴陋如余。又以此短日月。歷彼廣幅員。耶。其不足當通人之一噓。明矣。但以其所知者。貢於祖國。亦國民義務之一端也。於吾幼稚之社會。或亦不無小補。大雅君子。尚希亮之。

一 此次於美國政治。所欲論述尚多。本擬附錄一「美國政治評」。但稿太叢亂。重整理之。費日更多。出版更遲。故惟於歸途篇略附一二。今後得閒。再廢續之。

一 此次所至。承我海外同胞異常之歡待。實不克當。本宜詳述以誌感謝。但限於篇幅。詳敘或失。諸冗漫。使讀者生厭。故此類之筆記。悉從刪去。諸君諒焉。

甲辰正月 著者識

新大陸遊記節錄

目次

徐序

自序

凡例

由橫濱至加拿大

(一) 首途 舟中

(二) 至加拿大 全加拿大華人數

(三) 溫高華之繁盛 華人之生計 工業 商業 華日之小商比較

(四) 加拿大之限制華工 與各地禁例比較 白人待華人之兩法 加拿大華工廢至之理由

誰之過歟

(五) 中國維新會之起點 選舉法之試行 總會所樹礎之典

(六) 美國總統盧斯福之太平洋演說(其一) 二十世紀太平洋之勢力圈 歐洲列國之猜

忌 盧斯福之太平洋演說(其二) 文明中心點之遷移 地中海時代 北海時代 大西洋

時代 太平洋時代 十九世紀初之太平洋 美國太平洋勢力漸進之略史 咄咄逼人 太

平洋之主人翁 我國民其猛省 美國之公言 中國辜負太平洋

(七) 現世界之第二鐵路 加拿大首都阿圖和 加拿大何故不合併於美國乎 其理由一二三四五六 加拿大與中美南美諸國之得失 世界第一之國會議堂 滿地可之一瞥

由加拿大至紐約

(八) 紐約之歡迎 全世界現在之第二都會將來之第一都會 生計上都市之結集 全世界商業之中心點

(九) 紐約所產怪物托辣斯 托辣斯之意義 托辣斯之沿革 全世界總資本之小半數在數人之掌握中 一八九九年以後之托辣斯資本表 四十三萬有奇之資本 托辣斯之利十二條 托辣斯之弊十條 美國現今之最大問題 美國對於托辣斯輿論之變遷 關於托辣斯問題之書籍及雜件 國際托辣斯及其關係於中國

(十) 美國亞細亞協會 美英工業進步之比較 英國工業之牛耳已被奪於美 競爭舞臺東漸之由

(十一) 美國將來最危險之大問題 近兩年海外移民國別表 近二十五年移民比較表 意奧俄最盛 北歐日少南歐日多 條頓民族衰退之消息 羅馬之覆轍可憂 同化力不足恃 道德上之影響 政治上之影響 一三三四五六七 歐洲移民與中國移民之利害比較 選舉權之重要 中國人失權利之由 共和政體一大缺點

(十二) 猶太人之大勢力 猶太人左右紐約市政 猶太人之團結力 猶太之名士 中國何敢望猶太 猶太人之惡德

(十三) 旅行之感情 住地底住地面住地頂 鴿籠蛛網百足之蟲 公園 公園與衛生及道德之關係 路易第十四宮中物 格蘭脫之墓 自由島 數千萬枝之電燈

(十四) 黑闇之紐約 貧民窟之情狀 財產分配之太懸絕 慈善事業及其效果 以人為機器且為機器之奴隸 智者愈智愚者愈愚 大勢滔滔返於專制 女權不過表面上佳話

(十五) 社會黨員之來謁 社會主義與中國 社會主義者一種之迷信也 社會主義之實力 訪「商界之拿破侖」摩爾根氏 摩爾根之贈言 摩爾根略傳 三大托辣斯之成功 全世界之原動力 並世兩人傑

(十六) 紐約華人及其生計 李鴻章雜碎 西人嗜用華醫 中國商業之慚色
由紐約至哈佛波士頓

(十七) 謁容純甫先生 中國初次出洋學生留學地 前學生留美者之情狀 耶路大學中國學生之名譽 白種人哈然變色 耶路大學擬設分校於中國 教育權可假人否

(十八) 波士頓之維新會 共和政治之發光點 自由祖國之祖百有一人 新世界石 勃黎福創行共和政之略史 波士頓與美國合衆自立之關係一二三四五六七八九十 拋棄英茶之港口 詩 英美兵第一交綏之地 詩 華盛頓點兵處 華盛頓奪英堡寨處 獨立前之

禮拜堂

(十九) 世界最古之市立圖書館 世界最古之報館 古報館之價值 嗜報國民 每日出報
數次至十數次 博物院所藏中國宮內器物 聖哈佛大學 世界最美麗之汽船

由紐約至華盛頓

(二十) 最閑雅之大公園 「喀別德兒」之莊嚴 世界第一美麗之圖書館 祖國文字 大
統領官邸之質素 華盛頓紀功華表 國文銘石之辱國 華盛頓留學生

(二十一) 訪外務大臣海氏 訪大統領盧斯福 盧斯福略傳 極端之進取主義 門羅主義
性質之大變化 門羅主義之起源 門羅主義之內容兩方針 其變遷之歷史 亞美利加者
美國人之亞美利加世界者美國人之世界 盧斯福之演說門羅主義 門羅主義所向無敵
其意何居

(二十二) 大統領之權力及職掌 大統領平時權力小戰時權力大 大統領與立法部之關係
三權鼎立之實行 歷任大統領何故多庸材乎 其理由 一第一流人不入政界 二大統
領可以用庸才 三異才爲國民所忌 四異才不利於候補 五省界之競爭 與其得良大統
領毋寧得良候補者 六高才之士多有不願爲大統領者 大統領者黨派之傀儡也 共和政
體之流弊 今後之變遷

(二十三) 美國最奇一城曰無首都 華盛頓不足以當首都 紐約費城波士頓芝加哥聖路易

皆非首都 各省亦無首府 其理由 中國亦無首都 華盛頓市民無選舉權 選舉區之疆界 第一流人物何故不投身政界乎 其理由一二三四五六七

(二十四) 華盛頓雜記

由紐約至費城

(二十五) 獨立時代國會所在地 訪獨立廳 會議憲法之堂 自由鐘 自由鐘出遊 維廉濱遺像 宣讀獨立檄文處 華盛頓慰恤傷兵處 維廉濱遺物

(二十六) 觀海軍造船所 美國海軍與現任大統領盧氏之關係 海軍嚆矢 與海軍僅七年

西班牙戰役時美國之海軍力 美國最近海軍力 盧斯福之海軍演說一二 列國海軍比較 美國人猜忌兵備之舊謬見

由紐約至波地摩必珠卜

(二十七) 波地摩 必珠卜 烟市 鋼鐵大王卡匿奇 善散財之豪傑 助自助者 普天下

圖書館之大檀越 獨立紀念日 詩

(二十八) 太平洋海電通信祝典 太平洋海電之二線 十二分鐘繞地球一周 九分鐘繞地球一周 二萬四千六百六十英里之電線 美國與太平洋海電之關係 太平洋海電與中國

之關係 工價最昂

由必珠卜至先絲拿打紐柯連

(二十九) 先絲拿打 詩 奴隸省 寡頭政體 黑人蕃殖問題 黑人之自由虛名耳 最可笑者一事 待黑人之私刑 所謂文明者吾知之矣 西班牙風

由紐柯連至聖路易

(三十) 世界博覽會 工人之辱國

由聖路易至芝加高

(三十一) 文明西漸之潮流 東西諸市人口進步比較表 芝加高大學 體操場 圖書館

美國無國立大學

(三十二) 西醫雪地 宗教界之拿破侖 廢醫藥 市制 杜威之歡迎 生理與心理之關係

野心向於中國 杜威與摩爾根 耶教之大乘法

(三十三) 芝加高雜記 詩

由芝加高至汶天拿省

(三十四) 大北鐵道 偉人占士比兒 大北鐵道之三大利益 全世界農業制度最完美之區

落機山中浴溫泉 詩 全世界第一大公園 待華人最酷之市 維新會之聯銜部

由汶天拿省至舍路砵侖

(三十五) 紅印度土人 滅種之歷史 雜記

(三十六) 大北輪船公司 現世界空前之第一大船 商戰舞臺之中心及歐亞距離航利之比

較 船舶容積之增大與商戰進步之影響 太平洋與蘇彝士河之決鬥

(三十七) 砵命之盛會 美國之巴拿馬政策 有鐵血無公法 英之蘇彝士與美之巴拿馬

哀哉巴拿馬 國恥之一事 詩

由砵命至舊金山

(三十八) 華人性質試驗場 華人所長 華人所短 人數略計 職業類別 洗衣業 漁業

廚工業 農業 採礦業 製靴捲烟織帶業 奪我執業之自由 通事 中國雜貨店 日

本雜貨店 裁縫業 飲食店 醫生 傳教 學生 婦女兒童 無業 賭業 賭亦爭外利

之一道

(三十九) (甲)公立之團體 會館之組織 各會館之主席 三邑四邑 國語統一之必要

(乙)公共慈善之團體 (丙)商家團體 (丁)各縣之慈善團體 宗教上之習慣 (戊)族制

之團體 其勢力 聯族團體 歷史上民族思想之發展 (己)祕密之團體 其歷史 其內

容 (庚)文明之團體 保皇會之總部及支會 學生會 青年尙武會 教會 同源總局

八種九十六團體 報館之發達

(四十) 中國人之缺點 有族民資格而無市民資格 有村落思想而無國家思想 只能受專

制不能享自由 自由之試驗 經過之歷史 其議事法 其選舉法 金山以外之人又如何

多數政體之不適 無高尚之目的 精神的文明之根本 華人性質雜論 休息者人生一

要件 勤而不敏 人種強弱之比較 遷華埠之議 一睡五百元 中國人不會行路不會講話

(四十一) 美國留學生 余關於留學之意見 斯丹佛大學 卜技利大學戲園

由舊金山至羅省技利

(四十二) 羅省之歡迎 美人以菲律賓兵攻菲律賓

歸途

(四十三) 歸途 美國政治略評(其一) 村落思想 由舊金山至紐約經過十一國 兩重之

政府兩重之愛國心 各省政府之發生遠在聯邦政府以前 組織美國之兩原素 自由非由

革命而得 歷史上共和政體之天然發達 小共和國中復有小共和國

(四十四) 美國政治略評(其二) 聯合第一著 聯合第二著 中央公會之無力 美人之僻

見 當時幾陷於無政府 聯合第三著 制定憲法之困難 憲法實行之困難 各省之猜忌

數偉人強制而成

(四十五) 美國政治略評(其三) 政治進步之四大時期 兩大政黨之起原 哈彌兒頓與遮

化臣 一自由之木鐸一秩序之保障 遮黨之全勝 政黨一衰 第二次政黨 中央集權黨

勢力復振 國權省權問題之消滅 哈彌兒頓之精神復活

(四十六) 美國政治略評(其四) 政治家貪黷之原因 政治家多中下才 以官俸爲餌 統

領一易官舍爲空 白宮爲請謁者所踴躍 諂上與諂下 政黨之兵卒政界之虱也 非民主之弊 亦民主之弊 共和政治之最大缺點 市政之腐敗 選舉之頻數 選舉之次數四五倍於歐洲 政治史卽黨派史之合本

(四十七) 美國風俗雜評 婦女之地位 其外文 其內容 職業及法律上之權利 婦人選舉權 婦人加入政界之非宜 勞力者之地位 優待勞力者如他國之優待軍人

(四十八) 歸舟雜記 加拿大維新會議會之成立 電報九十六通

附錄一 記華工禁約

(一) 其歷史

(二) 禁例

(三) 旅美華人人數統計

(四) 美人排斥華人之論據

(五) 華人對於禁約之運動

附錄二 夏威夷遊記(一名半九十錄)

附錄三 遊臺灣書牘

飲冰室專集

新大陸遊記節錄

由橫濱至加拿大

(一)

余蓄志遊美者既四年。己亥冬。舊金山之中國維新會初成。諸同志以電見招。即從日本首塗。前所作二十世紀太平洋歌。所謂『逝將適彼世界共和政體之祖國』者是也。道出夏威夷島。即檀香山夏人繫維之。約留一月。行既而防疫事起。全市華僑廬宅付一炬。環島不通行。旅者數閱月。於是余自庚子正月。至五月。蟄居夏威夷。六月十七。嚴裝往美。忽得上海電。促之歸。遂以二十日回馬首。而西道。日本返上海。遽聞漢口之變。志不遂。遂折而南。由香港而星加坡。而檳榔嶼。而印度。繞澳大利亞洲一週。辛丑四月。經菲律賓。復至日本。居日本者又幾兩年。至是始續舊游。實癸卯正月廿三日也。

廿六日爲余三十一初度。余頻年奔走海內外。未嘗有所終。三年淹。其尤奇者。則年年今日。必更其地。十年來無一重複。自癸巳在家鄉一度生日。諸母猶嗅以餚餽棗栗之類。爾後甲午。此日在黃海舟中。乙未。此日在京師。丙申。此日在上海。丁酉。此日在武昌。戊戌。此日在洞庭湖舟中。己亥。此日在日本東京。庚子。此日在夏威夷島。辛丑。

此日在澳洲雪梨市。壬寅此日在日本東海道瀛車中。今年癸卯今日在太平洋。嘻。此亦一詩料也。成詩一章。十年十處度初度。頗感勞生未有涯。日月苦隨公碌碌。人天容得某栖栖。莊嚴地獄來何暮。芻狗年華住且佳。一事未成已中歲。海雲凝望轉低迷。

(11)

二月初六凌晨。舟入加拿大屬溫哥華島之海口。兩岸青山。如送如迎。左英屬。右美屬。山皆秀麗。灌木如莽。舟行於朝曦融曳之間。頗極快遊。

午後一點鐘。舟抵域多利。維新會同志李君福基等迎於碼頭者數十人。停舟十五分鐘。即啓行。溫哥華及二埠之同志葉君恩。劉君章。軒李君佑。樞等。亦至域多利相迎。夕間抵溫哥華。同人迎於碼頭者復百餘。

英屬加拿大凡分七省。其沿太平洋海岸者爲布列地士哥倫比亞省。British Columbia 計加拿大全屬華人約二萬。而哥倫比亞省居十之六七焉。哥倫比亞省之首府曰域多利。Victoria 其附近大都會曰溫哥華。Vancouver (華人俗稱咸水埠) 曰紐威士綿士打 New Westminster (華人俗稱二埠) 一切華商華工皆麇集於此。計全加拿大華人人數大略如下。

域多利

五千餘

溫哥華

四千餘

紐威士綿士打

一千

天寅米

一千

奶麼

五百

卡拉布

一千

噶黎

一千

滿地羅

二千餘

阿圖和

二百餘

其餘散在各市者

約三千餘

十餘年前 C.P.R. 公司築大鐵路之時，華人來者最衆，計全盛時代殆不下七八萬人。鐵路成後，需工漸少，今僅有此數。

(11)

溫哥華市距今十五年前，一林莽耳。自太平洋鐵路公司（西名爲 Canadian Pacific Railway Co. 省名爲 C.P.R. 公司）開大鐵路橫截大陸，以通紐約，繫歐洲交通東方之孔道。又開中國皇后日本皇后印度皇后三船來往於日本及中國，其鐵路之車站，輪船之碼頭，皆以溫哥華爲終點。故溫哥華驟盛，哥倫比亞省本以域多利爲首府，今則勢力全趨於溫哥華矣。地價驟漲至百數十倍。吾華人十五年前來此者，既實繁有徒，從無一人肯買地以牟大利者。雖或西友勸之，亦莫或應。此亦學識不足，不能與西人競爭之明證也。

華人之在加拿大者。生計殊窘。蹙遠不逮在美國。其工人之不得職業者十而五六。困苦不可言狀。商人恃工人爲生。工業衰。故商業亦衰。蓋商於此間者。皆非有大資本營大事業。不過專辦本國日用飲食之物。售諸工人以取利耳。故工人來者少。則商店自少。工人困苦。則商利益微。吾所至夏威夷澳洲各地。皆同一現象。而加拿大爲尤甚。

哥倫比亞省之工人。以做沙文魚爲最多。計每年魚來時。業此者每月可得美金三十元至六七十元不等。然每年惟四月至七月爲魚來時節耳。自餘數月。凡業魚者皆無所得業。束手坐食。故歲入恆不足以自贍也。

日本人在此者。亦以魚爲業。然日人則採漁也。華人則製魚也。採魚每日每人工價優於製魚者數倍。然此地西人限華人非已入英籍者不得採魚。故雖以此區區之利權。亦不得與他族競。

製魚業外。惟有廚工洗衣工爲大宗。廚工最上者每月可得美金七八十元。最下者十餘元。洗衣工工價甚微。大約每月美金十餘元。滿地羅洗衣工最多。以其地爲加拿大之最大都會也。其餘尙有採礦工伐木工等。然不多。合觀哥倫比亞省之商業。華商華商專指域多利埠凡商店百四十餘家。溫哥華五十餘家。紐威士綿士打二三十家。其數不可謂不盛。然與西人貿易者。不過一、二家耳。其餘皆恃華工以爲養者也。中國雜貨店居十之七八。而域多利埠則以製販鴉片爲一大宗。蓋鴉片入口稅輕。易於牟利也。但所牟者亦皆華人之利而已。大半銷入美國。近則美國查稅極嚴。故所銷歲減。其餘則洋服裁縫店有十餘家。稍爭西人利益於一二而已。

商於此者以賭博爲一專門業。幾於無家不賭。以區區之溫哥華埠。而番攤館有二十餘家。白鴿票廠有十六七家。他埠亦稱是。吾常稽其每月銷費之數。每一番攤館受工者約五、六人。每人每禮拜薪工美金六元內外。每館

地一間租錢每月約美金四十元。通計溫哥華攤館每月之支費約在美金六千元內外。爲中國通用銀者萬二千元矣。每年當銷費十五萬元矣。白鴿票及其他雜賭之銷費亦稱是。是每年溫哥華一埠之資本蝕於賭者將三十萬。合計哥倫比亞全省歲蝕至百萬矣。所生之利不足以償所分。華人生計之日蹙也固宜。

日本人亦最嗜賭。聞其每年輸與華人者約在美金十六萬元云。溫哥華一埠此亦爭外利之一道歟。嘻。

日本人之不能商務。尤甚於中國。計日人在此者殆四千人。而無一稍完之商店。吾昔曾至木曜島。在澳洲之東北隅見

其地有日本人二千而極貧。有中國人不滿一百而頗富。詰其由。則此數十中國人即恃彼二千餘日本人之貿易以致富者也。而二千日本人中竟不能立一商店。因疑華人商務之天才過於日人遠甚。今觀此地益信。

雖然。華人商務之天才。只能牟本國人之利。只能牟東方人之利。然與歐美人相遇輒挫敗。則有此天才而不知擴充故也。

(四)

哥倫比亞省亦有限制華工之例。前此每一人登岸。須約稅金一百元。(美金)近則增至五百元。合中國通用銀千餘元矣。此案自五年以前。已提出於本省議院。久未通過。今年則提出於加拿大之總議院。以四月初一日通過。千九百〇四年正月一日實行。自此以往。吾華工來此地之路又絕矣。一歎。

白人之殖民地。除南亞美利加及南洋海峽羣島以外。幾無一不限制華工。其限制之例種種。以余所知者。則

美國及其屬地。皆與中國申明禁約。嚴定法律。一切勞働者。皆不許至。禁約禁例詳下編

澳洲之烏修威省徵稅金一百磅。華銀千元

澳洲之域多利省坤錫蘭省限每船容積五百噸則每次許搭華工一名每五百噸遞進一名不許逾額多載。澳洲之西澳南澳兩省限能解英語五十句以上者乃可登陸。

此一千九百年以前之例也。其時澳洲諸省各自分治華人在甲省上陸者不許闖入乙省自千九百年一月澳洲聯邦成六省合而爲一其已登陸者各省許通來往然此後限制之例益苛今則雖納稅金亦不許至。雖噸位亦不許容其苛禁殆更甚於美國矣。

紐西蘭島徵稅金三十磅。華銀三百元

加拿大徵稅金一百元。華銀二百元今增至五百元。華銀一千元

夏威夷古巴菲律賓賓昔皆許華工自由。隸逮美後一從美例古巴近已獨立若當其政府新易時解此禁自非難。惜我國政府恬不以爲意。今無及矣。

白人之待華人。惟有兩法。(其一)則既居其地者一切應守之法律與彼民平等。惟限制我不許來。(其二)則來去任我自由。惟居其地者設特別法律以相待。其第一法。用之於白種人多他種人少之地。如美洲澳洲是也。其第二法。用之於白種人少他種人多之地。如南洋羣島安南暹羅諸地是也。要之不許與彼平等而已。

吾昔在澳洲聞吾華工每一人至其地者。率須費七八百金。其船位之價。不過百金耳。何以餘費之鉅。至於如是。蓋因坤士蘭域多利兩省限噸位。每船率僅能載四五人。而欲往者之數。殆十倍之而未已。故必須報名候補。候補或至五六年不得。故競以多金賂船行之司事。甲以三四百得一位。乙以五六百奪之。丙又以七八百奪之。故

遂至以七八百爲定價也。其事殆與官場之捐儘先班者同矣。尋常兩人以三百金得頭等船位。而我華人乃以七八百金得三等船位。可歎。

華人之往澳洲者。其目的地率在烏修威。雪梨市者烏修威之首府也。以千金之稅不易納也。故由噸位以過域多利或坤士

蘭。然後復由彼兩省間道以潛入烏修威境。兩省皆烏修威之鄰境。謂之偷過界。偷過界被拿獲者。除照徵稅金百磅外。仍

加罰五十磅。無貲可罰則下獄一年。獄滿仍逐出境。

加拿大屬覓工甚難。而華人來此絡繹不絕者何也。蓋由此偷過界以入美境也。去年一歲上陸於域多利溫哥華兩埠者五千餘人。其入美境者殆十而六七。他歲稱是。

此間華商有專以導人偷過界爲業者。每人索賄美金二百餘元。其賄則美境之稅關及駐溫哥華之美領事皆有分潤云。故今日華工之改入美境者。亦須華銀七八百元乃得達。蓋來加拿大之稅金二百元。入境之賄四五百元。其餘船費車費不過百餘元耳。以祖國數萬里膏腴之地。而使我民無所得食。乃至投如許重金以餬口於外。以受他族之牛馬奴隸。誰之過歟。

(五)

華人愛國心頗重。海外中國維新會（西名爲 Chinese Empire Reform Association）實起點。於是自己亥年此會設立以來。至今蒸蒸日上。溫哥華入會者十而六七。域多利則殆過半。紐威士綿士打幾無一人不入會者。會中章程整齊。每來復日必演說。每歲三埠合同大鼓集一次。近集數萬金。建總會所於溫哥華。儼然一小政府。

之雛形也。

今歲會事益有進步。效立憲國選舉法。公舉總會之副總理一人。監督一人。其大總理既有定員。域溫紐三埠各出候補者二名。先期一月佈告其名。屆日以匿名投票之法選舉之。三埠同時開票。互以電報報某名得票之多寡。當選舉期以前。競爭殊劇烈。各候補者到處游說運動。演說其所懷抱之政策。儼然與文明國之政黨無異。此誠中國數千年所未有也。他日有著中國政黨史者。其必託始於是矣。余到後四日。為總選舉之期。定章凡會員皆有選舉權。有權者六千餘人。投票之數。不過千數。蓋風氣初開。未知公權之可貴。各國皆如是也。得票最多者為六百七十一票。被選為副總理。明年屆選舉期。則棄權者之數必少於今年矣。

三月廿六日為維新會總會所興工建築之期。西例凡有公家建築。必請一有聲望之人。先置一石。且獻祝詞。名曰樹礎之典。諸同志以余適至。因固留數日。使行斯禮。當時中西人士。觀者如堵。余置石獻祝詞後。演說一次。鼓掌之聲雷動。此亦中國前此未有之舉也。

(六)

在溫哥華讀西報。見美國總統盧斯福巡行太平洋沿岸。所至演說。雄辯滔滔。其言有深足令吾國人猛省者。今錄其在屈臣威爾市所演者如下。

(前略)吾國民有不可不熟察者一事。即吾國在太平洋上過去及現在所占之優勢及其根原是也。太平洋中之最大者也。而此最大洋。在今世紀中。當為吾美國獨一無二之勢力範圍。雖然。欲就最大之事業者。

不可不負最大之責任。凡國民欲增進其幸福與其名譽，不可不先納其代價。苟不爾者，亦疲茶之國民已耳。嗚呼！我同胞，吾信諸君，吾信吾國民，吾深謝彼蒼之以此絕好機會畀於二十世紀時代之我同胞也。吾爲諸君賀。嗚呼！機會不可逸，吾儕今者以吾祖宗遺傳活潑進取之精神，對於此問題，吾祝吾儕大成功之日，不在遠也。

嗚呼！何其言之自負乎？而大統領之自負，亦卽全國民自負之代表也。此演說之語，飛達歐洲，歐洲各國奔走相告，各報館羣起而睨之，而德國爲尤甚。柏林公報論之曰：『美國之懷抱野心，以欲盜太平洋，匪伊朝夕，至其明目張胆，無忌憚，以言之，自此度始。雖然，我歐洲列國，其與太平洋有切密之關係者，亦不尠。盧斯福之佳夢，殆未易遽踐也。』其餘各報，同時爲此等議論者，亦雜遝相接，笑罵之聲，殆不可聽。據當時美國各報所譯載未幾，盧斯福至舊金山，更爲第二次之太平洋演說，其氣焰益高，茲譯錄如下。

（前略）余之未親觀太平洋也，余已爲國中主張帝國主義者之一人（拍掌）及今親見之，而益信夫欲進吾美於強盛之域，爲我子孫百年之大計，舍帝國主義其末由也。（拍掌）在今世紀中，惟能在太平洋上占優勝權者，爲能於世界歷史上占優勝權。請言其理，人類權力舞臺之中心點，自陸而陸，自海而海，恆變動而無已時，以吾輩所記憶，若上古之小亞細亞文明，埃及文明，其與海運關係者雖絕少，泊夫腓尼西亞人物，興以來，地中海遂爲歷史之中樞。若略西士，若希臘，若羅馬，皆以其軍艦商船，以爭產業上軍事上之牛耳，緊何故乎？蓋國民興盛之要具，舍此末由耳。彼羅馬之霸九州，全在其掌握地中海航權之時代，是其例矣。雖至羅馬滅亡之後，其南方海濱，爲全歐文明之中堅者，猶亘數世紀，地中海之勢力，不亦偉耶？彼俾尼士志挪亞

諸市府之發達。即在彼時也。

雖然。權力日漸推移。北方諸國。稍嶄然顯頭角。商船貿易。日以發達。而北海波羅的海。及比斯加灣。（按）Biscaya灣。今法蘭

與西班牙接沿岸諸市。日見興旺。而冒險勇敢之商人。來往於大西洋之歐岸者如織。此奈渣蘭半島。（按）班

之總名諸市發達之原因也。英荷西班牙諸國。競張幟於海外。一以博名譽。一以謀大洋上利益之優先權耳。其

後遂尋得好望角航路與美洲新大陸。於是大西洋海權。左右世界。其位置與昔時之地中海同。

今也以懸崖轉石之機。其大運乃直趨入於世界最大之洋。而此最後之大規模。非以文明國民之力。無由開

拓之。嗚呼。天將以太平洋昇其第一之驕子。今正其時矣。

今吾與諸君翻觀十九世紀之初。此厯大之太平洋。何物之與有。其與波濤衝激航行稍遠者。惟少數之捕鯨

船耳。宅於其中之島嶼。與環於其旁之岸原。曾未能一脫秦古原人之情狀。其在洋之東。猶有舊式之帆船。稍

游弋於中國日本印度間。若吾美大陸之西鄙。則依然為紅夷之巢穴。眺其海岸。惟時見刳木之舟。（按）吾中

刳木為舟。今地球上此種舟三點兩點。與波上下而已。此豈遠而不過一世紀以前事耳。何圖僅及百年。當本

世紀之初。其狀態之變遷。遽乃若此。其地位之重要。殆有非吾輩擬議所能及者。位於其南之澳洲聯邦。既已

突兀湧現。日本亦非復昔日之日本。駭駭乎欲與列強爭中原鹿。而彼中國者。老朽垂死。歐洲列強。共盡勢力

於東亞大陸。而吾合衆國亦以同時擴其版圖。若加鱒寬尼。若阿利根。若華盛頓。（按）三省名也。舊金山即加

阿利根省最大之市。舍路即華盛頓省最大之市。三昔也。石田。今也。天府矣。至如阿拉悉加也。（按）太平洋北

日耳。夏威夷也。（按）即菲律賓也。皆次第內隸。為我郡縣。海岸線之擴張。馴使吾美一躍而立於太平洋一等

國之位置。若吾國民能以精心果力。利用此地理上之優勝乎。吾信其將來以平和之手段。制此莫大之霸權。決非難矣。（拍掌）今者洋底之海電。既已告成。洋面之大航船。亦已著手。世之論者。至有謂此船爲當今船中之王者矣。（按）詳見別節地峽運河之開鑿。其必歸於我手。殆又可斷言也。（拍掌）（按）彼時巴拿馬尚未自立而彼運河者。實使我大西太平洋兩洋之沿岸地。忽相聯屬。其所裨於我商業上海陸軍上者。至重且大也。且我國民非好戰也。而迫於不得已。使我無端而出於征討菲律賓之舉。不謂之天助焉不得也。我國民乎。我輩苟不願爲劣者弱者。不願以墮落之歷史。貽我子孫。則猛進猛進。以實行我所懷抱之壯圖。今其時哉。（拍掌）

凡欲以大國民自負者。必當思將由何道。使吾國在世界上得占偉大之地位。且持續之。故不進則必退。國家存亡。皆在此點。吾國民萬不可以不占此地位。勢使然也。而加罅寬尼省諸君之責任。尤加一層。何也。吾國之國力。將皆由此金門。（按）舊金山海口之名而進也。（拍掌）

嗚呼。我同胞諸君。吾今深慶吾國之得此好機會。吾又深信吾國民之智識勇氣毅力。視此機會。猶高一級焉。此吾所爲歡喜無量者也。（拍掌）吾國民其毋曰。吾從事於此大業與否。吾將擇焉。何也。人各有天職。天職者。天所命也。吾能辭乎。（拍掌）若猶欲超然於世界活劇之外。而袖手旁觀焉。非惟不可。抑亦不能矣。今後之美國。將大成功乎。將大失敗乎。其機皆決於今日。故夫小國之國民。在世界之舞臺。執小役。斯可也。何也。物理則然也。苟以大國民而執小役者。吾以爲不如死之爲愈矣。（拍掌）（下略）

吾在報中。見盧斯福此演說文之後。吾怵怵焉累日。三復之不能去焉。夫其曰。執世界舞臺之大役。曰實行我懷抱之壯圖。其大役壯圖之目的地。何在乎。願我國民思之。

此雖盧斯福一人之言。實美國之公言也。自德國報紙之冷嘲熱罵。頻數相加也。美國報紙與之舌戰者。全國囂然焉。

世界大勢日集中於太平洋。此稍知時局者所能道也。世界大勢何以日集中於太平洋。曰以世界大勢日集中於中國故。此又稍知時局者所能道也。若是乎其地位可以利用此太平洋以左右世界者。宜莫如中國。中國不能自爲太平洋之主人翁。而拱手以讓他人。吾又安忍言太平洋哉。雖然。吾之所不忍言者。又寧止一太平洋哉。

(七)

四月三日。由溫哥華首途。乘汽車往紐約。即 C. P. R. 公司之鐵路也。此鐵路橫貫美大陸。長三千餘英里。實中國萬里矣。當俄國西伯利亞鐵路未成以前。此路實世界第一之長線。美國鐵路雖貫大陸者數線。然非全成於一公司之手。當初議建築時。資本家多目笑之。募股份。應者寥寥。謂其工程之斷難就也。今則利數十倍矣。加拿大聯邦之鞏固。實自此鐵路始。鐵路與國政羣治之關係。偉矣夫。

行經落機大山而東。層峯積雪者千餘里。汽車所經行最高點。距海平殆三千尺。以機器車三座推挽始得上。沿山螺旋。蜿蜒而進。一目見三鐵路。若作平行線形。亦一壯觀也。車中有感。口占一絕。

四月猶爲踏雪遊。光明世界入雙眸。山靈知爲誰辛苦。如此華年也白頭。

行五日抵阿圖和。阿圖和爲加拿大首都。總政府在焉。加拿大之政體。與澳洲略同。名雖英屬。實則一獨立國也。七省各自有政府。各自有議院。復合爲一聯邦。有聯邦之總政府。有聯邦之總議院。其性質亦皆大類美國。

加拿大與美國萬里接壤。僅地圖上以一直線爲界。其歷史上發達相類。其現行政體相類。顧何以百餘年來。不合併於美。此實一疑問也。考其歷史。當獨立戰爭時。美軍侵入加拿大者亦數次。然其時美國以十三省起義。祇求完十三省之自由獨立而已。他猶非力所能及也。而加拿大東部之殖民。其時西部全未開闢。加拿大美國皆然。法國人最占勢力。至今猶然。美國之倡獨立者。皆前此清教徒之子孫。其信仰。其習慣。皆與加拿大東部之民不相容。故彼時不能合併。此其理由一。千八百十二年。英美海戰開。彼時美人併吞加拿大之志始萌芽。然戰端不久即熄。且美國國力未充。猶未以外競進取爲國是。至千八百二十三年。門羅爲總統時。宣告亞美利加與歐羅巴之關係。卽今日美國人所奉爲金科玉律之「門羅主義」是也。其宣言中有云。『歐羅巴諸國現在之屬國及殖民地。在美洲者。美國決不干涉之。且將來亦不干涉之。』云云。此門羅主義。在今日固一變爲進取的。而在十年以前。則一向皆爲保守的也。以此之故。苟加拿大非有自謀叛英之舉。則美國勢不得強迫之。此其理由二。英政府自美國獨立以後。其對殖民地之政策一變。舍干涉主義而取放任主義。加拿大無論屬英。無論合美。其所得政治上自由之權利等耳。而何必爲此一舉。此其理由三。迨南北戰爭以後。全美國人狂熱於戰事。倡併吞加拿大之論者。一時沸騰。然老練之政治家。見夫經營南部諸省。已經爾許窘難。深察夫國羣之離合。由歷史上自然發達。不能強求。故持重之論勝。而併吞之論卒不敵。此其理由四。自茲以往。而英美兩國之感情。日加親密。同種同文相友相助之義。深入於兩國民之腦中。苟從事併吞。勢不得不訴於兵力。而兩國民皆有所不欲。此其理由五。自 C.P.R. 公司橫貫大陸之鐵路既成。加拿大聯邦之力。日以鞏固。且大西洋海運日盛一日。故其與母國之關係。亦日親。一日。至於今日。美國雖銳意實行帝國主義。而加拿大之勢力。亦已不可侮。此其理由六。吾研究此問題。欲以茲

六者解釋之。其猶有未盡歟。則非吾遊客皮相之所能道也。

位於美國之北者爲加拿大。位於其南者爲中美南美諸國。以名義論。則加拿大者。君主國之一附庸也。中南美諸國者。則獨立之共和國也。以實際論。則加拿大。人所獲之自由。所享之幸福。以視中南美諸國。何如。使加拿大非以宏毅慎重之條頓人種爲其中心點。而一任彼輕僥浮傲無經驗之拉丁人種主持之。加拿大東部拉丁人種居其半。種頓及他人種居其半。妄爲無謀之革命獨立。則其現象。或竟與今之祕魯巴西同。未可知也。天下事有與名實不相屬者。此類是矣。

阿圖和國會議堂。其結構之美麗。在世界諸國會中。號稱第一。余至此得保守黨領袖褒爾君之介紹。徧遊之。誠壯觀也。全廈以紅白大理石相間構造。居中一最大座。爲上下議院。左右兩座。其大稍遜。爲行政各部官公署。亦可見英人之視立法重於行政也。堂中於上下議院之外。復有實業會議所。藏書樓。書記房。議員治事室。議員休憩室等。俱極壯麗。堂中一高塔。凡拾五百餘級。始達絕頂。全市皆歷歷在目矣。其中最偉觀者爲藏書樓。樓爲一圓形。凡六層。藏書三十一萬冊。在堂下一望。可以盡見之。

初十日。抵滿地可。滿地可者。加拿大最大之都會也。人口約四十餘萬。工商業大盛。視西部各市。過之遠矣。其中法國之移民強半。市內除最旺之一隅外。多有以英語不能通行者。吾未嘗至法國。觀此亦可以見法人社會之一斑焉。

凡在阿圖和二日。在滿地可五日。其地素未有中國維新會。至是始設。人心大好。會所嘈吵成立焉。

由加拿大至紐約

(八)

四月十六日由滿地可抵紐約。以午後九點鐘至。維新會同人迎於車站者數百。華人市皆罷工。觀者如堵。余直至華人戲院演說片刻。表謝意。座中西人亦多。並以英語謝其歡迎。

居紐約凡兩月餘。其間由紐約而適波士頓。而適華盛頓。而適哈佛。而適費爾特費。而皆復返於紐約。實居紐約者不過一月。其間接見邦人。接見報館訪事。演說。赴宴。費時日十之八九。殆無餘晷。以及遊覽調查之事。所觀察草草殊甚。僅以夜間藉字典及舌人之助。一閱報紙。或訪問於其市民。欲以評論此世界第一都會。所謂隔靴搔癢也。姑就所觸。隨記一二。

紐約當美國獨立時。人口不過二萬餘。其時美國中一萬人以迨十九世紀之中葉。驟進至七十餘萬。至今二十世紀之初。更驟進至三百五十餘萬。為全世界中第二之大都會。英國倫敦第一以此增進速率之比例。不及十年。必駕倫敦而上之。此又普天下所同信也。今欲語其龐大其壯麗其繁盛。則目眩於視察。耳疲於聽聞。口吃於演述。手窮於摹寫。吾亦不知從何處說起。

斯賓塞言。野蠻時代。以生產機關為武備機關之供給物。文明時代。以武備機關為生產機關之保障物。十九世紀以來。歐美各國。殆皆日趨重於生產一事。而美國又其尤著者也。考現在各國都市之趨勢。皆由政治上之結集。一變為生計上之結集。故古代希臘之雅典。斯巴達等市。大率為政治上兵事上奠安防禦而設。及中世著名

之意大利市府亦爲政權發達之地。凡市之以政治而結集者。雖極繁盛。而總有所限量。至於以都市爲生產機關之總匯。則其發達之速率。有不可思議者。現世之大市。莫不皆然而紐約則尤爲純粹之生產機關。而無所攙雜者也。

若倫敦。若柏林。若巴黎。若維也納。若羅馬。皆當今第一等都會也。一國中政治之中心點在是。商業之中心點在是。乃至文學美術之中心點。莫不在是。獨紐約不然。惟爲商業之中心點而已。雖然。商業者。位於美國凡百事物之第一位者也。故觀美國之菁英。於紐約焉可也。且紐約不徒爲美國商業之中心點而已。又實爲全世界商業之中心點。然則觀二十世紀全世界生存競爭之活劇。亦於紐約焉可也。

(九)

紐約市於前世紀與今世紀之交。產一怪物焉。曰「托辣斯」。此怪物者。產於紐約。而其勢力及於全美國。且駁乎及於全世界。質而言之。則此怪物者。其勢力遠駕亞歷山大大帝拿破崙第一而上之者也。二十世紀全世界唯一之主權也。吾欲考求其真相也。有年。今至紐約而始得此機。

托辣斯者。原文爲 *Trust*。譯言信也。其用之爲一特別名詞者。自一八八二年。而大盛於最近之五年中。托辣斯者。何以數公司乃至數十公司之股份之全數。或過半數。委託之於所謂「托辣斯梯」(Trustee) (即可信之人之意) 而此「托辣斯梯」或一人或數十人發回一證券於股東。自此以後。此托辣斯梯有全權管理各公司之營業。或分析。或合併。或擴充。悉聽其指揮。而以所得利益分配於股東。托辣斯者。以政治上之現象譬之。則猶自各省

並立而進爲合衆聯邦也。自地方分治而進爲中央集權也。質而言之。則由箇人主義而變爲統一主義。由自由主義而變爲專制主義也。

托辣斯之濫觴。起於一八八二年之煤油托辣斯。卽世所稱煤油大王洛奇佛兒之所手創也。爾後一八八三年。綿油托辣斯成。一八八六年。蒸餅托辣斯成。一八八七年。製糖托辣斯成。其利益昭昭。聳動一世耳目。自茲以往。舉國皆狂熱於托辣斯。及於今日。而美國全國之資本。其在各托辣斯之支配下者。殆十而八。夫美國者。今世界第一之資本國也。美國資本。殆占世界全部資本之半。然則現今世界資本總額之小半數。全歸於此最少數之托辣斯梯諸人之手中也。嘻。豈不異哉。豈不偉哉。

今欲語托辣斯之盛況。特將紐約四季叢報所列最近五年托辣斯之資本表。譯錄如下。

千八百九十九年一月以後設立之托辣斯資本表

(附注) 其資本一千元以下者原文不錄

(托辣斯名)

(設立年)

(資本額)

(美金)

聯合製銅公司 (附注) 以公司代托辣斯名下同

一八九九年

一五五、〇〇〇、〇〇〇圓

美國農業聯合公司

一八九九年

三三、六〇〇、〇〇〇圓

美國蔗糖公司

一八九九年

二〇、〇〇〇、〇〇〇圓

美國自由車公司

一八九九年

三六、四九六、四〇〇圓

美國黃銅公司

一九〇〇年

一〇、〇〇〇、〇〇〇圓

合衆國製罐公司

一九〇一年

八二、四六六、六〇〇圓

合衆國製車公司

一八九九年

六〇、〇〇〇、〇〇〇圓

亞美利加製雪茄烟公司

一九〇一年

一〇、〇〇〇、〇〇〇圓

亞美利加草絲公司

一八九九年

一三、〇八三、〇〇〇圓

亞美利加製革公司

一八九九年

三三、〇二五、〇〇〇圓

美國製冰公司

一八九九年

四一、七〇五、〇〇〇圓

美國製網公司

一八九九年

二〇、〇〇〇、〇〇〇圓

國民製造餅乾公司

一九〇一年

一二、一二七、〇〇〇圓

美國機關車（即火車頭）公司

一九〇一年

五〇、四一二、五〇〇圓

美國機械公司

一九〇二年

一〇、〇〇〇、〇〇〇圓

美國裝潢公司

一九〇二年

二〇、〇〇〇、〇〇〇圓

美國農器公司

一九〇一年

七五、〇〇〇、〇〇〇圓

美國汽車裝飾公司

一八九九年

二二、〇〇〇、〇〇〇圓

美國水喉公司

一九〇〇年

一〇、二九五、七〇〇圓

美國造船公司

一八九九年

一五、五〇〇、〇〇〇圓

美國鑄鎔及精製公司

一八九九年

一〇〇、〇〇〇、〇〇〇圓

美國鼻烟原料公司

一九〇〇年

二三、〇〇一、〇〇〇圓

美國鋼鐵製物公司	一九〇二年	三〇、〇〇〇、〇〇〇圓
美國窗牖玻璃公司	一八九九年	一七、〇〇〇、〇〇〇圓
美國羊毛公司	一八九九年	四九、七九六、一〇〇圓
美國箋紙公司	一八九九年	三九、〇〇〇、〇〇〇圓
美國販賣商聯合公司	一九〇一年	一五、〇〇〇、〇〇〇圓
大西洋樹膠鞋公司	一九〇一年	一〇、〇〇〇、〇〇〇圓
牛奶業聯合公司	一八九九年	二〇、〇〇〇、〇〇〇圓
中央鑄造公司	一八九九年	一八、〇〇〇、〇〇〇圓
芝加高氣學器具公司	一九〇二年	一〇、〇〇〇、〇〇〇圓
植民地木料及箱篋公司	一九〇二年	一五、〇〇〇、〇〇〇圓
室內禦寒禦暑器具公司	一九〇一年	一七、〇〇〇、〇〇〇圓
聯合烟捲公司	一九〇一年	二六二、六八九、〇〇〇圓
五穀屬類生產物公司	一九〇二年	八〇、〇〇〇、〇〇〇圓
美國水鍋鋼鐵公司	一九〇〇年	五〇、〇〇〇、〇〇〇圓
東方鐵器公司	一九〇一年	一九、七七三、一〇〇圓
亞美利加電氣公司	一八九九年	二〇、三六八、四〇〇圓

電車公司

一八九九年

一八、四七五、〇〇〇圓

佛耶門煤炭公司

一九〇一年

一八、〇〇〇、〇〇〇圓

墾闢公司

一八九九年

一六、八二一、五〇〇圓

哈比遜倭加鎔化公司

一九〇二年

二五、七五〇、〇〇〇圓

萬國收穫公司

一九〇二年

一二〇、〇〇〇、〇〇〇圓

萬國製鹽公司

一九〇一年

三三、〇〇〇、〇〇〇圓

萬國製造蒸氣筒公司

一八九九年

三一、一五〇、〇〇〇圓

約翰郎格靈製鋼公司

一九〇二年

三〇、〇〇〇、〇〇〇圓

煤炭及煤氣公司

一八九九年

三九、四七〇、〇〇〇圓

國民製造火柴公司

一九〇〇年

五五、五六三、〇〇〇圓

國民炭氣公司

一八九九年

一〇、〇〇〇、〇〇〇圓

國民化藥及製造模型公司

一八九九年

二三、八三八、四〇〇圓

國民防火公司

一八九九年

一二、五〇〇、〇〇〇圓

國民精鍊白糖公司

一九〇〇年

二〇、〇〇〇、〇〇〇圓

紐英倫紡績公司

一八九九年

一五、五七七、〇〇〇圓

紐約船渠公司

一九〇一年

二八、五八〇、〇〇〇圓

太平洋鐵器公司	一九〇二年	一〇、〇〇〇、〇〇〇圓
濱士溫尼亞省製網公司	一九〇一年	三四、二五〇、〇〇〇圓
必珠卜釀酒公司	一八九九年	二六、〇〇〇、〇〇〇圓
必珠卜煤炭公司	一八九九年	五九、七三一、〇〇〇圓
農家壓搾器公司	一八九九年	一〇、〇〇〇、〇〇〇圓
鋼鐵車公司	一八九九年	三〇、〇〇〇、〇〇〇圓
活版字製造公司	一九〇一年	一一、五〇〇、〇〇〇圓
鐵路用鋼條公司	一九〇二年	二〇、〇〇〇、〇〇〇圓
共和國製鐵公司	一八九九年	四八、二〇四、〇〇〇圓
帝國油漆用器公司	一八九九年	二〇、〇〇〇、〇〇〇圓
樹膠用物製造公司	一八九九年	二六、四一〇、〇一五圓
士洛士佛得製鋼公司	一八九九年	一八、二〇〇、〇〇〇圓
士丹特製造公司	一九〇〇年	一七、二五〇、〇〇〇圓
聯合輪船公司（大西洋）	一九〇二年	一七〇、〇〇〇、〇〇〇圓
聯合製紙及製袋公司	一八九九年	二七、〇〇〇、〇〇〇圓
製筐及製紙公司	一九〇二年	三〇、〇〇〇、〇〇〇圓

製銅公司	一九〇二年	五〇、〇〇〇、〇〇〇圓
全國果品聯合公司	一八九九年	一五、三六九、五〇〇圓
製靴機器聯合公司	一八九九年	二二、六五六、〇〇〇圓
合衆國煤炭鐵管及鑄鎔公司	一八九九年	二五、〇〇〇、〇〇〇圓
合衆國棉紗公司	一九〇一年	一三、一〇〇、〇〇〇圓
合衆國建築公司	一九〇二年	六六、〇〇〇、〇〇〇圓
合衆國精製公司	一九〇一年	一二、八〇八、三〇〇圓
合衆國造船公司	一九〇二年	七一、〇〇〇、〇〇〇圓
合衆國鋼鐵大聯合公司	一九〇二年	一、三八九、三三九、九五六圓
世界烟草公司	一九〇一年	一〇、〇〇〇、〇〇〇圓
華治尼阿煤鐵公司	一八九九年	一八、九七〇、〇〇〇圓
合計		四、三一八、〇〇五、六四六圓

以上所列除鐵路托辣斯及一八九八年以前所立之托辣斯未計外其資本總額已四十三萬萬零一千八百萬有奇以現在中國銀價之比列實當上海香港通用銀九十萬萬元有奇計美國現在通用貨幣之數二十五萬萬有奇而鋼鐵托辣斯以一公司之資本而居其半額其氣象之偉大真不可思議不可思議考托辣斯之所由起原爲防自由競爭生產過度之病實應於今日時勢不得不然也而其流弊亦自不少今刺

取各家言其利害者而平論之。

托辣斯之利。

- (一) 可以利用最新最大最敏之機器而盡其所長。所用資本勢力視前此爲少。而所產物品視前此爲多。
- (二) 資本既合併則需用原料多。需用多則其購之也較廉。原料價廉則製出之物其價亦隨而廉。
- (三) 以工場夥多之故。可以實行分業之學理。使日趨精密。則庸工各盡其長。成物良而速。
- (四) 以資本多之故。能有餘力以利用廢物。造出種種附屬副產物。使無棄材。而正產物之價亦得更廉。
- (五) 以全國本業皆合同故。能節制生產。毋使有羨不足。因以免物價之漲落無定。而資本家無時常倒閉之患。勞力者亦不至被牽涉而失其業。

(六) 能經營附屬事業。擴張外國販路。

(七) 能淘汰冗員。節減薪費。

(八) 凡一切競爭之冗費。如告白費。運動費等。皆可以節省。

(九) 以其工場徧於全國故。可以節省運送費。使本公司與販賣人皆食其利。

(十) 以製品多故。能隨時立應買客之求。使生計界之信用日堅實。

(十一) 以資本雄大故。不假借貸。無畏外界市場之恐慌。即有借貸。其息亦廉。

(十二) 可以交換智識。獎勵技術。爲全社會之利益。

托辣斯之弊。

(一)以全權委諸一二人之專制。苟不得其人。則全局失敗。

(二)以規模太大故。統一之監督之。大非易易。

(三)獨占一業。莫與之競。則生產技術之改良進步將中止。

(四)淘汰多數之工場。採用省力之機器。許多勞傭。因以失業。

(五)以壟斷利益故。有相競爭者。以種種手段摧滅之。使小資本家不能自存。

(六)以獨占之故。強以廉價勒買原料品。使生產家蒙其害。強以高價售出製造品。使消費家蒙其害。

(七)以獨占之故。所製產之物。雖日雜粗窳。以欺市衆。而莫敢誰何。

(八)濫用保護關稅之權利。其製造品售出外國。價或更廉。售於本國者反更貴。

(九)以獨占之故。勞力家舍彼處別無餬口之途。因得任意尅減工價。延長作工時刻。

(十)其資本估價。多報浮數。號稱百萬者。其實不過五十萬或二三十萬。一有失敗。則其托辣斯證券。攪亂市場。

以上所陳。左右袒兩說之大略。在是矣。要之最近十年間。美國全國之最大問題。無過托辣斯。政府之所焦慮。學者之所討論。民間各團體之所譁囂調查。新聞紙之所研究爭辯。舉全國八千萬人之視線。無不集於此一點。故欲知美國之國情。必於托辣斯。欲知世界之大勢。必於托辣斯。

托辣斯之初出也。全國視爲怪物。視爲妖魔。政府務所以摧抑掃除之。殆與現時中國政府之謀摧鋤新黨者無異。故自一八八九年至一八九九年。凡二十八省之政府。發布法律。以禁止托辣斯。華盛頓政府亦隨之。然卒

不可禁。民間之組織托辣斯者，易其名而用其實，而發達且日盛一日。至千九百年以後，舉國輿論，幡然一變，知此物之發生，由於天演理勢，相迫使然，愈遏之則其勢愈盛，而弊亦愈深。於是禁遏之政策，一變為補救之政策，而托辣斯之機體，乃今漸確立矣。

今舉一八九七年以後之出版書籍及雜件，其關於托辣斯問題最詳博確實而有力者，列數種如下。

(甲) 政府調查報告書及托辣斯會議事錄

(一) 美國上下議院聯合調查托辣斯會之報告書 (一八九七年)

(二) 芝加哥及聖路易之托辣斯調查會議事錄 (一八九九年)

(三) 美國調查工業委員會之報告書及美國保工局報告書 (一九〇〇年)

(四) 芝加哥反對托辣斯會議之報告書 (同上)

(五) 美國生計學會總會演說集 (同上)

(乙) 民間之著述

(一) 以托辣斯為適應於現今生計界，實天演使然，無可逃避，而因詳論其起原利益流弊，及謀所以補救之法者。

Jenks, The Trust Problem.

Harpis, Restraint of Trade.

Collier, Trusts.

Halle, Trusts and Industrial Combinations in United States.

(一) 攻擊托辣斯者

Ely, Monopolies and Trusts.

Clark, Trusts.

(二) 頌揚托辣斯謂其功德巍巍爲全社會各階級人之利益者。

Gunton, Trusts and the Public.

要之托辣斯實二十世紀之驕兒。必非以人力所能摧沮。此今世稍有識者所同知也。自今以往。且由國內托辣斯。進爲國際托辣斯。而受害最劇者。必在我中國。然則我輩不能以對岸火災視此問題也。明矣。至其起原其利害其影響及吾國今後對之之策。吾將別著論論之。

(十)

廿六日。赴亞細亞協會之宴。座中美國人二十三。日本人二。中國人並余而六。其美國人類皆紐約市中實業家之有力者也。此會之目的。全在生計上。於政治上毫無關係。然東方稍知名之人至者。必饗宴焉。前公使伍現公使梁。皆嘗到演說。宴梁後半月而余至。席間總幹事赫欽士。先起演說。極言美國無利中國土地之意。惟願保和平興商務。余亦照例述感謝之詞。並言中國若不得良政府。則世界之平和。終不可得。列強狃於現政府一日之安。欲在此亂機滿地之市場。殖其產業。非預備數倍之保險費不可。或又欲利用現政府之昏弱。而因以攫特

別之權利。吾信其將來之或失，必不償現在之所得云云。余約演四十五分之久，此後繼演者尙十數人，率皆照例附和余言。

次日訪赫欽士於其家，赫氏復極言中國之平和擾亂，其影響於美國者甚大，卽如拳匪之變，美國南方業棉花者，已倒閉三之一，失業之勞儲數千云云。余時讀新聞紙，見英國殖民大臣張伯倫所演說，謂英國工業品即物之已

經製造者輸出額，每人平均二十五元六角。（美金）美國工業品輸出額，每人平均價五元一角，足證美國猶未脫

農產時代，其工業實未足與英頡頏云云。余惑其說，因以叩赫氏，赫氏曰：不然，美國人工業發達之實力，實已在英國之上，不過其所產工業品，大半消於本國，僅據出口之額以爲比較，非篤論也。且美國非不能推廣其工業

品於海外，實緣本國人消費力甚大，現在尙無餘裕以輸於外耳。欲實知兩國工業進步之比較，必須合其工產之全額計之。因檢出英人瑪爾荷（按）瑪氏近世統計學最著名之大家也所著民富論一書，舉其統計相示，則當一八六〇年，英國

所產工業品之全額，每人平均九十五元，其年美國所產工業品之全額，每人平均不過五十九元，迨一八九四年，形勢已一變，英國每人平均增至百一十元，美國每人平均增至百四十元，相去僅三十四年間耳，而其位置

之改易如此。赫氏又言瑪氏之統計，爲萬國所共信者也，且出諸英人之口，而其言如此。又言瑪氏書刊於一八九五年，於近數年之統計未及詳，而此數年間美國之進步，更有不可思議者，千九百年，吾美工業品之全額，實

一百三十萬萬零三千九百二十七萬九千五百六十六元。（美金）以現在人口計之，每人平均百七十一元，有奇。其年英國工業品全額，不過五十萬萬內外，每人平均百二十元耳。若夫以出口額計之，而美反劣於英者，

則英國之工業品，以百分之二十五輸出海外，而美國則僅以百分之四輸出耳。此其所以逕庭也。云云。其言確

鑿至可信据。

昔歐洲人口產業發達之故，不得不求尾閭於海外。新大陸之開闢，其原因殆皆在於是。今則新大陸者，已無復隙地可容。歐洲產業之滲入，不寧惟是，且更皇皇然自求其尾閭。此競爭之舞臺，所以日東漸也。

(十一)

余遊美，無一事為美人憂為美人恐者。雖然，有一焉，則歐洲及其他各地之下等民族，日輸入於美國，而為其國民。是也。試將去年及今年之統計列其移民比較表如下。此表據西歷十二月在舊金山所購美國今年統計書

(國名)

(一九〇二年)

(一九〇三年)

(增加數)

奧大利	匈牙利	一七一、九八九	二〇六、〇一一	三四、〇二二
比利時		二、五七七	三、四五〇	八七三
丹麥		五、六六〇	七、一五八	一、四九八
法蘭西		三、一一七	五、五七八	二、四六一
德意志		二八、三〇四	四〇、〇八六	一一、七八二
希臘		八、一〇四	一四、〇九〇	五、九八六
意大利		一七八、三六七	二三〇、六二二	五二、二四七
奈渣蘭		二、二八四	三、九九八	一、七一四

那威	一七、四八四	二四、四六一	六、九七七
葡萄牙	五、三〇七	九、三一七	四、〇一〇
羅馬尼亞	七、一九六	九、三一〇	二、一一四
俄國及芬蘭	一〇七、三四七	一三六、〇九三	二八、七四六
塞爾維亞及布加利亞	八五一	一、七六一	九一〇
西班牙	九七五	二、〇八〇	一、一〇五
瑞典	三〇、八九四	四六、〇二八	一五、一三四
瑞士	二、三四四	三、九八三	一、六三九
歐洲土耳其	一八七	一、五二九	一、三四二
英倫	一三、五七五	二六、二一九	一二、六四四
愛爾蘭	二九、一三八	三五、三一〇	六、一七二
蘇格蘭	二、五六〇	六、一四三	三、五八三
威爾斯	七六三	一、二七五	五一二
中國	一、六四九	二、二〇九	五六〇
日本	一四、三七〇	一九、九六八	五、六九八
亞細亞土耳其	六、二二三	七、一一八	八九五

澳洲及紐西命

三八四

一、一五〇

七六六

英屬加拿大

六三六

一、〇五八

四二二

南亞美利加

三三七

五八九

二五二

西印度諸島

四、七一

八、一七〇

三、四五九

(附注)右表所列連美國屬地在內。即如中國條下包含往檀香山及菲律賓賓者。日本條下則往檀香山者居大半也。然惟此兩國惟然耳。自餘諸國人皆往美國本境。其往屬地者不及百之一也。更舉最近二十五年間移民之統計則

一九〇三年 八五七、〇四六

一九九〇年 四五五、三〇二人

一九〇二年 六四八、七四三

一八八九年 四四四、四二七

一九〇一年 四八七、九一八

一八八八年 五四六、八八九

一九〇〇年 四四八、五七二

一八八七年 四九〇、一〇九

一八九九年 三一、七一五

一八八六年 三三四、二〇三

一八九八年 二二九、二九九

一八八五年 三九六、三四六

一八九七年 二三〇、八三二

一八八四年 五一八、五九二

一八九六年 三四三、二六七

一八八三年 六〇三、三二二

一八九五年 二七九、九四八

一八八二年 七八八、九九二

一八九四年	三一四、四六七	一八八一年	六六九、四三一
一八九三年	五〇二、九一三	一八八〇年	四五七、二五七
一八九二年	六二三、〇八四	一八七九年	一七七、八二六
一八九一年	五六〇、三一九	一八七八年	一三八、四六九

(附注)右表所列以今年(即一九〇三年)爲最高額而一八八二年次之去年(即一九〇二年)及一八八一年一八九二年復次之一八八五年何以銳減則初禁華工之結果也一八九四年以後何以復銳減則再禁華工之結果也由此觀之知前二十年移民之數中國人占一大部分也至近一兩年之增加則全屬歐洲人矣觀前表自明

由此觀之僅以二十五年間而外國人之入美者總數凡一千一百八十餘萬居美國人口七分之一有奇矣而其勢且滔滔橫流未知所屆稽其國別則意大利人及奧匈人最多在昨年各十七萬餘在今年各二十萬餘居全數之半次則俄羅斯人去年十萬餘今年十三萬餘合三國計之幾居全數三之二稽其種別則拉丁民族居八分之三有奇斯拉夫民族居八分之二有奇其餘東方民族及難晰別之民族居八分之二有奇而條頓民族則僅八分之一也且其國別種別之遞嬗愈近而愈變當十年前即一八九三年德國人之來者七萬八千餘人去年則減至二萬八千餘人十年前愛爾蘭人之來者四萬三千餘人去年則減至二萬九千餘人若意大利則十年前來者僅七萬二千餘耳而去年乃增至十七萬今年乃增至二十三萬此實北歐移住者日以少南歐移住者日以多之明證也若是者爲美國之利乎將爲美國之害乎吾不能無疑

美國當千八百年。只有五百三十萬人。至千九百年。驟增至七千六百三十五萬人。百年之間。增十五倍。何以得此。曰。惟受海外移民之賜。美國前此以歡迎移民爲國是也。無足怪者。雖然。以今日大勢所趨。恐數十年以後。美國將不爲條頓人之國土。而變爲拉丁人及他種人之國土。此其機不徒在移民之突進而已。其原住之舊民。婚姻愈遲。而產子愈少。其入籍之新民。婚姻愈早。而產子愈多。苟率此不變。吾恐不及百年。而前此殖民時代。獨立時代。高貴民族之苗裔。將屏息於一隅矣。吾所以代美國抱杞憂者。莫亟於是。而美之政論家。若矚然不以爲意焉。是則下走所不解也。

美國人以平等博愛之理想。自誇耀者也。故其對於他民族。妒嫉之念頗淡。（除中國民族不計）是其可敬佩者也。但以吾觀之。美國立國之元氣。何在。亦曰條頓民族之特質而已。使政治上社會上種種權利。全移於條頓以外諸民族之手。則美國猶能爲今日之美國乎。吾所不敢知也。昔北歐蠻族南下。而羅馬之文物以亡。自今以往。美國若有潰虞。其必自此焉矣。

美國自恃其同化力之強。謂能吸集種種異族。使從同於美。故雖厯雜不爲害。斯固然也。雖然。吾見其同化力之速率。不能與外加驟進之力相應也。昔日本人謂中國人最不肯同化。無論至何地。必自成所謂支那村。支那町者。今吾觀於美。則豈惟中國人而已。卽紐約市中。若者爲意大利村。意大利町。若者爲猶太村。猶太町。若者爲俄羅斯村。俄羅斯町。雖以吾輩初旅行者。猶一望而知其區別。然則所謂同化力者。其亦僅矣。其亦緩矣。以吾所見。則外來之民。其影響於美國之道德上政治上者甚多。

其道德上之影響。奈何。外來之民。固非無大學問家。大政治家。大宗教家。足爲美國前途之光者。雖然。不過百中

之一二耳。若其大多數，非無智無學之農民，則蕩檢敗行之醜類也。或其生計不能自存於本國，或其性行不能見容於本國，乃不得已，而以新大陸爲遁逃藪。據倫敦移民會報告書云：每歲由愛爾蘭移住美國者，其百分之七十四，爲罪滿出獄之囚徒。觀於此，不能不爲美人矍然驚也。失業無賴之人，麪集既衆，於是酗酒姦淫殺人盜竊諸惡風，日浸淫於美國。終非宗教之制裁所能範圍。據千九百年統計，紐英倫四省之人口，其外來者居百分之四十，而犯罪之人數，外來者居百分之七十五。可以見其概矣。其他雖不悖於法律，而有害於風俗者，尙多。據千九百年統計，則美國賣酒業中百分之六十三，釀酒業中百分之七十五，飲食店中百分之七十七，皆爲外來移民之所營業云。其於道德上之影響，必不少矣。其政治上之影響，奈何。

(一) 外來者多酗酒。故務求所以利酒業。當投票選舉時，至生出所謂「酒家票」者，馴至爲政治上之一勢力。近世有「禁酒會選舉團」亦因防此弊而起也。

(二) 外來者多好淫。故摩門教利用之。摩門教起於美國中部，以一夫多妻爲教義。當選舉時，生出所謂「摩門派投票」者，爲政治上之一勢力。

(三) 外來者之大多數，屬天主教。故天主教投票爲政治上之一勢力。

(四) 外來者多持偏激之社會主義。故社會黨投票爲政治上之一勢力。

(五) 外來者多麪集於大都會。致使市政種種腐敗，危及地方自治之基礎。

(六) 外來者多不能同化於美國。各自用其國語，沿其國俗，於合衆國政治上，別爲一團。若德意志人、意大利人、愛爾蘭人，其最甚也。故有所謂德意志投票、意大利投票、愛爾蘭投票者，各爲一特別之勢力，牢不可破。

每當選舉時其妨害公安公益者實甚。

(七)外來者以無智無學無德之故實不能享有共和國民之資格以一國主權授諸此輩之手或馴至墮落暴民政治而國本以危。

由是觀之則外來移民其關係於美國前途者遠乎遠哉然此等種種惡影響惟自歐洲來者實尸其咎而自中國來者蓋甚稀焉中國人之病美國者不過勞傭價廉與彼之下工相競耳而所競者又僅在太平洋岸之一小部分而非若彼等之蔓延及於全國也然則爲美國計中國移民不過疥癬之患而歐洲移民實心腹之憂也乃彼中政治家顧厄我而驕彼者何哉彼有選舉權而我無之耳美國政治家他無所懼而最懼工黨蓋一失工黨之歡而位遂不可保也準是以談則美國人對於此問題之理由可以見矣夫孰不知其爲國家將來一大患其奈國中選舉票之半數皆已在外來新入籍者之手一倡異議則萬戈向之彼十年前固嘗有議禁意大利人者矣乃不旋踵而噤若寒蟬焉則國中有二百餘萬意大利人之投票以盾其後也使我華人在美者而有此權也今此下民或敢侮予噫

雖然以媚衆取寵之故而置最大問題於不顧則與專制國諱言朝廷闕失者何擇焉此亦共和政體一大缺點也歟。

(十一)

美國外來移住民之中其勢力最大者則猶太人也聞美國之銀行業猶太人居十之三四其銀行職員猶太人

居十之五六云。

布埽委衙者。紐約第一大街也。大商店凡數千家。屬於猶太人者十而六七。吾中國則僅一家而已。

紐約市政之權。一惟猶太人所左右。他無足與抗者。其他大市亦大率類是。

猶太人何以能若是。則以其團結力之大。爲他種人所莫能及也。聞之彼族有一公會。其組織規制甚祕密。外人莫得聞。凡一猶太人來美國者。公會量其才而貸以資本。使營商業。獲利則稅其若干。以復於公會。折閱則再貸之。復折閱則三貸之。貸之三而猶不能自立。乃不復矣。此所以相扶相導。而全世界之商業。日入彼掌握也。故紐約市中二十餘萬之猶太人。其從事於下等勞働職業者甚希。而小商店營業。不計其數。

余初到紐約時。適遇俄羅斯殺掠猶太人事件。紐約各報。日攻擊之。描寫其慘狀。不遺餘力。其實此次被殺傷者。合計不滿四百人。以視拳匪之役。俄人在黑龍江畔。一日而殺華人七千。其相去亦遠矣。而全球報紙。其肯爲我實力訟冤者有幾耶。彼曷爲爾爾。則以紐約者。猶太人之紐約也。動紐約則動全美國。動全美國則動全世界。而俄人虐殺事件。遂招天下公憤。於此見中國人之生命。賤於猶太人遠矣。此役也。紐約市捐救濟金千餘萬。全美國合捐二千餘萬。紐約之華人亦有助者。聞美國猶太人公會。建議欲盡迎旅俄之同胞。至新大陸云。

近世猶太人最有名者。如英國前大宰相侯爵的士黎里。爲保守黨魁。與格蘭斯頓爭政權數十年。其最著也。既今紐約市中。若西士弗氏。爲紐約財界之雄。每年捐助教育事業。常在萬金以上。若士特拉夫氏。兩任土耳其公使。爲美國第一等外交家。若立溫德列氏。現任紐約高等法院長。爲法律名家。自餘類此者。不可枚舉。紐約「每月叢報」。嘗彙舉現世界重要人物。屬於猶太族者。凡四十八人。各國皆有揭其小傳。及其肖像。

嗚呼。以數千年久亡之國。而猶能巋然團成一族。以立於世界上。且占其一部分之大勢力焉。則其民族之特色之實力。必有甚強者矣。不然。彼巴比倫人。腓尼西亞人。今何在也。卽希臘人。羅馬人。其今昔之感。又復何如也。吾中國。今猶號稱有國也。而試問一出國門。外人之所以相待者。視猶太爲何如。而我國人之日相軋轢相殘殺。同舟而胡越。闔室而戈矛者。視今之猶太人。又何其相反耶。吾黨猶囂囂然曰。中國將爲猶太將爲猶太。嗚呼。其亦不慚也已矣。

猶太人之趨利若鶩。視錢如命。詐僞貪鄙。此盡人所同知也。故西國通用語。呼人之貪吝譎詐者曰「周」。周者。猶太字之原音也。吾嘗論猶太人對於本族有道德。對於本族以外無道德。雖然。凡道德者皆愛其類利其羣之謂耳。又豈獨猶太哉。

猶太人之不潔。與中國相類。紐約唐人街與猶太街接壤。其穢湫不相上下。

(十三)

從內地來者。至香港上海。眼界輒一變。內地陋矣。不足道矣。至日本。眼界又一變。香港上海陋矣。不足道矣。渡海至太平洋沿岸。眼界又一變。日本陋矣。不足道矣。更橫大陸至美國東方。眼界又一變。太平洋沿岸諸都會陋矣。不足道矣。此殆凡遊歷者所同知也。至紐約。觀止也未。

吾聞日本遊歷家皆曰。先至美國。後至歐洲者。無不驚歐洲之局促頑舊。先至歐洲。後至美國者。無不驚美國之鶻塵雜亂。吾未至歐洲。吾不能言之。

吾在紐約無餘日以從事遊覽。若政治上生計上社會上種種觀察。百不得一。固不待論。卽風景亦所見絕稀。吾深負紐約也。初到時有拉雜筆記百數十條。記瑣見瑣聞及遊歷。徧覆視之。覺其全屬遼東豕。故概淘汰不編入。惟略存十數條如下。

野蠻人住地底。半開人住地面。文明人住地頂。住地面者尋常一兩層之屋宅是也。住地底者孟子所謂下者爲營窟。古之五祀。穴地爲屋。鑿漏其上以透光。雨則溜下也。今吾國秦晉豫之間。猶有是風。北京之屋亦往往有入門下數石級者。猶近於地底矣。紐約之屋。則十層至二十層者數見不鮮。其最高者乃至三十三層。眞所謂地頂矣。然美國大都會通常之家屋。皆有地窖一二層。則又以頂而兼底也。

紐約觸目皆鴿籠。其房屋也。觸目皆蛛網。其電線也。觸目皆百足之蟲。其市街電車也。紐約之中央公園。從第七十一街起至第一百二十三街止。其面積與上海英法租界略相埒。而每當休暇之日。猶復車轂擊人肩摩。其地在全市之中央。若改爲市場。所售地價。可三四倍於中國政府之歲入。以中國人之眼觀之。必曰棄金錢於無用之地。可惜可惜。

紐約全市公園之面積。共七千方噏架。爲全世界諸市公園地之最多者。次則倫敦。共六千五百方噏架。論市政者。皆言太繁盛之市。若無相當之公園。則於衛生上於道德上皆有大害。吾至紐約而信。一日不到公園。則精神昏濁。理想污下。

街上車。空中車。隧道車。馬車。自駕電車。自由車。終日殷殷於頂上。砰砰於足下。鱗鱗於左。彭彭於右。隆隆於前。丁丁於後。神氣爲昏。魂膽爲搖。

人言久住紐約者其眼必較尋常人爲快。苟不爾者則當過十字街時可以呆立終日。一步不敢行。紐約之最大旅館其上等房位每日百五十元。合墨西哥銀三百餘元房中陳設皆法前王路易第十四宮中物云。李文忠遊美時住此館但僅住二等房位耳。每日七十五元。其參隨輩皆住三四等以下云。以中國第一等地位之人而作紐約第二等客一笑。

格蘭德之墓亦紐約一遊燕處也。格蘭德能任總統後貧不能自存無有恤之者及其死也以數兆金營其墓可稱咄咄怪事。聞賤丈夫欲罔利者營此別業吸引裙屐因使其附近地價可以驟漲云。茲事雖小亦可見薄俗之一斑也。墓臨河風景絕美。士女雲萃過於公園。合肥手植一樹於墓門。泐數言焉。行人咸目之。自由島者在紐約海口中央。豎一自由女神像。法國人所贈也。美人寶之登之有瀟灑出塵之想。

鄭埃崙在布碌崙之西由紐約乘電車半點鐘可達避暑之地也。遊者以夜。余嘗一遊未至里許已見滿天雲錦。蓋電燈總在數千萬盞以上也。層樓傑閣皆綴華燈。遙望疑爲玻璃世界。中有一園名狂笑園者人以洋一角售券入園。園中諸陳設玩區有普通者有特別者。特別者零買券乃能入觀。其券賤者半角最貴者亦不過兩角半。然欲徧觀之每人須費二十三元有奇。自餘如狂笑園而稍小者尙數十區。欲徧遊非三四日不能。然至者率皆中下等社會及兒童耳。

(十四)

天下最繁盛者宜莫如紐約。天下最黑暗者殆亦莫如紐約。吾請略語黑暗之紐約。

排黃熱者流。最詆華人不潔。以吾所見之紐約。則華人尙非不潔者。其意大利人猶太人所居之數街。當暑時。老嫗少婦。童男幼女。各攜一几。箕踞戶外。街爲之塞。衣服襤褸。狀貌猥瑣。其地電車不通。馬車亦罕至也。顧遊客恆一到以觀其風。以外觀論。其所居固重樓疊閣也。然一座樓中。僦居者數十家。其不透光不透空氣者過半。然煤燈晝夜不息。入其門穢臭之氣撲鼻。大抵紐約全市作此等生活者殆二十三萬人。

据一八八八年之統計。紐約之赫士達及摩比利兩街。

大半屬意大利人所居。德國人中國人猶太人亦間有。

其人口死亡之比例。每千人

中至三十五人有奇。其五歲以下之小兒死亡者。每千人中至百三十九人有奇。較之紐約全市普通統計。每千人實墮死亡二十六人有奇耳。其貧民生活之艱難。可以想見。此等率皆由住宅缺空氣缺光線所致云。

又一統計家言。全紐約賃人合居之房屋。凡三萬七千間。住於其中者百二十萬餘人云。

此等住居。非特有妨於衛生也。且有害於道德。又據統計家言。紐約某街有一樓。居者四百八十三人。而一年之間。犯罪者百有二人。其影響亦大矣。

杜詩云。朱門酒肉臭。路有凍死骨。榮枯咫尺異。惆悵難再述。吾於紐約親見之矣。据社會主義家所統計。美國全國之總財產。其十分之七。屬於彼二十萬之富人所有。其十分之三。屬於此七千九百八十萬之貧民所有。故美國之富人則誠富矣。而所謂富族階級。不過居總人口四百分之一。譬之有百金於此。四百人分之。其人得七十元。所餘三十元。以分諸三百九十九人。每人不能滿一角。但七分有奇耳。豈不異哉。豈不異哉。此等現象。凡各文明國罔不如是。而大都會爲尤甚。紐約倫敦其最著者也。財產分配之不均。至於此極。吾觀於紐約之貧民窟。而深嘆社會主義之萬不可以已也。

此等情形。既日日劇。心慌目。於是慈善事業起焉。據統計表。則紐約既有之慈善事業。凡千二百八十八所。其類別如下。

公立	二十八	臨時救助	八十三
特別救助	五十一	救助外國人	二十六
常川救助	六十七	醫院	百〇一
救助廢疾	十六	改良事業	十六
傳道會附屬救助	四十九	相互救助	七十八
教會附屬救助	五百九十	雜類	百八十三

現在紐約全市。每年慈善事業所費。亦恆在千萬元以上云。雖然。慈善果遂足以救此敵乎。慈善事業易導人於懶惰。而生其依賴心。滅其廉恥心者也。此所以此等事業雖日興。而貧民窟之現狀亦日益加甚也。觀於此而知社會之一大革命。其終不免矣。

觀各公司之製造工場。更令人人生無窮之感。近世之文明國。皆以人爲機器。且以人爲機器之奴隸者也。以分業之至精至纖。凡工人之在工場者。可以數十年立定於尺許之地。而寸步不移。其所執之業。或寸許之金。或寸許之木。磨礪焉。控送焉。此寸金寸木以外。他非所知。非所聞也。如製針工。磨尖者不知穿鼻之事。穿鼻者不知磨尖之事。而針以外之他工。無論矣。而工以外之他事業。他理想。更無論矣。以是之故。非徒富者愈富。貧者愈貧而已。抑且智者愈智。愚者愈愚。如彼摩爾根洛奇佛拉之徒。以區區方寸之腦。指揮數千兆金之事業。支配數十百萬

之職員。歷練日多。才略日出。而彼受指揮受支配之人。其智識乃不出於寸金寸木。嗚呼。何其與平等之理想太相遠耶。此固由天才之使然。然亦人事有以制之。準是以談。則教育普及之一語。猶空言耳。嗚呼。天下之大勢。竟滔滔日返於專制。吾觀紐約諸工場。而感慨不能自禁也。

紐約省統計對於男子一人而有女子六七人之比例。聞由近日東方之民。謀食於太平洋岸一帶。及大北鐵路一帶者日多。而其細弱則仍居東部。故懸絕至此甚云。此事於道德上影響亦不少。美國號稱最尊女權。然亦表面上一佳話耳。實則紐約之婦女。其尊嚴嬌貴者固十之一。其窮苦下賤者乃十之九。嬌貴者遠非中國千金閨秀之所得望。下賤者亦視中國之小家碧玉。寒苦倍蓰焉。以文明之地。結婚既難。而女性復多於男性數倍。故怨曠之聲。洋洋盈耳。以華人之業賤王者。而中下等之西女。猶爭願嫁之。則其情形略可想矣。此摩門教所以歲月侵入。而賣淫業者之數。殆逾三萬。其號稱良家而有桑濮之行者。且徧地皆是也。此亦紐約黑闇之一大端也。

(十五)

廿九日紐約社會主義叢報總撰述哈利遜氏來訪。余在美洲社會黨員來謁者凡四次。一在域多利。一在紐約。一在氣連拿。一在碧架雪地。其來意皆甚殷殷。大率相勸以中國若行改革。必須從社會主義著手云云。余謝以進步有等級。不能一蹴而幾。彼等皆云均之改革也。均之與舊社會之現狀戰也。均之艱難也。大改革所費之力。與小改革所費之力。相去不相上下。毋寧逕取其大者焉。所謂獅子搏兔與搏虎之喻也。余以其太不達於中國之內情。不能與之深辯。但多詢其黨中條理及現勢而已。大抵極端之社會主義。微特今日之中國不可行。即歐

美亦不可行。行之其流弊將不可勝言。若近來所謂國家社會主義者，其思想日趨於健全。中國可採用者甚多。且行之亦有較歐美更易者。蓋國家社會主義，以極專制之組織，行極平等之精神，於中國歷史上性質頗有奇異之契合也。以土地盡歸於國家，其說雖萬不可行。若夫各種大事業，如鐵路礦務各種製造之類，其大部分歸於國有，若中國有人，則辦此真較易於歐美。特惜今日言之非其時耳。社會主義爲今日全世界一最大問題，吾將別著論研究之。

吾所見社會主義黨員，其熱誠苦心，真有令人起敬者。墨子所謂強聒不舍，庶乎近之矣。其於麥克士德國人社主義之著書崇拜之，信奉之，如耶穌教人之崇信新舊約然。其汲汲謀所以播殖其主義，亦與彼傳教者相類。蓋社會主義者一種之迷信也。天下惟迷信力爲最強。社會主義之蔓延於全世界也亦宜。

哈利遜爲余言，現在全地球社會黨之投票權，合各國計之，已共有九百餘萬。而近一兩年來，其黨員以幾何級數增加，不及十年將爲全地球政治界第一大勢力云。此其言雖不無太過，然其盛大之情況，固在意計中也。近來國際社會黨最發達，此亦人類統一之一徵兆。哈氏言日本人入黨者已有九百餘人，而中國尙無一。以余所聞在美洲有余君表進者，社會主義黨員之一人也。余君親爲余言之，特未能爲該黨有所盡力耳。想曾入其黨者尙不止此數。哈氏或未確知耳。哈氏極欲與吾黨聯絡拓殖此主義於我國，且欲得內地或海外之華文報數家爲其機關報。余以中國人現在之程度未足語於是，婉謝之。期以異日而已。哈氏以其黨之主義綱領等小冊子及其叢報凡數十冊見贈，余深謝之。

是日下午往訪摩爾根。摩爾根者，世所稱托辣斯大王，又稱現今生計界之拿破侖者也。余本無事與彼交涉，特以全美國最大魔力之人，以好奇心欲一見之耳。彼生平未嘗往訪人，惟待客之來訪。雖以大統領及國務大臣，

或關於一國財政上求助於彼，亦惟就緒之，不敢望其枉駕也。又聞彼之會客，以一分鐘至五分鐘爲度，雖絕大之問題，只以此最短短刻決斷之，而曾無失誤。其精力真千古無兩。余於前兩日以書道來意，求五分鐘之晤談，且約期。至是詣彼窩爾街之事務室訪之，則應接所之客數十，以次引見。真未有過五分鐘以外者。余本無所求，且不欲耗彼貴重之時刻，故入談僅三分餘鐘而畢。彼贈余一言云：「凡事業之求成，全在未著手開辦以前，一開辦而成敗之局已決定，不可復變矣。」云云。此語殆可爲彼一生成功之不二法門。余深佩之。

摩爾根，美國干捏底吉省人，累代皆爲美名族。父擁大資本，在波士頓創一摩爾根銀行，握大西洋兩岸金融之權者數十年。摩氏雖藉父業起家，然自少年即富於自立之性。大學卒業後，二十一歲即入紐約之丹康查門銀行，從事實務之練習。自南北戰爭以後，美國產業勃興，而全國中各事業，其資本在數百萬圓以上者，殆無一不與摩氏有關係。及一八八二年以後，美國托辣斯漸興，野心家從事此業者踵相接，而真能成就者不過十之一二。其餘則屢起屢仆。大牽動生計界，惹起舉國物議。於是天然淘汰，優勝劣敗，其成功全歸摩氏之手。計今摩氏所倡辦，及與彼有關係之托辣斯公司等，凡三百六十餘家。全美國總資本之半額，歸彼一人支配之下。其最大者：（一）鐵路大托辣斯，以千九百年成立。凡合併十一大公司。全美國最大之幹線，皆被網羅。其線路合計四萬三千三百餘英里，足以繞地球四周而有餘。其資本爲美金十萬萬零五千四百餘萬。當中國政府二十年之歲入。（二）鋼鐵大托辣斯，以千九百一年成立。凡合併八大公司。其資本爲美金十一萬萬零四千五百萬。部下職員凡二十五萬有奇。（三）輪船大托辣斯，以千九百二年成立。凡合併八大公司。有船百十八艘。八十八萬一千五百六十二噸。英美德三國在大西洋航路之船，一網而盡。嘻，偉矣。當摩氏之謀設

鋼鐵托辣斯也。鋼鐵大王卡匿奇不欲，乃摩氏僅一席話，而卡氏遂帖然奔走。三月事遂大定，其謀設輪船托辣斯也。欲握大西洋航權，使新舊兩大交通機關入於其手也。黎倫輪船公司者，英國最大最久之公司，其船來往大西洋者二十九萬三千餘噸。英國百餘年來所以左右海權者，實惟此公司是賴。摩氏之初至英也，英人聞其有建輪船托辣斯之議，目笑存之，乃亦不及數月，竟戢戢以就範圍。於是全歐人始駭汗相驚，曰：美國禍，曰：美國襲來，曰：美國統一世界。若此者，謂其原動力在摩氏一人可也。舉世錫彼徽號，曰：商界之拿破侖，誠哉其拿破侖也。摩氏至德國，德皇維廉第二出其御船迎之，與之同遊宴者三日，退而語人曰：吾見當世英雄，惟有一人，曰：摩爾根，摩氏亦語皇云：使陛下而生於美國，憑藉此大舞臺，以演陛下之手段，其鴻圖當更有不可思議者。嗚呼！使君與操，真並世之兩人傑哉！其目無餘子也固宜。抑一十世紀以後之天地，由武力時代變為實業時代，然則今日再有一武力之拿破侖，亦終不免在劣敗之數。而有一實業之拿破侖，其并吞囊括之大業，誰又能測其所終極耶！

(十六)

紐約全省之華人約二萬，其在紐約市及布碌侖與紐約相連今合為一自治團體者萬五千。大率業洗衣工者最多，雜碎館者次之，廚工及西人家雜工又次之。其餘商人則皆恃工以為生，商店大小亦有數百家。自成一所謂唐人埠者，每來復唐人埠街衢為塞，蓋工人休暇皆來集也。餘日則頗冷淡，吾儕在東方諸市演說，惟來復日聽衆闐塞，餘日則至者不及半數。

雜碎館自李合肥遊美後始發生。前此西人足跡不履唐人埠。自合肥至後一到遊歷。此後來者如鯽。西人好奇家欲知中國人生活之程度。未能至亞洲。則必到紐約唐人埠一觀焉。合肥在美思中國飲食。屬唐人埠之酒食店進饌數次。西人問其名。華人難於具對。統名之曰雜碎。自此雜碎之名大噪。僅紐約一隅。雜碎館三四百家。徧於全市。此外東方各埠。如費爾特費波士頓華盛頓芝加哥高必珠卜諸埠稱是。全美國華人衣食於是者。凡三千餘人。每歲此業所入可數百萬。蔚爲大國矣。

中國食品本美。而偶以合肥之名噪之。故舉國嗜此若狂。凡雜碎館之食單。莫不大書「李鴻章雜碎」。「李鴻章麵」。「李鴻章飯」等名。因西人崇拜英雄性及好奇心。遂產出此物。李鴻章功德之在粵民者。當惟此爲最矣。然其所謂雜碎者。烹飪殊劣。中國人從無就食者。

西人性質有大奇不可解者。如嗜雜碎其一端也。其尤奇者莫如嗜用華醫。華醫在美洲起家。至十餘萬以上者。前後殆百數十人。現諸大市殆無不有著名之華醫二三焉。余前在澳洲見有所謂安利醫生者。本不識一字。以挑菜爲生。貧不能自存。年三十餘。始以醫誑西人。後竟致富三百餘萬。及至美洲。其類此者數見不鮮。所用皆中國草藥。以值百數十錢之藥品。售價至一金或十金不等。而其門如市。應接不暇。咄咄怪事。

西例凡業醫者必須得政府之許可。然在美國得之並不難。各醫家皆自稱在中國某學校卒業之醫學士。醫學博士等。蓋美國賄賂風盛行。有錢則萬事俱辦也。自此點觀察之。則不如日本遠甚。日本唐人埠之醫生。無一能得免許狀者。

紐約者全世界第一大市場。商業家最可用武之地也。中國至微至賤之貨物如爆竹如葵扇如草席。每歲銷數

皆各值美金數百萬。大者無論矣。然大率由美國人手經辦。中國人自辦者寥寥。統計紐約全市。其與西人貿易之商店。僅兩家而已。中國人對外競爭之無力。即此可見。謂中國人富於商務之天才者。亦誣甚矣。紐約及東部一帶之華人。有眷屬者頗稀。不如西部之多。蓋道遠往來難之所致歟。以此之故。華童在學校者亦甚少。約計不盈百人。

哥倫比亞大學。美國大學中之第一流也。吾中國學生一人。曰嚴君錦鎔。北洋大學堂官費所派遣者。學政治法律。明年可以卒業。

由紐約至哈佛波士頓

(十七)

四月晦。由紐約至哈佛。哈佛者。于捏底吉省之都會。而東部著名之市府也。

居紐約將匝月。日爲電車。汽車。馬車之所鞿轡。神氣昏濁。腦筋矜亂。一到哈佛。如入桃源。一種靜穆之氣。使人翛然意遠。全市貫以一淺川。兩岸嘉木競蔭。芳草如簞。居此一日。心目爲之開爽。志氣爲之清明。

全市華人不過百餘。而愛國熱心不讓他埠。舉皆維新會中人也。時容純甫先生。閑隱居此市。余至後。一入旅館。卽往謁焉。先生今年七十六。而矍鑠猶昔。舍憂國外。無他思想。無他事業也。余造謁兩時許。先生所以教督之勸勉之者。良厚。策國家之將來。示黨論之方針。條理秩然。使人欽佩。

翌日鄉人請余演說。容先生亦至。

哈佛者中國初次所派出洋學生留學地也。於吾國亦一小小紀念。容先生導余遊其高等學校。實全美國最良之高等學校云。余行後三月康同璧女士來留學斯校。其校長出二十年前校中記事錄。言及中國學生者見示。余爲歎歎久之。

中國初次出洋學生。除歸國者外。其餘尙留美者約十人。余皆盡見之。舍歎息之外。更無他言。內惟一鄧蘭生者。於工學心得甚多。有名於紐約。真成就者此一人矣。然不復能爲中國用。以美國數百萬學者中。多此一人。何補於美國。其次則容駢。現在我公使爲頭等翻譯。篤誠君子。文學甚優。亦一才也。吾深望其將來有所效於祖國。自餘或在領事署爲譯員。或在銀行爲買辦。等諸自鄙矣。人人皆有一西婦。此亦與愛國心不相容之一原因也。一歎。

市中有一室。昔爲留學生寄宿舍者。中國政府所購置也。數年前始售去。其一區額落雜貨肆中。鄉人以數金易歸。免將來入博物院增一國恥而已。

由紐約至哈佛。道經紐海文。實耶路大學所在地也。耶路爲美國最著名之大學。吾國學生亦有三人。在焉。曰陳君錦濤。曰王君寵佑。曰張君煜全。皆北洋大學堂官費生也。吾自初卽發心往參觀此校。然迫於時日。所至各地。皆有期約。竟不能下車。以爲遺憾。今年夏季卒業。其法律科。王君裊然爲舉首。受卒業證書時。王君代表全校。四千餘人致答詞。實祖國一名譽也。是次法律科第一名爲黃種人。第二名爲黑種人。第三名乃爲白種人。各報紙競紀之。謂從來未有之異數云。

聞耶路大學近擬開一分校於我上海。已有成議。或以明年秋冬間可開校云。果爾則爲吾國學者求學計。便益多矣。雖然。我輩當思彼美人者。果何愛於我。而汲汲焉。乃不遠千里而來教我子弟耶。人才未始不可以養成。特

不知能爲祖國用否耳。教育者何。國民教育之謂也。天下固未有甲國民而能教育乙國民者。不然。香港之皇仁書院。上海之聖約翰書院。其學科程度。雖不及耶路之高。然在中國固罕見矣。問其於我祖國前途。作何影響耶。吾聞耶路開學之舉。喜與懼俱矣。

余在哈佛二宿。卽行。五月二日至波士頓。

(十八)

波士頓者。馬沙諸些省之首都。現今美國第五位之大都會。而自獨立以前。素著名譽之市府也。人口五十六萬餘。華人約三千。美國東部中國維新會之開。以斯市爲最早。會成於己亥秋。至壬寅冬。而大擴張。故吾黨與該市華人關係頗切密。既至。諸同志迎於車站。留學生徐君建侯偕焉。歡迎一如紐約。是夕。余爲中國國旗演說。及波士頓歷史之演說。聽者頗感動。

波士頓者。美國歷史上最有關係之地。而共和政治之發光點也。初英人之殖民於美洲。在千六百二年。初有新英蘭勿爾吉尼諸地之公司。而其實行共和政體者。爲自今馬沙省所屬普利摩士一支之殖民始。余於五年前。所爲飲冰室自由書。有一條題爲「自由祖國之祖」者。其文云。

北亞美利加洲有一族之人民焉。距今二百七十餘年前。其族之先人百有一人。苦英苛政。相率辭本國。去而自竄於北美洲蓬艾藜蒿之地。櫛風沐雨。千辛萬苦。自立之端緒。稍萌芽焉。其初至之地。曰苦利摩士。遺跡至今猶有存者。爾後有志之士。接踵而來。避秦而覓桃源者。所在皆是。積百有餘年。戶口漸繁。財政漸增。至千七

百七十五年。既瀾漫於十三洲之地。遂建義旗。脫英羈勒。八年苦戰。幸獲勝利。遂爲地球上第一大獨立國。卽今之美國是也。回憶一百有一之先人。於千六百二十年十二月二十二日。冽風陰雪中。舍舟登陸。躡足而立於大西洋岸石上之時。其胸中無限塊壘抑塞。其身體無限自由自在。其襟懷無限光明俊偉。殆所謂本來無一物者。而其一片獨立之精神。遂以胚胎孕育今日之新世界。天下事固有種因在千百年以前。而結果在千百年以後者。今之人有欲頂禮華盛頓者乎。吾欲率之以膜拜此百有一人也。

吾夢想此境者有年。吾今乃得親履其地。撫其遺跡。余欣慰可知矣。普利摩士距波士頓僅汽車五點餘鐘。余凌晨而往。觀所謂新世界石者。卽彼百有一人初至時登岸所立之地也。二百年來。美之愛國家及外來遊客至者。每槩鑿少許懷之而歸。以作紀念。原石損壞殆半。至是以鐵柵圍之。禁採折云。徐君建侯錫其名曰新世界石本書所載之圖。卽徐君親自攝影見贈者也。見第一圖

初十七世紀之初元。英民以謀利目的。渡航美洲者漸夥。至其真爲自由主義堅苦刻厲以行其志者。實始自此百有一人。百一人之首領爲勃黎福。實清教徒中之急進派也。當英王占士第一卽位。嚴壓新教勃黎福及其黨人。乃決計出奔異國。自行其是。千六百八年率其徒赴荷蘭。寄居數年。困甚。又慮其子弟久居異邦。失其國粹。時聞勿爾吉尼省之殖民公司爲清教會中所主持。始謀來美託庇同道。乃貸資於倫敦富商。期以七年償還。約定買巨艇盡族而行。千六百二十年。抵普利摩士。見其地饒沃宜種植。遂定居焉。不隸於勿爾吉尼。其始定制。通力合作。種植所得。悉存爲公積。而同人亦衣食於公家。無有私財。實行柏拉圖之共產主義。未幾故國人聞之。深相慕羨。來者日衆。見共產之制不可以久。乃議每夫劃田一畝爲私有。建築村邑。公議管理之法。首建議會。舉勃黎

福爲伯里璽天德。小事由伯理璽處分。大事則公議公斷。凡成年者皆有會議權。至一六三八年。以居民分拓殖於各地。散處不能悉赴會。乃行代議制度。是普利摩士開闢之略史也。普利摩士初時自爲一省。後乃合併於馬沙。故美國共和政團。實托始於是。

美國人合衆自立之端緒。殆無一不發源於波士頓。當一六四三年。紅印度土人屢與殖民諸白人爲難。而英廷亦與清教會相持。於是始聯合馬沙諸些。普利摩士干捏底吉紐海文四省。立一殖民總會。後普利合於馬沙紐之二省而當時分四政府也。實爲聯邦之濫觴。而其總會所在。波士頓也。一六六四年。英廷頒發航海條例。欲以限制殖民。遣

使至新英蘭及馬沙諸省。而廷折其公使。拒不納者。波士頓人也。一六八四年。英廷廢馬沙省之證書。美國諸殖民地皆受

自治證書於英廷。或先傳證書而後。或殖民漸就緒而後。求得證書。特派一總督統轄新英蘭諸省。及一六八八年。馬沙人首立共和政府。復要

求自治證書於英廷。其政府所在。則波士頓也。是年英王維廉第三。遂給回證書於馬沙。當英法七年戰爭之役。法人大聯紅印度土

人與英屬諸殖民省爲難。故諸省不能不倂拒敵。於是亞爾拔尼。紐約省之首部也。大會議。實爲聯邦進步之第二

著。而其時之軍事會議。則在波士頓也。時華盛頓爲勿爾吉尼省之副將。參與軍事會議於波士頓。自是華盛頓始著名。一七六五年。英廷創行印花稅。

諸殖民地大憤。其首發難相抵抗。使稅員懼而辭職。而印花稅得以暫廢者。則亦波士頓市民之爲之也。一七六

七年。英國戶部大臣湯欣。厲行苛稅。設法六章。而特由英廷設一美洲總稅務司於波士頓。其首倡臨時公議。抗

此新法。令各稅務司皆懼而逃匿於炮臺者。亦波士頓人也。一七七二年。居民與駐防兵首交閩。爲軍事之先聲。

者。又波士頓人也。其後湯氏新稅雖廢。而仍留茶稅一項。印度茶必經由英國。由英廷抽稅。乃許入美。一七七三

年。英茶至波士頓。起岸候驗。居民聞之大譁。羣起奪取茶箱。盡投諸海港。此實爲美國人對於英廷宣戰之第一

著，則亦波士頓之倡也。其年英廷遣兵一小隊，以軍政治其地，而馬沙亦自設政府，募民兵。一七七五年，遂有奔勾丘之戰。其最初交綏之地，則波士頓也。其年五月，復開國會於費爾特費，舉華盛頓爲統帥。其第一次戰捷，挫英兵之銳氣者，則首圍波士頓而奪據之也。由此論之，謂波士頓爲美國合衆自立之母，誰曰不宜。

余在波士頓九日，每以半日與國人演說談論，以半日訪尋其歷史上遺跡。手美國史一部，波士頓名勝記一部，地圖一紙，按圖而索之。初四日往觀拋棄英茶之港口，則今爲一大街最繁盛之區矣。街角牆上嵌一銅碑，銘曰『一七七四年拋棄英茶處』。下復紀其事略。蓋當時有市民七人，塗面易服，爲紅印度人之裝束，夜襲英船，取其茶數十箱，投諸海云。斯事與林文忠在廣東焚燬英人鴉片絕相類，而美國以此役得十三省之獨立，而吾中國以彼役啓五口之通商，則豈事之有幸有不幸耶。毋亦國民實力強弱懸絕之爲之也。余徘徊久之，得一絕句。

雀舌謂茶

入海鷹起陸

美國以鷹爲徽章

銅表摩挲一美談，猛憶故鄉百年恨。鴉煙滿白鵝潭。

同日遊奔勾丘，至則僅一小丘耳。一七七五年四月，馬沙民兵圍波士頓，與英駐防兵初交綏，即在此地。今有一華表，一民兵首領戰死者之銅像，華表之守護人導余徧遊全丘，逐一指點曰：某處者某兵官所立廢令之地也。某處者某兵官戰死之區也，是役也，英兵死傷千五百，美人僅四百云。余憑弔感慨，不能自禁，成一詩云。

昔遊東臺岡

日本勤王師戰勝處即今東京上野公園是也

今上奔勾丘，渺茲一黃土。長留萬人謳，生命固所愛。不以易自由，國殤鬼

亦雄。奴顏生逾羞，當其奮起時。磊落寧他求，公義之所在。赴之無夷猶，一射百決拾。往折來軫適，大業指揮定。嘖嘖凝萬眸，謂是實天幸。人謀與鬼謀，謂是某英雄。隻手迴橫流，豈識潛勢力。乃在丘民丘，千里河出伏。奔海不能休，三年隼不鳴。一擊天地秋，穫實雖今日。播種良遠繇，固知無實力。不足語大猷，即今百年後。兵銷日月

浮鋪錦作河山。琢玉爲層樓。周文與殷質。國粹兩不仇。入市觀市民。道力尙無儔。清明嚴肅氣。凜凜凌五洲。士頓風俗之美。至今猶爲美國冠。益信樹人學。收效遠且迨。仰首嘯鴻濛。回首睨神州。先民不可見。懷古信悠悠。

翌日遊公園。有一樹爲華盛頓初次點兵處。原樹已槁。今所見其補植者也。

隨遊道前斯達嶺。前此英兵所屯。華盛頓奪據之。以臨波士頓。遂獲全勝者也。有石碑示華盛頓所立處。同日遊一禮拜堂。乃獨立前清教會之所建者。規模甚局小。體製甚古樸。實獨立時民黨屢次集議之地云。今不復在此講道。惟以當一博物院而已。其中所陳歷史上紀念物甚多。不能備述。

(十九)

初六日往觀市立圖書館。設圖書館以保存古籍者。自十六世紀時日耳曼人已行之。至以此爲公共教育之機關。實自茲館始云。千八百四十七年。波士頓市長乾士氏議徵市稅。以設市立圖書館。議會許之。卽爲此館之嚆矢。越二年。英國仿其例。由議會提款以充茲事之用。千八百五十四年。英之門治斯達利物浦二市始有圖書館。實波士頓以後第一次繼起者也。以千八百九十六年之調查。則全美國中藏書三千卷以上之圖書館。凡六百二十六處云。本館所藏書凡八萬冊。其前後建築費合計美金二百六十五萬元。除總館之外。其分布於市中者。尙有分館十所。借書處十七所云。此皆館長爲余所言者。彼斷斷然以此爲波士頓市對於全世界之名譽也。同日往觀「波士頓報」館。史家或亦以此爲世界最古之報館云。考新聞紙之起源。或云當中世之末。意大利之俾尼士已有之。由政府發行。每月一冊。用手寫。非印刷也。其在英國。則千五百八十年。額里查白女皇與西班

牙交戰之時。政府亦曾發一新聞紙。出版無定期。至占士第一時。始有禮拜報。實則英國每日新聞。實自千七百九年始。而此「波士頓報」則濫觴於千七百四年。然則謂此報爲報界之祖。殆無不可。距今適二百年。已不知幾易主。而其規模之宏大。亦不可思議。余往觀經三點鐘。乃畢。內容繁賾。倦於筆記矣。觀畢後。館主請留一相。余每至一市。諸報館訪事皆來照相。此次又特別留記者也。

報館愈古者。則愈有價值。蓋泰西之報館。一史局也。其編輯文庫所藏記事稿。無慮百千萬億通。所藏名人相及名勝圖畫。無慮百千萬億襲。分年排比。分類排比。吾嘗遊大新聞報館數家。其最足令吾起驚者。則文庫是也。故無論何國。有一名人或出現或移動或死亡。今夕電報到。而明晨之新聞紙即登其相。地方形勝亦然。彼何以得此。皆其文庫所儲者也。

美國當千八百五十年。全國報館僅二百五十四種。讀者僅七十五萬八千人。至千九百年。報數增至萬一千二百二十六種。讀者增至千五百十萬人。全國印出報紙總數凡八十一萬萬零六千八百五十萬部。統計全國報館平均支出費用總額一萬萬零九千二百四十四萬元（美金）收入總額二萬萬零二千三百萬元。於戲盛哉。而倡之者實自「波士頓報」。此亦波士頓之一榮譽哉。美國之大報館。皆一館而出報至數種或十數種之多。有晨報焉。有午報焉。有晚報焉。有夜報焉。有來復報焉。有月報焉。有季報焉。有年報焉。皆以一館備之。其最大者如紐約之太陽報。世界報。時報。每日出至十數次以上。大抵隔一點或兩點鐘即出一次。午間向街上賣新聞者。而求其早間所出之報。則已不可復得矣。凡大都會之大新聞。大率類是。以視吾東方之每日出一張。銷數數千乃至數萬。即厯然共目爲大報館者。其度量相越。豈不遠耶。

初七日往觀博物院。其中陳設之璀璨瑰瑋。吾固數見不鮮。不復縷述。所最令余不能忘者。則內藏吾中國宮內器物最多是也。大率得自圓明園之役者半。得自義和團之役者半。內有文宗所用之表。云是俄羅斯皇室所贈者。其雕鏤之精巧。殆無倫比。表大不過徑寸。其外殼槩兩裸體美人倚肩於瀑布之上。兩鳥浴於瀑布之下。表機動則瀑布飛沫。誠奇工也。其餘彫玉物品。彫金物品。古近磁器。凡數百事。並度一龜。不遑枚舉。余觀其標簽。汗顏而已。

初八日。觀哈佛大學。美國東部大學以哈佛耶路哥倫比亞三者最著名。其程度莫能軒輊。至科學則仍以哈佛爲最高云。吾中國始終未有一人卒業於此校。

初九日。往紐巴弗。其地華人不過數十。徐建侯留學於其地實業學校。招往焉。演說一次。往觀學校而還。

初十日。由波士頓復返紐約。道經科利華。其地有華人百餘。強留一宵演說。

十一日。乘船歸紐約。其船稱世界汽船中最美麗者云。

由紐約至華盛頓

(二十)

五月十四日。由紐約至華盛頓。

華盛頓。美國京都。亦新大陸上一最閑雅之大公園也。從紐約。波士頓。費爾特費。諸煩濁之區。忽到此土。正如哀絲豪竹之後。聞素琴之音。大酒肥肉之餘。嚼鱸葦之味。其愉快有不能以言語形容者。全都結構皆用美術的意。

匠。蓋他市無不有歷史上天然之遺傳。而華盛頓市則全出於人造者也。

都中建築最宏麗莊嚴者爲「喀別德兒」Cathol 喀別德兒者譯言元首之意。謂此地爲一國之元首也。喀別德兒之中央一高座爲聯邦法院。其左右兩座次高者爲上議院下議院。其後一大座爲圖書館。合稱爲喀別德兒。喀別德兒之前置華盛頓一銅像。其中央高座中門楣楹枋壁蓋皆美國歷史紀念畫。其技或繪或彫或塑。其質或金或石或木。自殖民時代獨立時代南北戰爭時代以至近日。凡足以興國民之觀感者。無一不備。對之令人肅然起敬。沛然氣壯。油然意遠。甚矣美術之感人深也。環喀別德兒之周遭皆用最純白大理石鋪地。淨無纖塵。光可鑑髮。其外則嘉木修蔭。芳草如簣。行人不譁。珍禽時鳴。瑯環福地。匪可筆傳矣。

華盛頓之圖書館。世界中第一美麗之圖書館也。藏書之富。今不具論。其衣牆覆瓦之美術。實合古今萬國之善。英云。吾輩不解畫趣。徒眩其金碧而已。數千年來世界上著名之學者。莫不有造像入之。如對嚴師。其觀書堂中常千數百人。而悄然無聲。若在空中谷。

觀書堂壁間以精石編刻古今萬國文字。凡百餘種。吾中國文亦有焉。所書者爲「子夏曰。日知其所亡。月無忘其所能。可謂好學也已矣。」二十一字。寫顏體。筆法遒勁。尙不玷祖國名譽。

喀別德兒之莊嚴宏麗如彼。而還觀夫大統領之官邸。卽所謂白宮 White House 者。則渺小兩層。聖白之室。視尋常富豪家一私第。不如遠甚。觀此不得不歎羨平民政治質素之風。其所謂平等者真乃實行。而所謂國民公僕者真絲忽不敢自侈也。於戲。侷乎遠矣。

全都中公家之建築最宏敞者爲國會 卽喀別德兒 次爲兵房。次爲郵局。最湫隘者爲大統領官邸。民主國之理想於

此可見。

華盛頓紀功華表。矗立都之中央。與喀別德兒相對。高五百英尺。實美國最高之建築物也。其中空。可以升降。用升降機上之。須五分鐘。始達絕頂。步行則須二十分鐘以外。登華表絕頂。以望全都。但見芳草甘木。掩映於瓊樓玉宇間。左瞰平湖。十頃一碧。同行一西人。爲余指點某邱某壑。是獨立軍決鬪處。某河某岸。是南北戰爭時南軍侵入處。余感慨歎。不能自勝。得一詩云。

瓊樓高處寒如許。俯瞰鴻濛是帝鄉。十里歌聲春錦繡。百年史跡血玄黃。華嚴國土天龍靜。金碧川山草樹香。獨有行人少顏色。撫欄天末望斜陽。

華盛頓紀功華表。構造時。徵石於萬國。五洲土物。鳩集備矣。各國贈石。皆系以銘。用其國文。泐之。以頌美國國父之功德。吾中國亦有一石焉。當時使館所餽。道員某爲題詞。其文乃用瀛寰志略所論載。謂華盛頓視陳勝吳廣。有過之無不及云。嗚呼。此石終可不磨。此恥終不可洒。見之氣結。

旅美十月。惟在華盛頓五日。中最休暇。徧遊其兵房庫房鑄銀局博物院植物院等。惜不能到華盛頓故里一觀遺跡。最爲憾事。

每夕使館中人多相訪者。詢美政府對滿洲問題之真相。頗悉。今事已過去。已發表。不復再述。華盛頓除使館外。有中國留學生八人。壽州孫氏居其五。皆沈實向學。有用才也。

十六日訪外務大臣約翰海氏於其家。談兩點餘鐘。語以中國朝局真相。及一二年來民間之思潮。海氏皆若不勝其駭者。勸著一書以諭歐美人。許之。病未能也。海氏號稱美國第一政治家。任國務卿兼外務大臣者將十年。近年美國對外政策。多由彼主持。彼又爲余言。彼向持中國可以扶植之論。雖同僚亦多非笑之者。今見余。且聞余言。益自信其所見之不謬。余聞之。深爲我祖國悲慚。唯唯而已。瀕行。殷殷以常通信相囑。亦有心人也。其人沈默廉悍。一望而知爲外交老手。

十七日訪大統領盧斯福於白宮。時盧氏巡行國內初歸。坐客闐溢。導余別室。會晤約兩刻。無甚深談。惟言常接我會電報。且見章程。深佩其宗旨及其熱誠。祝此會將來有轉移中國之勢力。且祝其現在有轉移美國華僑之勢力云云。又言深以未得見康南海爲憾事。屬余代致意。且屬有欲陳之言。悉告海氏。與彼無異云。

盧斯福之人格。與德皇維廉第二相彷彿。並世各國首長中。其雄才大略。有開拓萬古推倒一時之概者。惟此兩人而已。盧氏以千八百五十九年生於紐約市。千八百八十年卒業哈佛大學。受法學博士學位。出仕爲海軍部書記官。已著論大倡擴張海軍之議。其時國民無以爲意者。西班牙戰役起。慨然投筆。自募義勇隊。率以從軍。威名大顯。戰畢。被舉爲紐約市警察總監。旋任紐約省總督。極力節制資產家。使不得跋扈。及選舉大統領時。資產家忌其能。故欲以閑職安置之。乃推爲副統領之候補員。竟獲選就任。美國制。副統領不過上議院一議長。且在院中無發言權。無投票權。實坐嘯畫諾之閑員耳。黨人以此術敬而遠之。將使彼無用武之地。乃無端而有前統領麥堅尼遇刺之變。定例以副統領襲其後。於是盧氏一躍而立於最高之地位。驥足始克展矣。美國自麥堅尼以來。共和黨即利帕爾力根現政府黨也。即已傾心於帝國政略。盧氏更持極端之進取主義。雄心勃勃。其所著書有奮鬪的

生涯一篇。自餘所至演說。無不以戰爭爲立國之大原。卽此可見其爲人矣。將來下次選舉大總統時。盧氏已有獨占多數之勢。大約其復任可以豫決。果爾則盧氏在任七年中。美國之突飛進步。正未可量也。

美國近數十年。以門羅主義爲外交上神聖不可侵犯之國。是此盡人所同知也。雖然。經麥堅尼。盧斯福兩大總統之時代。而門羅主義之性質。生一大變化。欲知世界全局之大勢者。不可不深察也。考門羅主義之宣言。在千八百二十三年。其時中美洲南美洲諸國。尙悉爲歐羅巴人殖民地。顧皆不堪虐政。欲脫母國自立。而母國猶汲汲鎮壓。始終認屬地爲其固有之權利。其時歐洲各專制君主國。結集所謂神聖同盟者。思以挫民權自由之氣。而西班牙遂借此同盟之威力。欲鎮壓殖民地之叛亂。而恢復其故權。以此之故。中美南美戰亂無已時。而商業上交通上皆生障害。美國大總統門羅氏。乃宣言於各國。明定北美合衆國對於全美洲之權利及其義務。是卽所謂門羅主義者是也。故門羅主義者。非國際法上一原則。而實對抗於神聖同盟之防守軍也。所謂門羅主義之性質。如是如是。今剖析其內容。則有積極之方針三。有消極之方針三。

一 亞美利加大陸中。凡已宣告自由獨立之國土。則歐羅巴諸國不得以之爲殖民地。

二 若歐羅巴諸國欲壓制拉丁亞美利加諸國。案中。美南美洲諸國。皆拉丁民族所殖民。故謂之拉丁亞美利加。或蓋格魯亞美利加也。或以他種方法阻其進步。是卽與美國爲敵也。

三 歐羅巴同盟諸國。不得擴張其政體於南北美洲大陸。苟爾則是有意欲破壞美國之平和及其幸福。以上三條積極之宣言。

一 歐羅巴諸國所有現在之殖民地及屬國。美國不干涉之。

二 亞美利加大陸諸國各從其所採擇之政體。美國不干涉之。

三 歐羅巴諸國之內政及其外交和戰等事。美國決不干涉之。但有侵害美國權利之時。則爲正當之防禦。

以上三條消極之宣言

此門羅主義最初之本相也。雖然。八十年來。隨美國國勢之進步。而此主義亦日變其形。今略述則

一八四五年 博克爲大統領時宣言曰。合併美洲大陸之國土。此美國之義務也。云云。

一八八一年 加弗爲大統領時宣言曰。拉丁亞美利加諸國所有紛擾事件。宜以美國爲其裁判者。云云。

一八九五年 國務大臣阿爾尼宣言曰。美國者亞美利加全洲之主權者也。云云。

由是觀之。則門羅主義之本相。則所謂『亞美利加者亞美利加人之亞美利加』是其義也。及其變形。則所謂『亞美利加者美國人之亞美利加』矣。而孰知變本加厲。日甚一日。自今以往。駸駸乎有『世界者美國人之世界』之意。而其所憑藉以爲口實者。仍曰門羅主義。門羅主義。豈不異哉。謂余不信。請觀盧斯福之門羅主義演說。

盧斯福巡行全國至芝加哥演說云。

（前略）門羅主義者。今猶未能爲國際法上之原則。顧其將來。必有能爲國際法上原則之一日。此吾所敢斷言也。雖然。此主義能實行與否。全視吾美國人之遠志與實力何如。而其爲國際法上原則與否。殆餘事耳。此則我國民所一日不可忘者也。夫大言壯語。非所貴也。於人與人之交涉有然。於國與國之交涉亦有然。使徒言之以快一時。倉卒遇變。而無所以應之之具。則辱滋甚耳。諺有之。『勿多言。搗屑於手。汝斯得進。』鄙人

思之孰思之。苟吾美國能具置有力之海軍。且持久而勿替焉。斯我門羅主義所向無敵矣。（下略）案此演說甚長

且極有關係之文也。其大意皆在獎勵海軍。思想於下節觀美國海軍時再錄之。茲不多贅。

吾讀此演說。三復其門羅主義所向無敵一語。吾不禁瞿然以驚。而未測盧斯福及美國國民之本意何在也。夫使門羅主義而僅曰亞美利加者。亞美利加人之亞美利加也。則需海軍何爲者。就使門羅主義而僅曰亞美利加者。美國人之亞美利加也。則需强大之海軍何爲者。且門羅主義。凡以保守耳。防禦耳。故他國之向於門羅主義。容或有之。至以門羅主義向人。吾不知其何意也。盧氏之言曰。所向無敵。嗚呼。可以思矣。夏威夷律夷爲郡縣。若不闕秦。將焉取之。吾恐英國鴉片煙之役。法國東京灣之役。德國膠州灣之役。此等舉動。不久又將有襲其後者也。

（二十一）

美國大統領其權力職掌。與他國之首長有所異。今據其憲法所定者論次之。

一大統領有總督聯邦海陸軍及各省民兵之權。

二大統領有締結條約之權。惟須得上議院議員三分有二之協贊。

三大統領有任用外交官司法官及聯邦政府各官吏其憲法中特別規定之官吏不在此限之權。惟亦須得上議院之協贊。

四有赦減刑罰之權。（惟議院所彈劾之案不在此數）

五遇大事故。有臨時召集議院之權。

六國會決議之法律案。大統領有權拒之。或飭令再議。惟再議之後。若兩院皆以三分二之多數通過前案。則大統領不得再議。

七大統領有將美國國情稟告於國會。以政策呈薦於國會之義務。

八有效忠於法律之義務。

九有監督聯邦官吏之義務。

美國大統領之性質。其最與他國首長相逕庭者。有一焉。則在平時其權力甚小。在戰時其權力甚大是也。蓋在平時國內行政大部分之權。在各省政府。即聯邦之諸政務。論美國政治者當於各省政府與聯邦政府劃清界限。本書末章已略論之。亦大率由立

法部即上下議院之法律所規定。故行政部即大統領所屬無自由行動之餘地。若一旦與外國宣戰。或國中內亂起。則大統領

據其總督海陸軍之權。且實行其效忠法律之義務。可以將一切權力悉入掌握中。如南北戰爭時之林肯。是其例也。彼於一八六二年宣告放奴之檄於全國。未嘗問各省立法部之許可與否。而毅然舉行。且一切普通法律皆得以便宜行事停止之。故西人常言在盎格魯撒遜人種之中。其個人之權力最大者。前有一克林威爾。後有一林肯耳。大統領戰時之大權。可見一斑。

美國大統領與立法部之關係。以視英王與立法部之關係。大有所異。彼英王者。以形式上言之。則立法部之一員也。何以故。彼英國憲法本以國會為王所召集。以王為會議長。以聽人民之疾苦。而制定匡救之法律者也。今實上實非爾爾但其由來則如是耳。故現今英國重要之法律。大率皆由政府大臣奉王之名提出於國會。以求其協贊。美國則不然。彼大統領非立法部之一員也。故其憲法不許大統領及其閣臣提出法律案於議會。何以故。彼等無列議於

國會之權利故。此亦政法上一有趣味之問題也。蓋美國者實行孟德斯鳩三權鼎立之義。而界限極分明者也。美國何以能如此。則以英國之憲法由天然發達。而美國則全加以人力也。

美國大統領多庸材。而非非常之人物。居此位者甚希焉。此實我輩異邦人所最不可解之問題也。試歷數建國以來二十四名之大統領中。除華盛頓、遮化臣、林肯、格蘭德、麥堅尼、五人。此外碌碌餘子。其不藉大統領之地位而

能傳其名於歷史上。殆無一人也。嗚呼。距今不過數十年耳。試問全球中誰復知博克一八四五年至四九年之大統領、皮阿士

一八五三至五七年之大統領之爲何如人者。亦誰復欲知其爲何如人者。故以百餘年來英國大宰相與美國大總統比較。英

則有維廉、鼈特、小鼈特、惠靈頓、羅拔、比兒巴、馬斯頓、格蘭斯頓的士黎里、沙士勃雷。皆可稱世界歷史上第一流人物。求諸美國足與頡頏者。惟彼五人。遮化臣、格蘭德、嚙、啾、啾怪事。孰有過此。

若此者。其理由何在。乎。英人占士布利斯所著美國政治論書中言之特詳。且深中癥結。茲節譯之。

第一 美國第一流人物。多不肯投身於政治界也。此事之原因。布利斯別有詳論。

第二 美國之國勢及其憲法所規定。非必須非常之才。始足以當此任也。如彼英國之大宰相。總攬立法行政兩大權。故必須有左右羣衆之雄辯。有案畫大政策。創制大法律之能力。始克堪此。若美國大總統。則不能參列於國會。不能妄演說於公衆之前。不能提出議案於兩院。不能以別種手段擴張其勢力於立法部。故大總統之在平時。不過一奉行成法之長吏而已。與尋常一公司之總辦。其職務正相等。故勤慎敏直之人。即可當此職。而有餘。而遠慮博識雄才大略。非所必需也。

第三 美國自建國以來。於專制武斷政體。深惡痛絕。此等腦識。傳數百年。入人最深。其所最懼者。若克林威

爾拿破命等人物濫用其權力，馴變爲僭主專制政體也。故以華盛頓初次就任時，猶且謗議沸騰，謂其妄自尊大，欲擬英王。故第二次滿任時，華盛頓決避嫌引退。其後格蘭德在任時，輿論亦以其功名太盛，部卒愛戴，謗妒之言橫生，疊見。故美國之大統領，非特不必要第一流人物而已，抑且不欲要第一流人物。此美人之僻性使然也。

第四 英傑之士，多友亦多敵。此常理也。今當兩政黨競爭選舉之時，各指定一人爲候補者，彼通例不肯用其黨中第一等人，而惟用第二三等以下之人，何以故？彼第一等人久已著名爲萬衆所具瞻，而任事愈多者，其授人以可攻之隙，亦必愈多。當其競爭劇烈之時，甲黨對於乙黨之候補者，攻擊每不遺餘力，往往將其平生行誼，毛舉以相指摘。楓秀於林，風則摧之。故英傑之士，不利於候補。毋寧舉無咎無譽之輩，之較有成算也。是則黨派之私見爲之也。

第五 且美國人有兩重愛國心。一曰愛合衆之國，二曰愛本省之國。彼等各以大統領出於其省，爲一省之名譽，又以爲本省人爲大統領，其所以謀本省之利益者，必更周也。故甲省之票，投諸以舉乙省人者，甚稀。故各黨指定其候補人之時，常梭其籍貫，務取之於大省。若紐約省選舉大統領，有三十六票，濱士溫尼亞省費爾特費爾特有三十一票，伊魯女士省案即芝加高所在案即芝加高所在有三十票，阿海和省有二十三票。若溫門省埒埃倫省則僅各四票。的拉華省柯利根省則僅各三票。案美國選大統領用間接選舉法故每省只有此數然則其候補人出於紐約與出於柯利根，其得票之數相去必懸絕矣。故陬濼之鄉，雖英俊不能以自達，衝要之邑，雖庸材反得以成名，亦黨派之意見爲之也。

要而論之。大統領自大統領。候補者自候補者。良大統領未必爲良候補者。良候補者未必爲良大統領。昔一名士求爲大統領。而自薦於友人曰。『諸君當知以余爲大統領則甚良。以余爲大統領候補者則甚劣。』當時傳誦以爲名言。痛乎哉。美國黨人之意見也。與其求得良大統領也。毋寧求得良候補者之爲急。蓋爲國家百年之大計。事未可知。而爲一黨目前之利害。則選舉一失敗。而此四年間本黨已蠱屈而不可得伸矣。案大任期故其所兢兢研究之問題曰。將由何道而使本黨之選舉獲勝利而已。噫。此大統領所以不得人才而共和政體之所以有流弊也。

第六。不寧惟是。高才之士亦多有不自願爲大統領者。蓋任期只有四年或八年。任滿之後。欲再投身於政界。大有所困難也。各部之次等行政官固非所欲。欲入於上下議院。則本省各有常員。不易出缺。且曾居高位。爲十手十目所指示。不免授敵黨以可攻之隙。在本黨中。則當其在任時。黨員之請謁。勢不能盡如其意。相憾者亦復不少。故以罷任大統領。而望再舉爲議員。是殆必不可得之數也。不寧惟是。罷職之後。欲營別業。從事於辯護商務等。非惟損名譽也。又辱國體。故退職之大統領。幾無一業可就。非生計素裕。甚或罹凍餒之憂。故人之不甚樂就此職也亦宜。案國家待退職大總統之法。此亦美國多年一大問題也。昔羅馬共和政時代。其法美意也。奈美國則其勢萬不能行。蓋美國上院議員。蓋以其名譽閱歷深。有補於政界也。此實良人。今若以退職大統領加入之。則甲省多一人。而乙省之嫉嫉。將起此其所以不能行也。

案布氏所論。可謂窮形盡相矣。準是以談。則大統領者。殆不免爲黨派中之一傀儡。其廢置一在黨中策士之手。既傀儡矣。則其好用庸才也亦宜。難者曰。若英國亦非無黨派。何故其大宰相不用傀儡。曰。其情實不同也。英國黨派之勝敗。於選舉議員時決之。美國黨派之勝敗。於選舉大總統時決之。英國但求黨員在議院中占多數耳。

既占多數。則其黨魁自得爲大宰相而莫與爭。故所爭者非在宰相其人也。美國反是。勝敗之機。專在一著。夫安得不於此兢兢也。夫美國爭總統之弊。豈直此而已。其他種種黑闇情狀。不可枚舉。吾遊美國而深歎共和政體。實不如君主立憲者之流弊少而運用靈也。若夫中美南美諸國。每當選舉時。必殺人流血。以相從事者。更自鄙無譏矣。黨派之以大總統領爲傀儡者。蓋大總統領有任用官吏之權。苟新任者與前任者異。黨則一國之官吏將盡行易。人新大總統領對於舉主不能不爲特別之酬勞。昔加弗以三月就任大總統。領以七月被刺。死有記其事者。謂此五月中加弗除應酬求官者之外。別無他事云。其奴隸於黨派。可概見矣。自文官任用法改正後。此弊稍減。

雖然。大統領之好用庸才。此惟在太平時爲然耳。彼美國人者。固非於國之利害與黨之利害。盡倒置其輕重者也。彼以爲在平時則大統領雖庸才。而非有所大害於國。故利用之以爲黨謀。其謀私益也。以不侵公益之範圍爲界也。於公益非無所損。但比較的言之。未爲甚耳。一旦有事。則各能誦小羣以伸大羣。忍小害以防大害。故南北戰爭之前。能用林肯其人者。放奴義舉。其成功不徒在林肯。而國民能任用林肯。實其足以致成之道也。今者萬國比鄰。外競日劇。美國方汲汲然擴張其帝國政略於新大陸以外。勢不能不戴雄才大略者以爲一國之元首。故最近兩大統領。麥氏盧氏。皆一世偉人也。吾知自今以往。若博克若皮阿士之徒。斷無望濫竽斯職焉矣。

(二十三)

美國有最奇者一事。曰無首都是已。華盛頓美之首都也。曷云無之。曰吾之所謂首都者。謂全國中各種權力之集中點也。若英之有倫敦。法之有巴黎。德之有柏林。奧之有維也納。意之有羅馬。俄之有彼得堡。日本之有東京。舉國中人口最多者此地也。財力最厚者此地也。商務最盛者此地也。工業最繁者此地也。富豪權勢之人最樂

居者此地也。最大學校之所在者此地也。最大新聞紙發行者此地也。一國中政治勢力之源泉在是。學問智識之源泉在是。財富通輸之源泉在是。國中諸地。萬海朝宗。歸集於此一點。復由此一點以分布於諸方。如血輪之在心房然。是之謂首都。若此者。求諸美國中。何地足以當之乎。將曰華盛頓乎。以最近之統計。其人口僅二十七萬八千餘人。黑人居三之一焉。與諸市府比較。班在第十五。其社會之交際。僅議員官吏外國公使等耳。大商家不在是。大文學家不在是。大美術家不在是。大工場大新聞不在是。其不足以當此名。昭昭然也。

將曰紐約乎。紐約誠人口最多。財力最厚。商務最盛。工業最繁之地也。雖然。其在政治上。除選舉大統領投票占多數外。無一毫特別之勢力。此亦指紐約省耳。非指紐約市也。實業上之偉人雖多。而文學上之偉人殊少。其新聞紙誠最良最

廣銷者也。然究爲紐約之新聞紙。以視倫敦巴黎之一國新聞紙。自固有間。故紐約非首都。將曰費爾特費乎。波士頓乎。當獨立時。此兩地雖幾有此資格。而今則無有也。將曰芝加高乎。聖路易乎。此兩地將來之發達。雖不可限。然充其量。固無以逾紐約明甚也。若是乎。美國洵無首都。且殆將終無首都也。

又不徒全國爲然也。於各省亦有然。政治之中心點。與社會之中心點。常不相合并。是美國之特色也。紐約省總督所在。阿爾拔尼也。而非紐約。濱士溫尼省總督所在。哈利士卜也。而非費爾特費。伊里女士省總督所在。士庇靈弗也。而非芝加高。加罈寬尼省總督所在。沙加免圖也。而非舊金山。阿海和省總督所在。哥倫布士也。而非先絲拿打。柯利根省總督所在。西林也。而非砵命。自餘各省大率類是。以吾儕外國人之眼觀之。實千萬不可思議。美國以何因緣。而無首都。由自然耶。由人造耶。此問題吾猶未能斷之。大率兩者各與有力焉。若華盛頓則全由人造者也。彼自其始。未嘗不可擇一繁盛之都市。若波士頓。若費爾特費者。以爲首善。但以各省互相嫉妬。且大

市府競爭劇烈。慮其於政治上起騷擾。故避之而宅於一林莽未闢之地。故華盛頓者在美國諸省中。不屬於一省。別以七十英里之地。自名哥林比亞。爲聯邦政府之直隸。略與我順天府不屬於各省者同而其性質微異此所謂由人造者也。其餘亦有由天然者。若紐約省當獨立以前。阿爾拔尼市之繁盛。實過於紐約市。後此以交通大開。其商業中心點。隨而移動。而政府所在。尙未易也。如我中國直隸省會本在保定。通商以後。忽移於天津。但我則政治樞紐隨之而移。彼則尙仍其舊耳。其餘他省亦有類此者。此所謂由天然者也。

凡殖民地之現象。往往如是。如英屬加拿大最繁盛之市爲滿地可。而其政府國會乃在阿圖和。澳洲初爲聯邦時。維多利省與烏修威省爭聯邦之首都。卒乃於兩省之界。劃一甌脫而建置焉。是亦美之華盛頓也。

除美國外。其無首都之國。當惟中國。中國之北京。本有完全首都之資格者也。近則勢力已漸墜落。其政治上之權。多分散於各疆吏。學術思想界之權。當乾嘉間。悉萃於北京。今翻其反矣。若夫商工業則更不足道。以將來之趨勢測之。則上海駸駸乎有將爲中國首都之勢。夫至以上海爲首都。則亦列國公共殖民地之首都。而非復我之首都矣。一歎。

余在美時。有西教士杜威者。偶爲余言曰。華盛頓市民無選舉權。余初聞大駭愕。及察之。信也。此真一怪現象也。考美國例有所謂某省某省之市民。(Citizen)而無所謂合衆國之市民。外人欲入美籍者必入某省籍得省籍而國籍亦同時俱得矣。若欲竟入國籍則無從入也。市民者選舉權所從出也。哥倫比亞。即合衆國直隸華盛頓所在地。無市民。則華盛頓人無市民權也。亦宜。雖然。此則真

普天下立憲國之所無矣。華盛頓市民欲求選舉者則各歸其本省求之。蓋各有原籍故也。

歐洲日本諸立憲國。其選舉區與被選舉人。常不相屬。甲地之人。可以運動乙地以競選舉。甚自由也。惟美國不

然此省之票決不投彼省人。彼市之票決不投此市人。此亦美國與諸國相異處也。此皆由聯邦政治各自保其邦之權利然也。

前引布里斯言謂美國第一流人物不肯投身政界。此其理由究何在乎。請畢布氏說。

(第一)則以無首都故。彼歐洲各國政治中心點所在。即職業中心點所在。故如英法之政治家。在倫敦巴黎。一面運動國事。一面仍照常操其職業。美則不然。苟欲爲聯邦之政治家。如國會議員之類勢不得不別家鄉拋職業。以居於幽靜之華盛頓。非人情所甚欲故也。

(第二)歐洲諸國國會中數百議員。位置甚寬。欲得之者可以到處遊說。以求選舉。此地不得去而之他。美國則諸省諸市各舉其士著人。若己之選舉區。本黨黨員候補者之額已滿。則更無術可以攔入。若必攔入。則出於內競耳。故其得爲議員也。視他國爲較難。懷才之士。不欲作雞蟲之爭。蓋亦爲此。

(第三)美國政界之大問題。不如歐洲之多。歐洲政界所屢演之大活劇。則外交政略問題也。改正憲法問題也。宗教問題也。此三者美國皆無之。所餘者惟貨幣問題。關稅問題等一二大事耳。故奇才異能之士。往往不屑屑意也。

(第四)歐洲百年來爭競最劇者。則地主富豪家壓抑下等貧民。而貧民亦日思上進。以迫彼輩也。一則欲保守其特別之權利。一則欲爭其應享之權利。咸思舌戰於議會。以決勝負。凡以爲自爲計也。故兩階級中。皆多產政治家。美國則建國以來。已墨守人類平等主義。除放奴問題外。更無足勞辯爭者。此亦政界所以少活氣也。

(第五)美國之立法權由聯邦議會與各省議會分掌之。各有其權限。如外交關稅諸問題。則屬於聯邦社會改良慈善事業諸問題。則屬於各省以分之。故其範圍遂狹。政治家入聯邦政界。則不能爲本省有所盡。入本省政界又不能爲聯邦有所圖。故第一流之經世家爲功名心所驅迫者。以其地小不足以迴旋也。故望望然去之。

(第六)歐洲各國。凡在政界得意之人。其於社會交際。常得特別之名譽利益。美國則萬民平等。雖大統領猶一市民。故慕虛榮家不趨焉。

(第七)美國人欲求出身之路。與其入政界也。寧入實業界。蓋以無盡之富源。新闢之地利。懷抱利器之士。投身於商業工業礦業鐵路。可以數年之間。起蓬華而埒王侯。故美國當今第一流人物。咸願爲所謂鐵路大王煤油大王鋼鐵大王托辣斯大王者。而不屑在「喀別德兒」中爭一座位也。

以上所論。真有特識。觀此則美國社會之情狀。可觀一斑焉。故並譯之。

(二十四)

美國憲法。自一七八七年九月十七日制定。凡七章二十條。一七九一年十二月十五日修正十條。一七九八年一月八日修正十一條。一八六四年九月二十五日修正十二條。一八六八年七月二十八日修正十四條。一八七〇年三月三十日修正十五條。即現行憲法是也。立憲以來。凡修正者五次。然大致不異於其初。上議院代表各省。每省二人。由各省立法部(即省議會)派遣。任期六年。每六年改選其三分之一。現時總數

九十員。

下議院代表個人各選舉區以人口疏密定員數多少。任期二年。現時總數三百五十餘。行政權在大統領。大統領以下有政府。今舉政府各員如下。

大統領

副大統領（兼上議院議長）

國務大臣

戶部大臣

兵部大臣

檢事總長

郵運總監

海軍大臣

農務大臣

大統領年俸五萬員。自副大統領至農務大臣各年俸八千員。上下院議員各年俸五千員。皆美金政府各員任期皆以四年。如大統領。

余旅美十月。其最閑靜者。則在華盛頓四日間也。除訪盧氏海氏外。更不見客。晚間惟使館中一二舊友及留學生諸君來寓縱談。此地華人甚希。且無維新會。應酬殊希。盡日遊覽各名勝。徧歷矣。

十八日晚返紐約。

由紐約至費城

(二十五)

五月二十一日由紐約至費爾特費（華人通省稱費城）

費城者獨立時代國會所在地。現今第三位大市府也。人口共一百二十九萬三千六百九十七人。華人約三千餘。有維新會新開會員約華民全額之半。

至費城演說後。所最關心者則訪獨立廳也。二十二日晨興造焉。

廳兩層。上有閣。惘樸質素。百年前風也。

門外地石嵌一銅碑。蓋林肯嘗立此演說云。

門外鑄華盛頓銅像一。

入門左側一堂。即千七百八十七年會議憲法處也。陳舊椅七張。圍以鐵鏈。中一椅華盛頓所坐也。華盛頓時爲議長。餘六椅則哈彌兒頓遮化臣諸人所坐。皆標名椅旁。當時各代表入簽名所用之筆及墨水壺等。皆寶存焉。聞李合肥來遊時。必欲一坐華盛頓所坐之椅。閣人曰。自國父去後無坐者。合肥曰。我偏爾爾。閣者難拒。卒破例許之云。此老作此態何居。

堂上懸遺像數十通。皆當時會議憲法各省代表人也。

出堂登樓。樓梯下甌脫處置破鐘焉。卽所謂自由鐘者是也。

余將至費城前數日。讀新聞紙。忽報自由鐘出遊。余嗒然謂何無緣也。及鐘歸之後一日而余至。鐘之出遊。波士頓迎之也。以五十萬金作保證云。

緣梯而上。以至樓上之堂。滿壁皆畫像。自殖民時代至獨立時代之先民。凡數百通。不能悉記。內英前王前后遺像亦與焉。其當中最大之像。爲維廉濱。蓋濱士溫尼省即費城所屬之省之殖民。自濱始也。卽以其名名省濱父母之像皆在。

樓上西堂爲一七七六年宣讀獨立檄文處。原草稿存焉。余購其影本一張。十七省代表人之簽名皆備。樓板新加一層於其上覆之。懼剗傷舊板也。中空尺許覆以玻璃。使遊客窺舊跡一斑焉。

東堂爲華盛頓慰恤傷兵處。時傷者皆昇至此堂。狼籍滿地云。今舊樓板中尙見斑斑血點。東堂置維廉濱所用之几及書案。皆初殖民時自英攜來者。几爲濱母所手織云。

華盛頓母像與維廉濱母像同懸一龕。皆藹然仁人也。

有維廉濱當時與紅印度土人買地之質劑。及土人所饋維廉濱物品十數事。濱待土人最寬。土人德之。卒以闢濱士全省云。

余徘徊摩挲一時許。向闈人購買紀念物數十種歸。

(二十六)

費城歷史上遺跡尙多。惜余在彼時日匆促。未能遍探。二十三日往觀海軍造船所。美國第一軍港也。

美國昔持非戰主義。故海軍之建設爲日甚淺。一八九五年以前。殆微末不足道。今則形勢一變。以武斷主義爲

對內政策，以侵略主義爲對外政策。至是擴張海軍一事，爲國家百年大計矣。聞美國今年一九〇三年海軍擴張豫算八百四十萬元（美金）與去年比較實增加四十萬。以此趨勢，歲歲進步，則其凌德法駕英俄之日，亦當不在遠耳。

考美國海軍發達史，當以現任大總統盧斯福氏爲功首矣。當一八一二年與英國爭戰時，及一八六一年南北之役，海戰之績，良不可沒。然殆如曾文正之長江水師，置之今日，值一噓耳。迨一八七〇年前後，參將馬韓氏大聲疾呼，言經營海軍之爲急。美國人之注意東方問題，自馬韓氏之著書始。然舉國目笑存之，莫以爲意也。一八八二年，盧氏奉職海軍省，著一書極言美國現在之海軍，非舊式老朽之艨艟，卽新造劣等之艨艟。我國民舉其國防托諸此等之手，其危險實不可思議云云。盧氏大文學家也，其詞剴切透達，足以動人民，漸傾聽，輿論一變。至一八九〇年，海軍省乃設海軍軍政局，提出軍艦擴張案於國會，得其協贊，是爲美國有海軍之嚆矢。

美國軍艦之參列於世界海軍團，自一八九五年始也。其時德開鑿愷沙維廉運河，動工之際，各國軍艦參賀於德之奇爾港，美國二艦至焉。

	(艦名)	(進水年)	(排水量)	(馬力)	(速力)
紐約		一八九〇年	八、二〇〇	一七、四〇一	二一
哥林比亞	同	上	七、三七五	一八、五〇九	二二、八

美國軍艦出海自茲役，不過七年前事耳。其時新式戰艦，美國無一焉。據最近之海軍報告，則美國所屬十二戰艦，皆一八九五年以後所新造。惟「印地安拿」、「馬沙諸些」、「柯利根」三艘，以一八九三年進水。然九五

年以前未供公用也。其十二艦中內五隻排水量各一萬六千噸。現方製造。不日落成。成後則美國海軍之位置躍進矣。要而論之。則謂一八九五年為美國海軍之新紀元可也。

及一八九九年。西班牙戰役起。美國海軍在散地哥馬尼刺等處連戰連捷。聲價頓增。國民海軍熱亦漸盛。考其時美國之海軍力。則

一等戰艦 四隻

二等戰艦 一隻

裝甲海防艦 七隻

裝甲巡洋艦 二隻

保障甲巡洋艦 十八隻

小巡洋艦及炮艦 十八隻

水雷艦 十八隻

以視五年前奇爾港會操時。洵一日千里之進步矣。近兩年來。其計畫日益擴張。據本年（一九〇三年）統計。年艦。美國最近之海軍力如下表。

（軍艦種類） （現 在） （製造將成） （預備製造）

一等戰艦 六 五 二

二等戰艦 六

三等戰艦	……	……	……
四等戰艦	一	……	……
裝甲巡洋艦	……	九	二
摩尼特爾艦	十	……	一
四等巡洋艦	二	……	……
五等巡洋艦	一	……	……
六等巡洋艦	十一	……	……
七等巡洋艦	七	……	六
炮艦	二十	……	一
滅水雷艦	二十	……	二
水雷船	二十四	……	……
潛水雷船	八	……	……

盧斯福氏當一八九九年嘗演說云。

我國民非好戰者。若事勢相迫於不得已之時。不戰則已。戰則不可不期於必勝。而在今日世界大勢。戰之勝敗。必以海軍之優劣爲衡。苟海軍不完。則不論我國民之富力進步何若。智力進步何若。其失敗可計日而待也。故擴張海軍者。我今日愛國之國民。所當每飯不忘也。

今年其在芝加高演說亦云參觀第二十一節

(前略)兩年以來我海軍突飛進步鄙人所以為國民慶者莫大於是吾深謝前議會之諸君子賜我同胞以九艘之大戰艦且許增加海軍將校及其兵員俾平時練習得宜一旦有事可以揚國威於海外此之功德我國民終不可諍者也諸君當知軍艦者最精細最複雜之一種大機械也故製造之非以數年之歲月不能為功且將校及水兵之訓練尤非咄嗟可辦苟當國際破裂兵戈相見時而始為見兔顧犬之計既無及矣試觀近世之戰事其終局皆甚速然則開戰以後決無復餘裕以為製艦練將之預備苟爾者非直愚而失計且罪惡莫甚焉何也以其驅無罪之民肝腦塗地而且以辱國也夫西班牙之役吾國人在馬尼刺及散地哥所奏凱歌國民咸豔稱之而其所以得此之由則十五年前之經營之為之也吾儕深頌吾海軍將校之偉業吾尤不得不深謝我國之公人(按)指政府及議員等與夫造船廠廠主及各鐵工也何以故一八九八年榮譽之戰勝皆受彼等之賜故抑吾更有一言余之欲我國有龐大之海軍也非為戰爭計也以此為平和之保證而已若吾果能得有力之海軍而繼續之擴充之乎則敢信我國將來之國難必永遠銷息而海外諸國更無復能與吾門羅主義爭輕重者諸君請懸此以驗吾言(案)盧氏此次演題本為門羅主義故末節並及之

此論者在二十年前為盧氏一人之言在今日則已成全國之輿論矣美國對外政略之變化於此益可見更據統計年鑑所列列國海軍比較表則其等第如下

國名

鐵甲艦

非鐵甲艦

總計

隻數

噸

隻數

隻數

噸

隻數

隻數

噸

隻數

英國	六三	七五〇、二〇〇	四八三	七五一、八一八	五四六	一、四〇一、〇一八
法國	五四	四八一、二九四	三一六	一七二、六四八	三七〇	五九〇、九四二
德國	三五	二四〇、〇〇一	一七〇	一四二、七一四	一〇五	三八二、七一五
俄國	三二	二六七、四一六	一八八	八四、九八四	二二〇	二五一、四〇〇
美國	二四	一七七、一七四	八七	一〇七、五一三	一一六	二八四、六八七

嗚呼。門羅主義所向無敵。門羅主義所向無敵。豈其將以之向歐洲而行門羅主義之正反對耶。而汲汲焉何爲。我同胞一念之。

盧氏此次演說又云。『卽我陸軍之宜增設者亦久矣。而蹉跎以至今日。夫以擁七千餘萬自由民之大國。置十萬以上之常備兵。抑亦微乎末矣。而論者猶或懼以此故。危及共和政體之前途。其亦過慮之甚矣。』云云。以此可見美國人對於兵備之猜忌。其舊謬見至今未泯。而識時之士。所以噤舌瘖口。諄諄以此相勸勉者。其亦不得已之言也。伯倫知理謂共和政體不適於今後之競爭。信然。雖然。雖然。美國國論今固大變矣。費城之製造汽車機器廠爲全世界第一。余往觀矣。二十五日返紐約。

由紐約至波地摩必珠卜

(二十七)

閏月初四日由紐約啓行而西。復至費爾特費爾兩宿焉。應該地維新會之大會議也。

初六日往波地摩。美國第六大都會也。屬美利侖省。人口五十萬八千九百五十七。華人約六百餘。未有維新會。余至演說一晚。會遂成。迫於他地之期約。不能少留。

初七日至必珠卜。行汽車十七點鐘。

必珠卜者。美國第十一大都會也。屬濱士溫尼亞省。與費城同省一極東一極西也。人口三十二萬一千六百六十六人。以人口與

富率平均比較。全國中以此市爲第一。云華人六百餘。維新會已開。余留市一來復。

必珠卜者。鋼鐵大王卡匿奇之老營也。其大鋼鐵公司在焉。滿市皆機器廠。煙囪如林。煤氣成霧。有煙市 Smoke Town 之目。市甚炎熱。而無穿白衣。蓋不半日而素化爲緇也。

卡匿奇爲現今美國第一富豪。然其所以爲世模範者。不在其能聚財。而在其能散財。彼常語人曰。『積資產以遺子孫。大丈夫之恥辱也。』於是定計將其有五萬萬美金之財產。務於生前悉散之。分布於社會之自助者。務使得其所。毋失其宜。彼近年來之苦心。皆在於是。彼嘗言大集者必當大散。集之固不易。散之亦良難。於是有好事某大藥房之主人。作八百萬部美麗之小冊子。記卡氏小傳及其財產總數。而頒之於美國。募人投票。論卡匿奇當用何法以散其財於公益事業。於是應募投書者凡四萬六千通。其類別如下。

自請贈與者

一二、二四六

請贈與於別人者

二二、六八

請施送此藥房之藥以濟世者

五、二九六

請助教會傳道事業者

二〇、四四

請施救貧民者

一、五六二

請捐助癩狂院者

三四一

請施恤南非戰死之孤兒寡婦者 一、四五八 請投諸殖民事業者 三三二

請用以養老人者 一、三二〇 請爲工人建模範家宅者 二七八

請以設醫院者 七〇九 請贈少年子弟爲資本者 二七七

請施入孤寡院者 六五一 請設立學校者 二六四

請捐印度濟飢者 六二九 請給家宅與鰥寡孤獨者 二四八

勸卡氏讓財產於其女者 五〇九 請代償國債者 二三七

請給家宅與老人及廢疾者 四〇三 請爲美國預備戰費者 二三六

請給家宅與貧民者 三九三 請建設圖書館者 二〇四

請捐助俱樂部者 三八九 其他 七、七六〇

當此投票紛紛騷擾之時。卡氏乃始著手處置其財產。計數年來設必珠卜工業大學捐五千萬。紐約市圖書館一千萬元。紐約以外美國諸市之圖書館凡一千萬元。必珠卜圖書館及工人救恤費一千萬元。都合捐出八千萬元以上云。

卡氏雖常助金錢於種種團體。然始終未嘗一助教會。未嘗一助政治運動。

卡氏不助不自助者。彼常言曰。自發心欲上梯子者。從後助之可也。若不欲上者。雖助之亦不得上。徒令其受墮落之苦而已。是非益之。卻害之也。云云。

卡氏出身寒微。自其幼時。未嘗得受相當之教育。惟恃在公立圖書館中得種種之智識。故卡氏以圖書館爲慈

善事業之第一。傾全力以助之。余所至各市。無不見有卡氏所立圖書館者。雖日本所設立。彼亦仗助數處云。惟其善果。未一播於中國。殆豈中國人無自助力。不足邀卡氏之助耶。噫。余至必珠卜時。卡氏往歐洲。惜未得見。

十一日即西曆七月四日。百廿七年前美國宣告獨立之日也。以財賦最盛之奧區。行舉國最大之祝典。其盛況可想矣。余不能殫述之。且羞述之。有詩兩章。

此是君家第幾回。地平彈指見樓臺。巍巍國老陪兒戲。得得軍歌入酒杯。十里星旗連旭日。萬家紅燄隱驚雷。誰憐孤館臨淵客。憑陟升皇淚滿腮。

尋思百廿年前事。穆穆神山不可望。拚使軍前化猿鶴。豈聞閭左有蜩蟬。成功自是人權貴。創業終由道力強。予欲無言君記取。勃黎遺教十三章。殖民初祖勃黎福有共產自治團體規則十三章皆德育要領至今美人寶焉勃黎福實以一講學大師開此宏業者也

(二十八)

美國太平洋海電告成。即以獨立紀念日舉行通信祝典。我太平洋彼岸人當此。其感更何如。

昔英國詩聖索士比亞作夢遊僊吟有句云。『吾有寶帶兮。以四十分鐘一周地球。』此實三百年前理想家之一寓言耳。豈期物換星移。物質文明之發達。不可思議。我輩生此二十世紀者。竟人人皆得以至微末之代價。利用彼索士比亞之寶帶而有餘。嘻。不亦異哉。不亦偉哉。

此寶帶之出現。始自千八百五十年英吉利海峽之設置海電。及至本世紀之第二三年。英國之太平洋海電美

國之太平洋海電先後竣工而全帶乃成。英國之線則自加拿大屬之域多利經佛安寧島菲支島那兒福克島而達於澳洲之比里斯賓市終焉。以一九〇二年完成。美國之線則自舊金山經夏威夷島之漢挪路盧再經茂德威島嘉謨島至菲律賓之馬尼刺終焉。其舊金山至夏威夷間之線以本年西曆元旦告成。其夏威夷至菲律賓間之線即此次所成者是也。

七月五日必珠卜報載四日之夕十點五十分時大統領盧斯福在紐約電報總局發一電於菲律賓總督達富

特氏。文曰祝美國太平洋海電之開通并頌貴督及菲島人民起居萬福迨十一點二十分達富特氏之覆電已至。文甚長凡百五十餘言并有求美國政府輕減菲律賓生產品

進口稅此祝電既發後大統領更發一電賀海電局總辦麥奇氏即在本局發電令繞地球一周而復還本局。麥奇氏親自監督發電。文曰賀太平洋海電之成功并代全國民敬謝足下之先君子及足下實其夜十一點二十三分也。麥奇氏自揣環地球一周

大約歷一點鐘可以復還。心急之極。自持時表注視長短針之運行。怵息以待。忽然電機躍動。舉局之人環集爭觀。隨現隨寫。視之正大統領祝電也。距發信時不過十二分鐘耳。彼時麥奇氏之得意真有萬乘不易者。

此電經行之路則由紐約經大陸出舊金山。由舊金山即用此新海電經夏威夷島、茂德威島、嘉謨島、至馬尼刺。更由馬尼刺接英國海電至香港。復由香港經西貢、新嘉坡、檳榔嶼、馬德拉士、摩爾達、地中志布羅爾達、利士般。

葡牙達於亞佐士羣島。大西洋再由彼循美國海電復返於紐約云。

麥奇氏既接此祝電復致一覆電於盧斯福。此次之電改由大西洋發。循前此歐洲與東方通行之舊線至馬尼刺。復由馬尼刺用新海電至舊金山。經美洲大陸復還紐約。發電時十一點五十五分。接電時十二點四分三十

秒。相距僅九分零三十秒云。嗚呼。人巧之奪天工。至此而極。

新大陸遊記節錄

八一

今舉其經行之里數如下。

(電線路)

(英里數)

自紐約至舊金山(大陸電線)

三、六五〇

自舊金山至漢挪路盧

二、一〇〇

自漢挪路盧至茂德威島

一、二〇〇

自茂德威島至嘉謨島

二、一五〇

自嘉謨島至馬尼刺

一、五〇〇

自馬尼刺至香港

四〇〇

自香港至西貢

七五〇

自西貢至新加坡

六〇〇

自新加坡至馬德拉士

一、五五〇

自馬德拉士至孟買(印度陸線)

五〇〇

自孟買至亞丁峽

一、七〇〇

自亞丁峽至亞歷山德利亞

二、三〇〇

自亞歷山德利亞至利士般

二、四九〇

自利士般至亞佐士羣島

一、一七〇

總計

二四、六六〇

其距離之遠如此。而以十二分至九分之短時刻。瞬息相接。嘻。偉觀矣哉。回憶大西洋海電初議建設之時。實在千八百五十八年。而歷數次之失敗。直至千八百六十六年。始獲就緒。曾幾何時。今則大西洋上之電線已十六條。而亘世界大半之太平洋。亦同時而成二線。世界之進化。真不可思議。

紐約太陽報曾論美國與太平洋海電之關係云。美國之電報。前此全恃大西洋傳來。倘或偶有事變。大西洋海電稍生窒礙。則美國與世界全部。無一地可以交通。其危險莫甚焉。且也世界之大勢。日趨於泰東。今吾美既得夏威夷菲律賓。以東方諸國爲吾市場。非在東方得一最迅速最直接最確實之交通機關。則事事將落人後。前此華盛頓政府與馬尼刺之交通也。由迂回遼遠之電路。當外國干涉之衝。雖幸而未嘗遇意外之變。借或有焉。何以禦之。故海電告成之日。卽美國在東方勢力範圍始穩固之日也。云云。由此觀之。美人之注熱誠以歡迎此海電也亦宜。

抑吾更有一言。四十六年以前。紐約之人口。不過七十萬。及今乃一躍而至三百餘萬。雖其他種原因尙多。而自大西洋海電既通以後。驟增突進之跡。歷歷不可誣矣。然則此太平洋海電開通以後。東亞之紐約。殆將出現。此亦推理而可徵者矣。我國民若能利用之。其助我文明進步之速率。又豈淺鮮。而惜乎錦繡江山。他人入室。吾又安忍言哉。

(附記)西七月二十五日芝加哥高電局改正電報價目表摘錄如下

芝加高至漢挪路盧

每字四角四分（俱記美國銀下同）

至蔑德威

六角九分

至嘉謨

九角四分

至菲律賓島

一元一角四分

至香港

一元一角九分

至中國

一元一角九分

至澳門

一元二角九分

至日本

一元五角

前此由芝加高發電至中國每字電費一元六角今減四角一分云。美國諸市工價之昂，以必珠卜爲最。華人在此者照例仍以洗衣工爲獨一無二之職業，以此賤工而每來復所入，自美金十七元乃至二十二元，視內地候補道一局差，優之遠矣。十四日行。

由必珠卜至先絲拿打紐柯連

（二十九）

閏五月十四日由必珠卜首塗之紐柯連道經先絲拿打被邦人繫留焉一宿行。

先錄打者。美國第十大都會。屬阿海和省。人口三十二萬五千九百。二人。華人九十餘。市雖大。頗貧瘠。拉丁人種所屬。集文明程度。遠出他市下。余演說一夕。維新會成。十五日行。以溽暑節。入熱帶地。坐汽車。竟日。如入甕。然。口占一絕。

黃沙莽莽赤烏虐。炎風炙腦腦爲涸。乃知長宿水晶盤。三百萬年無此樂。

十六日至紐柯連。

紐柯連者。美國第十二大都會。而南部之重鎮也。屬路易安拿省。人口二十八萬七千一百。華人千餘。此地西人華人之生計風俗。皆與東部絕異。至此耳目爲之一新。

南部諸省前此所謂奴隸省。而紐柯連實爲之總鎮。紐柯連卽南部數省之攝影也。故吾至紐柯連。其特別之趣味獨多。

南部諸省黑人殆三分之一。而紐柯連之比較率。恐尙不止此數。蓋舊蓄奴者皆大地主。而大地主集於大都會。故奴數尤多。今雖自主。猶附著於土地也。入其市。幾忘爲白亞美利加。而疑爲黑亞美利加矣。

南部諸省號稱爲共和政體。實則至今仍寡頭政體也。其人民大率可分三級。其一曰上等之白人。卽南北戰爭以前此地之殖民貴族。亦有新自北而掌握地方上實權者也。其人數甚少。不過十與一之比例。其二曰下等之

白人。此輩當用奴時代卽已來住。但其時富家以蓄奴獲利。一切墾闢耕耘之業。皆奴爲之。此輩既不自有資本。求勞傭之業。亦無所得。其生計之困難。不可名狀。坐是之故。更無餘力以興教育。受教育。其智識亦在水平線以

下數級。其優於黑奴者不過名義上有選舉權。稱自由民耳。此在南北戰爭前耳。若在今日。則黑人與彼等不能軒輊。近年來礦業製造業漸

興此輩之困稍蘇。然其進步究緩慢。遠不逮上級社會。此等人約居十之四。有奇。其三則黑人。黑人自解放後。有選舉權。與齊民等。然黑白之不敵。豈待論矣。黑人亦約居十之四。吾故謂南部之政治。非共和政治。而寡頭政治。抑亦非寡頭政治。不足以靖南部也。

黑人蕃殖於美國之前途。其影響將何如。此亦一問題也。千八百九十年之調查。美國黑人共七百四十七萬四

十人。最近精確之調查未見。聞約近九百萬云。適居總人口十分之一。而據米因斯密之社會統計學。日本有所論。有大足資研究者。

即自一八六〇至一八七〇年。凡十年間。黑人生產之數。比前銳減。及七十至八十年間。忽驟增。計此十年。黑

人每百人增加三十四人。有奇。白人每百人增加二十九人。有奇。及八十至九十年間。其現象復倒置。黑人每

百僅增加十三人。有奇。白人每百增加二十六人。有奇。三十年來。忽漲忽落。如波折然。其故果安在。

米氏對於此理由。未下解說。以鄙意度之。當初放奴時。彼等乍離其主。而未別得謀生之路。其慘苦為最甚。聞當

時。黑人怨林肯者甚多。曰。林君雖不殺吾曹。吾曹由林君而死。情狀可見一斑。其生不蕃。實由於此。及十年以後。

稍稍得職業。白人晚婚而少育。黑人早婚而多育。其率之驟加也。亦宜。然此不過一時耳。白人競爭力終非黑人

所能敵。且近年來。美國由農業國而進為工商業國。工商業之生產力。更非黑人所能任。故其生計復日悴一日。

而生殖力隨之。乃至由三十四人而減至十三人。何其一落千丈。至於如是也。嘻。不適之種。未有不滅。此豈獨黑

人哉。又統計家言。現今美國之黑人實減百年前三分之一云。

黑人之自由權。不過名義上耳。實則其狀態仍與前此相去無幾。現紐柯連市之黑人。非得市會之許可。不能移

住他市。南部諸省。大率皆然。蓋昔則一人一家之私奴。今則一市之公奴也。中國人則不使來黑人。則不使去。咄咄怪事。而彼等對於

舊主人亦若有戀戀不能去者。非餘恩有以結之。實餘威有以慴之也。有最可笑者一事。放奴之舉。本共和黨所主持也。既放之後。舊奴悉有選舉權。共和黨以爲吾有恩於彼。必可得其助。增數百萬票。以制勝。孰意投票之時。黑人票之全部。悉加於合衆黨。蓋南部之上等社會。悉爲其主人者。皆合衆黨。而彼等不得不聽其指揮也。彼奴性終古不改。可見一斑。

美國人有一種私刑名「靈治」刑者。以待黑人。此實文明國中不可思議之一現象也。初有農夫名靈治者。一黑人觸犯之。乃縛之而懸於樹上。以待警吏之來。吏未至而該黑人已死。後遂襲用其名。近所通用者。則焚殺是也。每黑人有罪。不經法官直聚衆而焚之。當二十世紀光天化日之下。而有此慘無人理之舉。使非余親至美洲。苟有以此相語者。斷非余之所能信也。計旅美十月。在新聞紙中見此等怪報。不下十數次。初甚駭之。及習見亦不以爲怪矣。查其統計。乃知自一八八四年以來。每年有此等私刑者。殆平均百五十七次云。嘻。俄羅斯殺百數十猶太人。舉天下以爲暴。吾不知美與俄果何擇也。

黑人之舉動。亦誠有足令人憤恨者。蓋彼等以得一接白人婦女之膚澤。雖九死不悔。往往於暮夜林薄中強污焉。畢復殺之以滅口。故靈治之案。十有九爲此云。斯固可憤也。雖然。不有有司乎。而國家於妄行靈治之人。不加以相當之刑罰。抑又何也。無他人種上之成見。則然耳。美國獨立檄文云。凡人類皆生而自由。生而平等。彼黑人獨非人類耶。嗚呼。今之所謂文明者。吾知之矣。

紐柯連市湫隘囂塵。視東方諸市。幾若異國。除市中的一大街外。其餘道路。殆與吾北京無甚差別。市中所謂下等白人者。多西班牙及法蘭西遺民。其樓屋之結構。有一種異色。土人語余曰。此西班牙風也。其市

會議堂今猶雕西班牙國徽章焉。吾來此可當遊西班牙一次。

由紐柯連至聖路易

(三十)

閏五月二十五日由紐柯連至聖路易。

聖路易。美國之第四大都會也。屬迷梭里省。人口五十七萬五千二百三十八人。華人約六百餘。有維新會團體甚堅。

明年開世界博覽會於此市。其會期本在今年。以預備未完。故改訂。否則余到之日。正開會時也。逸此機亦可惜。但遊會場一周。以當望梅。

會場外觀之宏麗不待言。但其材料皆用細木片耳。丹漆而聖飾之。則瓊樓玉宇不如也。會畢則拉雜而摧燒之云。

北京政府所派博覽會副監督黃開甲。適先余數日至。僦屋居焉。帶有工人三十餘名。時方溽暑。聖路易炎熱尤甚。其工人皆裸體赤足。列坐門外。望比鄰之遊女。憨嬉而笑。大爲市中惡少所不平。擲石唾而不絕。致一日數呼。警吏以相彈壓。嗚呼。各省攤派搜括數十萬金。以賈唾罵。是亦不可以已耶。

中國商人亦自占一區於會場中。陳華品焉。今亦在建造中。發起之者。費城之維新會員也。

六月一日行。

由聖路易至芝加高

(三十一)

六月二日由聖路易至芝加高。

芝加高者。美國第二大會也。屬伊里女士省。人口一百六十九萬八千五百七十五人。華人三千餘。維新會新成。成後一月而余至。

余在芝加高所最感動者。則文明西漸之潮流是也。文明之起源。在小亞細亞。由巴比倫敘利亞達於海濱之腓尼西亞。遂超地中海。開希臘。開羅馬。此上世紀之事也。乃駸駸瀾漫歐羅巴全陸。及於窮北。而數百年間。常向西方進行。寢假而權力中心點。專集於大西洋沿岸。此中世紀之事也。近世以來。復超海而達於大西洋。彼岸之新大陸。所謂美國。東部加拿大。東部一帶殖民地。星羅棋布。有跨窳母國之觀。凡此者。皆盡人所能道矣。此文明之傳播。由海而陸。由陸而海。由海而海。由陸而陸。而其線向恆在西。證諸美國最易見之。

當十九世紀之初。新大陸著名市府。只有紐約費爾特費波士頓及加拿大之滿地可而已。其他無足稱者。若太平洋岸一帶。全爲紅印度土人之巢窟。固不待論。卽如芝加高。號稱今日美國第二大會。全世界第四大會。其在十九世紀之上半期。猶一區區之三家村而已。豈圖數十年間。遂一躍而立於此地位。此西漸之力。最彰明較著者也。今試將百年來紐約費城波士頓芝加高四地人口之增進比較表列如下。

年	次	紐	約	費	城	波	士	頓	芝	加	高
---	---	---	---	---	---	---	---	---	---	---	---

一八〇〇年	六〇、〇〇〇	六九、〇〇〇	二五、〇〇〇	……
一八一〇年	九六、〇〇〇	九五、〇〇〇	三三、〇〇〇	……
一八二〇年	一二四、〇〇〇	一一三、〇〇〇	四三、〇〇〇	……
一八三〇年	二〇三、〇〇〇	一六一、〇〇〇	六一、〇〇〇	……
一八四〇年	三一三、〇〇〇	二二〇、〇〇〇	六三、〇〇〇	四、五〇〇
一八五〇年	五一六、〇〇〇	三四〇、〇〇〇	一三七、〇〇〇	三〇、〇〇〇
一八六〇年	八一四、〇〇〇	五六八、〇〇〇	一七八、〇〇〇	一〇九、〇〇〇
一八七〇年	九四二、〇〇〇	六七四、〇〇〇	二五一、〇〇〇	二九九、〇〇〇
一八八〇年	一、二〇七、〇〇〇	八四七、〇〇〇	三六三、〇〇〇	五〇三、〇〇〇
一八九〇年	一、五一五、三〇一	一、〇四六、〇〇〇	四四八、四七七	一、〇九九、八五〇
一九〇〇年	三、四三七、二〇二	一、二九三、六九七	五六〇、八九二	一、六九八、五七五

由此觀之。美國諸市。皆歲歲進步。不待論。而其飛行絕跡者。尤莫如芝加哥。當千八百三十年時。僅一林莽耳。四十年時。僅四千餘人。越五十年而增一百餘萬人。自一八九〇至一九〇〇年。十年間。復增七十萬人。其進步之速。真可謂冠千古而無兩也。曰惟文明西漸之力。驅迫使然故。

近年之世界博覽會。一開於芝加哥。再開於聖路易。皆文明西漸之表證也。越五年後。至一九〇七年。又將開博覽會於秣侖。則直移至太平洋岸矣。太平洋海電既成。東亞商務日益發達。十年以後。芝加哥或凌駕紐約一躍而為全美第一之市府。亦意中事也。

以學界之發達論。則當二十年前。全國中真可稱大學者。不過東方大西洋岸七八校耳。近則芝加哥大學。駸駸有凌哈佛。駕耶路之勢。而加鱈寬尼省之斯丹佛。卜技利兩大學。又絕足而馳。以云完備。雖不能無所讓於東部。以云進步。固迥非東部之所能望也。此皆文明中心。點日移於西之明證也。

初五日往觀芝加哥大學。吾遊東部所見學校既多。雖規模甚宏大者亦若數見不鮮。然且匆匆一覽。萬不能悉其內容。故余屢次所觀學校。其最感動者。則體操場圖書館規模之大而已。

體操場皆建築物。非在校外空地也。而其場中往往有可以賽馬處。可以競船處。則其建築之厯大可想矣。其體操器具之五光十色。不必殫述。

余所見各學校之圖書館。皆不設管理取書人。惟一任學生之自取而已。余頗訝之。至芝加哥大學。詢館主如此書籍。亦有失者否。答云。每年約可失二百冊左右。但以此區區損失之數。而設數人。監督之。其所費更大。且使學生不便。故不爲也。大抵失書之時。多在試驗期之前半月。蓋學生爲試驗而竊攜去。備溫習。驗畢復攜返者亦甚多云。此可見公德之一斑。卽此區區。亦東方人所學百年而不能幾者也。

美國教育之事。皆由各省自行管理。非中央政府所得干涉。政府雖設有一學報長官。不過調查報告而已。故美國國立大學。此亦一怪異之現象也。去年卡匿奇往謁盧斯福。勸立一國學於華盛頓。自認捐二千萬元。以爲之倡。盧斯福尙未全諾。現正在計畫中。想不久可成立耶。

(三十一)

初七日往西賢雪地

西賢雪地者新立之一市也。余前在東籍中見一段言社會主義之初祖聖西門以欲實行此主義故特爲一隊新殖民於美國。初至切市省失敗繼復至伊里女士省成焉。然不能有所發達但保守而已。至今猶有六十餘家奉聖西門之教不變。在美國中劃然爲一新天地云云。余未至美即欲訪之。及至芝加高聞人稱西賢雪地者頗與相類因逕訪焉。

至則非是乃一「宗教界之拿破侖」新創之市也。其人名杜威本澳洲人十三年前移住於美國其宗教與前此諸宗派大有所異。自謂獨契帝子之微言排斥異己不遺餘力而其魔術尙有一端足以聳聽者彼竊比耶穌以祈禱療病不用醫藥亦往往有奇效故教士與醫生皆銜之極至聞其至美十三年凡被認者千餘次下獄十四次。初至時無一徒黨今有七十餘萬人且徧地球各國無處無之。上海亦有其教會公款至千數百萬金以上云。洵一奇才也。

西賢雪地者僅一年半以前所成立杜氏欲聚其教徒成一地上之天國因自相地得此以一百萬元購之遂闢新市僅一年半而市民已有二萬餘現來者尙接踵但土木不能速就耳蓋彼教不許吸煙飲酒入其市犯此者罰二十五元故工人就之者希云市內惟有一商店百物俱備惟有一旅館以供寄居者其餘百端事業皆獨一無二其斷絕競爭實行干涉頗有類社會主義者余初至時甚疑其爲該黨人之實行細詢乃覺不類蓋其市中惟土地及兩大工廠一銀行屬公有財產其餘各種事業仍歸各私人惟無同業之競爭而已實亦非強禁之彼輩自好爾爾也其租稅惟「一有所得稅」之一項無論執何業者以其所得什之一歸教會故教會之富歲增

不可紀極。

其市一種親愛清明肅穆之氣。實有令人起敬者。據市中人言。立市以來。年餘未嘗有一次之訟獄。以二萬餘人。麴居一市者。年餘而訟獄不一見。亦真可謂異數矣。

余至匆匆數點鐘。即返芝加高。蓋相距幾一時許也。是日杜威不在市。未見之。及暮彼歸。聞余至。乃大驚。飛雷來芝加高。務請再一臨。使彼盡地主誼。余既奇其人。亦欲一見。初七日再往焉。

至則杜威以軍樂迎於驛站。導至其家。款待殷勤。不可名狀。其人美髯鶴立。目光閃人。一望而知爲一大人物也。是夕彼請余至其教堂演說。聽衆六千餘。彼言現在教堂之宏敞。專指容衆之多在全世界中。此爲第二云。余演說後。杜

威自演三時許。其音之雄壯。余生平所未聞也。辯才亦橫絕一世。其所以起平地而成此大業。蓋有由也。彼演說畢。語余曰。吾將以上帝之能力示足下。余靜聽之。彼呼於衆曰。諸君中誰是曾經有病爲上帝療治得愈者。請起

立。衆起立者過半。余思之。彼若與其人作弊以誑余。豈能盡數千人甘心爲其作僞之奴隸。此必真事也。度生理學與心理學有一種特別之關係。現今未能盡發明者。而迷信之極。其效往往能致此。此亦非可駭之事。前上海

某教會所譯治心免病法一書。固略言之耳。但彼益實行之而見效耳。彼則以爲非己之能。皆上帝之力。故其徒咸信之。謂爲「先知」。舊約全書謂耶穌以前諸賢皆先知復生云。顧吾所最不解者。彼教會中下等社會人固多。其上等社會亦

不少。余在彼所見。某甲則芝加高大學教授。某乙則法學博士。某丙則醫學博士。某丁則芝加高國民銀行總理。凡此輩者皆非易被魔惑之人。而何以竟信之若是。其人之材略。必有大過人矣。現彼日日闢新市。聞今年又將

在太平洋岸開一第二之西賢雪地云。其教徒殆每月以幾何級數增加。竊意此人如不死。十年以後。其勢力必

占美國一大部分。請懸吾言以俟之。

此人野心勃勃。大有并吞宇內之概。現四處行其教。明年元旦即復起行往英國。欲開第三之西賢雪地於歐洲。云其竭誠盡敬以歡迎我也。凡欲藉我爲擴張勢力於中國之地也。彼運動我入其教。且明言之。謂十年以內必有一西賢雪地見於中國云。吾信其力能致是。使其致是。則洵大可畏。此君之魔力。不可思議。吾謂現今全美。國惟摩爾根與彼兩英雄耳。

彼之教理亦有大可佩者。疇昔景教者流。皆言末日審判時。善者信者永生極樂。惡者不信者永死沈淪。杜氏謂不然。上帝無使人永死沈淪之理。今之惡者不信者。特機緣未熟。迷而不返耳。要其善根固在。至末日審判時。雖以極惡之人。一覩上帝之靈光。亦必大徹大悟。至彼時終得與善信者同立於平等之地位。蓋上帝之條。本重悔改。悔改者前惡盡消也。云云。此其義與佛教大乘法全合。所謂一切衆生皆成佛。即其義也。此亦杜氏獨到處。宜其有以立足也。此人或爲第二之馬丁路得。亦未可知。顧吾終覺其權術過於道力耳。

(二十三)

芝加高之大屠獸場。

實托辣斯

稱世界第一。余往觀之。內職工九千餘人。一豕之所產出物品。凡百三十餘種。一牛所

產出物品。凡百四十餘種。該總理語余云。諸獸所不能利用之部分。惟屠殺時所失之呼吸氣而已。其副產物。

見前

論托辣斯章

之所值。視正產物即牛肉豕肉之類。四倍有餘云。一點鐘內可屠三百五十餘牛。自繫屠以至裝罐一切妥畢。

芝加高舊博覽會。現留存一座以爲紀念。余往遊之內。所藏希臘羅馬古跡之模範品甚多。

芝加哥之公園。風景冠絕全美。蓋湖沼多以水勝也。「林肯公園」清幽殊絕。「華盛頓公園」前臨墨西哥湖。有氣吞雲夢波撼岳陽之概。余絕愛之。嘗往遊。忽遇暴風雨。登湖樓憑眺。白馬吼突。海天無際。真壯觀也。成一詩。黑風吹浪魚龍舞。白日沈天鷹隼豪。何意迷漫金粉地。登樓猶見廣陵濤。

十三日行。

由芝加哥至汶天拿省

(三十四)

六月十四日至懇士雪地。

懇士雪地者。美國第二十二大都會也。人口十六萬三千七百五十二人。華人約二百。維新會早成。余至此僅一宿。演說以外。不能多有所觀察。

十五日晚由懇士雪地起行。北進入汶天拿省。乘大北鐵路之汽車行。

大北鐵路者。亦美國近十餘年來之進步一大關係也。其東方起點自米尼梭達省之聖保羅市。此市亦有維新會。華人百餘。余未及至。橫貫南北達哥他省汶天拿省華盛頓省以達於太平洋岸之舍路市。線長六千餘英里。現新大陸之鐵

路中除加拿大太平洋鐵路外。以此路爲最長。而在美國境內則此爲第一也。自十五年前。此諸省者。皆一望林莽。獸蹄鳥跡相交錯。時或有一二紅印度人持石鐵手鑽燧相與出沒而已。以美國東南部一帶富源尙未盡闢。資本家惟擇已開之地。日相爭競。而此西北一帶。莫或過問。時則有一英雄曰占士比兒。具遠識。懷大略。謂此荒

棄之地利實足爲美國前途增無限勢力。汲汲謀拓殖者有年。雖然比兒固窶人子。衣食尙不自給。年二十餘。尙在密士瑟必河畔爲一挑夫。每日得一二元之工價。僅以餬其口。以勤慎之故。漸升爲一鐵路公司之代理人。如是者二十年。至千八百七十五年間。彼乃發表其意見。謂自聖保羅至舍路築一大鐵路。(一)可以闢無窮之寶藏。爲一國前途之大利。(二)可以通美國東西兩部。使聯絡日固。(三)可以與東洋航路銜接。爲擴張美國勢力於東方之地步。雖然以蒙茸林莽人跡不到之地。投數千萬金之資本。尋常無經驗之人所最怖也。且其時之比兒氏。人微言輕。不足以動衆。其獨力之資本。又不克任。於是聞者皆目笑存之。如是者又十餘年。而比氏氣不少衰。日日運動。漸至聳一世觀聽。直至千八百八十七年。而此大鐵路之計畫。乃實行。閱五年而路成。美國諸鐵路中。其工事之艱難。殆莫過於此路。其所經過者。有全洲最大之落機山。有大森林。有大湖沼。穿無數之大隧道。與積雪戰。與堅冰戰。與酷日戰。與瘴霧戰。與猛獸戰。與土蠻戰。乃至與飢渴戰。與死亡戰。其工程之幾中止者屢矣。比兒氏卒以堅忍不拔之力。冒萬苦。排萬難。以底於成。嘻。亦偉人哉。鐵路一成。而數萬年來。鴻荒黑闇之天地。遂放大光明。至是而此數千里之荒原。不十年間。而千數之大村落。百數之大都市。彈指湧現。歲歲產七千萬石以上之小麥。供給世界市場。其餘物產亦稱是。至今全世界農業制度最完美之區。惟此爲稱首。而比兒氏在此諸省中。其受崇拜也。幾與華盛頓同。尊之曰「大北之父」。華盛頓有稱曰「國父」之稱。嘻。豈不亦人傑哉。余在汽車中。見有「大北鐵路歷史」一書。美國各汽車中皆有圖書室。窮日之力讀之。覺其關係如此其雄深。其人物如此其偉大。故記其崖略如右。

大北鐵路之經營日益盛。今復造世界第一之大汽船。以握太平洋航路之權。其影響於我中國者最大。下章更論之。

十六日至比令士演說一晚行。

十八日至笠榮士頓演說兩晚行。此兩地皆屬汶天拿省。

汶天拿省華人數不過二千餘。分屬十餘市。而維新會發達最盛。有會所之市十二焉。余不能盡歷。惟至比令士、笠榮士頓、表雪地、氣連拿、數市。附近各市之同志。皆走集相見。

笠榮士頓爲全美國最高之都市。蓋在落機山之大半麓矣。余至是適患小恙。同人勸浴於溫泉。泉距笠市二十餘里。落機深處也。風景幽絕。塵念頓消。余浴三日行。得詩數章。

名山穆穆日如年。獨步長歌復醉眠。亦是茲遊一奇絕。落機深處浴溫泉。

瀉潭飛瀑何太急。棲壑片雲長自閑。安得風塵棄我去。年年攜酒看青山。

九萬里中得三日。二十年間此一回。猛憶過去未來事。清明膚寸現靈臺。

落機山中有黃石園者。周遭八百里。實全世界第一大公園也。聞奇景最多。有種種定期之噴泉。或一日噴一回。或一日噴三四回。或隔日噴一回。或一來復噴一回。或一月噴一回。皆有定期。靡差靡忒。園中熊最多。皆馴擾不犯遊客。園中禁射獵。每歲只有半歲可遊。餘日積雪由聯邦政府派兵一小隊守衛之。遊客不得攜鎗械。惟今年總統盧斯福來遊。曾破例許獵一熊以歸云。園距笠市僅半日程。惟往遊非半月不能探其勝。余無此暇晷。僅購影畫數十枚。當臥遊耳。

二十二日到表雪地。華人六百餘。甚瘠苦。多以西人餐館爲業。數年前工黨用強制手段。不許西人就食於華人餐館。因此損失甚鉅。全市爲之寂寥。此事屢以國際交涉。提出於美政府。莫能伸也。全美中待華人最酷者。此市

爲第一

二十六日到氣連拿。實汶天拿省之省會也。華人六百餘。以軍樂相迎。極一時之盛。至夕。其總督來相訪。頗殷勤。總督士蔑氏。良喜華人。此市與表雪地相距不過百餘里。而吾民之舒蹙迥殊矣。

汶天拿省人雖少。而維新會之開最早。且最普及。其中熱誠之士數輩。堅苦刻厲。令人肅然起敬。

汶天拿省以西人最相凌侮。故維新會別立一聯衛部。專貯積公款。爲相周相救之用。法甚密。意甚美。現各屬多有踵效者。

二十八日爲今上萬壽節。在汶天拿省遙祝焉。附近各市皆各出代表人至。一同慶祝。且議本屬各支會改良進步之法。

二十九日行。

由汶天拿省至舍路砵命

(三十五)

二十九日至博奇梯拉。余本不欲下車。有鄉人數輩苦相邀。乃一宿焉。此地華人百餘。有維新會。有會員。而無會所。余匆匆演說一次。亦未能睹其成。

此市紅印人最多。政府設法保護之。俾免絕種。每來復頒食一次焉。余至日適遇頒食之期。全市闔塞。其衣皆紅綠兩色。爲種種式樣。以文其身。各以一木箱負其嬰兒。詭形殊狀。見所未見。亦一眼福也。

當維廉濱初至美時。濱士溫尼省之土人。殆二十餘萬云。其餘東部各省亦稱是。其總數雖不可全考。史家謂總在三四百萬以上云。觀殖民時代與歐洲人種之血戰。可見一斑矣。十七世紀之中葉。土酋有名腓力者。驍勇絕倫。統率諸部與白種爲難。各殖民地乃設總會於波士頓。共同捍禦之法。則其勢力之大可想。其後英法七年戰爭。法人亦勾連土人大擾英屬地。卽華盛頓之將略。始亦以攻勦土人著者也。是時新英蘭附近諸地。土人如織。乃曾幾何時。至今落機山以東。無復一土巢矣。余行半年。走萬里。欲求一遺民之跡。不可得見。据千八百九十年統計。謂全國今尙有二十四萬八千二百五十三人云。率皆被迫逐竄於西部。今則西部亦日闢。深山大澤。悉化塵市。無復寸土以容此輩。今此十三年間之銳減。又不知若何。要而言之。若三十年後。再遊美國。欲見紅印度人之狀態。惟索諸於博物院中之繪塑而已。優勝劣敗之現象。其酷烈乃至是耶。君子觀此。膚粟股栗矣。

三十日至片利頓。博奇梯拉片利頓同屬埃的荷省。片利頓華人約五百。有維新會。

七月初一日至碧架雪地。華人百餘。吾族人居三之一。有維新會。甚鞏固。亦以軍樂迎。會所遍結電燈焉。

初三日至貝市雪地。華人四百餘。有維新會。亦以軍樂相迎。余至是。飛信前途諸市。屬毋以軍樂。實不克當。且耗費無益也。

初五日至抓李抓鱗。屬華盛頓省。亦西部一新興市也。華人將及千。有維新會。開會甚早。而團體最固。至可欽敬。此市華人多從事農業及飲食店。光景頗佳。白人則俄羅斯移住者甚多云。

以上諸市。皆匆匆稅駕。不能有所觀察。筆記甚略。

(三十六)

初八日至舍路。舍路者華盛頓省第一大會。而太平洋岸重要之港口也。大北鐵路以此爲終點。日本郵船會社之太平洋線亦以此爲終點。日本人在美國者以此市爲最多。華人亦約三千。美國境內維新會之開。以此市爲嚆矢云。康同壁女士與家弟啓勳同來美遊學。適至此市。相見甚懽。余至舍路所最感者。莫如大北鐵路公司之經營東亞政策。今略記之。

余甚陋。不知世界。自庚子年由印度櫻伽島航澳洲。乘英國 P. & O. 公司之船。總容積九千噸者。余喜愕不知所爲。又從該島港口見德國公司船容積一萬一千噸者。余愈喜愈愕。去年見美國航太平洋之「高麗」。「西伯利亞」兩船。寄泊橫濱。聞其容積一萬八千噸。余愈喜愈愕。今次遊美。矢願附之。而船期適不合。往來皆相左。余憾焉。頃到美國。乃復聞有大北輪船公司造絕大汽船之事。

大北輪船公司者。大北鐵路公司之子孫也。初美國西北一帶。長林蔓草。人跡杳絕。自千八百七十九年。有占士比兒者。始排萬難。以建一橫絕大陸之鐵路。自是美國太平洋北岸一帶。日趨繁盛。遂闢今之柯利根華盛頓兩省。而此鐵路公司亦享莫大之利益。至於今年。乃益爲壘斷太平洋航權之策。造絕大之汽船。以往來於中國美國日本之間。自一年前已在美國東方造船公司定製姊妹船二艘。其一名彌奈梭達者。以本年四月十二日竣工。明年一九〇四年元且自華盛頓省之舍路港起航云。其他一艘尙未命名。約以明年四月竣工。而將來辦理獲利之後。尙擬更造多艘云。據砵命市之北美叢報所記則。

彌奈梭達船長六百三十英尺。幅七十三英尺。吃水三十六尺半英尺。排水量三萬七千噸。內容一等客位百五十人。二等三等客位各百人。下等客位一千人。除外仍可容軍隊一千二百人。船中職役人等三百人。共容

二千八百五十人。載貨物二萬噸外。尚容煤七千噸。速度一萬一千匹馬力。現在世界中商船之大。此爲第一。二十世紀之世界。商戰世界也。而商戰之勝敗。惟視其在泰東市場。即中國及東亞諸國所占之地位何如。此又盡人所同認也。自千八百六十九年。蘇彝士運河開通之後。歐亞之距離。雖已縮短。然以視美國之由太平洋直達者。其利便仍遠有所不逮。今略比較之。則從歐洲經蘇彝士河東來者。以法國之馬賽起計。到香港凡七九〇二海里。到馬尼刺凡七九〇六海里。到上海凡八七五八海里。到橫濱凡九四七六海里。若由美洲渡太平洋而來。以舊金山起計。到香港凡六〇八七海里。到馬尼刺凡六二五四海里。到上海凡五五五〇海里。到橫濱凡四五六四海里。然則美國之地勢。已占世界商戰上優勝之位置。明甚矣。而前此太平洋航業所以未甚發達者。則有三故。其一由美國之力。尙未膨脹於外也。其二由東亞諸國之貿易尙屬幼稚也。而猶有第三端焉。則以太平洋海程太遠。中間無貯煤港以爲之接濟。故當啓輪以前。應用之煤。必須備足。載煤多而載貨之餘地自少。故其遜於蘇彝士航線一着者以此。

以故欲以太平洋線航利。壓制他線者。勢不得不用大船。非以其洋之大而然也。蓋其船必容三千噸以上之煤。而不覺其太多。然後可以利用太平洋。查十年來海運發達史。當千八百九十二年。全世界中四千噸以上之船。凡二百六十六。八千噸以上之船。凡八。至千九百年。四千噸以上之船。凡八百十二。八千噸以上之船。凡六十四。船舶容積之增大。與商戰之進步。最有關係焉。然此卽太平洋飛躍之一先聲也。

竊嘗論之。將來太平洋航業發達日盛。則蘇彝士運河之地位。必將一變。而其勢力亦大有所減。何以言之。試觀近年來歐亞間之郵政。已不由蘇彝士。而由太平洋。彼蘇彝士通航之船。非不密也。而願若此者。遲速之異也。夫

自歐洲各都市經蘇彝士以達亞東。至速亦須三十二日。若由大西洋踰美大陸道太平洋而來。則柏林以九日。巴黎以八日。倫敦以七日。即可達紐約。紐約以四日。零三點鐘達舊金山。舊金山至上海。若以每點中行十七海里之船。則十六日可達。郵政之舍彼就此。蓋有由也。故使太平洋之航業。有大船以發達之。則將來不惟於郵政爲然。於貨物亦然。蓋商戰者以自圭之勇。慶忌之捷。而制勝者也。人之樂去遲而就速勢也。況蘇彝士河之經過。必須納稅。平均每噸在三圓以上。久爲商家之所苦乎。以此言之。則今者大北輪船公司之計畫。可謂扼天下之吭而拊其胸。將來此輪船之成效日增。即彼大北鐵路之進步日盛。占士比兒亦可稱近世商界之小拿破侖哉。吾國人於實業思想。毫未發達。聞吾喋喋論此。不隱几而臥者希矣。雖然。此太平洋上之航權。實我國應染指者也。而以吾招商局開設四十年。曾無絲毫之遠慮。而其餘商人。亦更無有起而圖之者。吾儕亦復何顏以責備政府耶。吾記此吾有餘悲。吾猶有餘望云爾。

在舍路三日行。

(二十七)

十二日至秣侖。秣侖屬柯利根省。亦太平洋岸一要港也。華人約五千。維新會最盛。西北部諸市以爲總鎮。余將至秣侖會中。特號召各市出代表人來赴會。至者二十餘市。一時稱極盛焉。余在市數日。日接見同志。於他事觀察殊少。

在秣侖讀新聞紙。忽見巴拿馬市民宣告獨立之事。僅三日而美國公認之。此實向來革命時代國際史所未聞。

也。越兩來復。而美國政府遂與巴拿馬革命政府結條約。以巴拿馬運河開鑿之權讓於美國。而美政府以金二百萬磅爲報酬。且每年以金五萬磅給巴拿馬新政府。約遂定。於是哥倫比亞政府責言焉。哥倫比亞國者巴拿馬舊所屬也。國務大臣約翰海氏覆牒曰。若哥倫比亞必欲破此條約。案指運河條約。則或至破兩國之國交。恐我議會不復能附於哥倫比亞。相爲親友。云云。國際上用語。其傲慢無禮。至是而極。美國與哥倫比亞。雖有大小強弱之殊。以國際法論之。固皆對等之獨立國也。使哥倫比亞以此施諸美。美人將何以待之。若今之哥倫比亞。則吞聲泣血而已。俾士麥曰。公法不可恃。所恃者惟赤血耳。黑鐵耳。吾觀於美國對於巴拿馬之政策。歎歎累日而不能自禁也。昔英相的士黎里。以一夕祕密之交涉。遂舉五千萬蘇彝士運河之股票。從埃及王室之手。而移諸英國政府之手。當時全歐震動。謂爲神奇。今次約翰海之敏腕。毋乃類是。嗚呼。強權世界之外交家。可畏哉。可畏哉。英自收蘇彝士河股份票。而英霸東方之局遂定。美自得巴拿馬開鑿權。而美伯東方之局亦遂定。以二千萬易此最高之地位。天下古今之物品。其代價之廉。當未有過此者。

今者名義上。巴拿馬爲一獨立國。且爲萬國公保之中立地。但其實際如何。不待知者而決也。美之巴拿馬。猶英之埃及也。余至日本。余乃見吾國革命家所出之報紙。謳歌巴拿馬革命者。不可勝數。僉曰。吾同胞何不如巴拿馬。吾同胞其學巴拿馬。嗚呼。吾同胞而欲學巴拿馬也。則亦何難之有。新政府之歲給。尙可以什伯倍於五萬磅。吾敢斷之。

在休倫讀舊金山華文報紙。知有我領事館一隨員譚某。爲西美國警吏辱毆自戕之事。余深爲國體痛。作輓詩

三章。稿不存其一。首不復記憶。

丈夫可死不可辱。想見同胞尚武魂。只惜轟轟好男子。不教流血到櫻門。
國權墮落嗟何及。來日方長亦可哀。變到沙蟲已天幸。驚心還有劫餘灰。

八月初三日行。

由砵命至舊金山

(三十八)

八月初五日由砵命至舊金山。

舊金山本名三藩蘭斯士哥。日本人通譯作桑港。華人呼以今名。屬加罈寬尼省。美國現今第九大都會。而華人最多之地也。人口三十四萬二千七百八十二人。華人約二萬七八千之間。維新會成立最早。注籍會員者約萬人。余至時。以軍樂歡迎。盛況更過紐約。感謝無量。

吾以爲欲觀華人之性質。在世界上占何等位置。莫如在舊金山。何以故。內地無外人之比較。不足以見我之長短。故在內地。不如在外洋。外洋華人所至之地。亦分兩大類。一曰白人少而華人多者。白人爲特別之法律以待我。如南洋諸區是也。二曰白人多而華人少者。我與彼同立於一法律之下。如美洲澳洲諸區是也。其第一類者。與內地幾無以異。故亦不足研究。所研究者。第二類而已。第二類之中。其最大多數之所在。莫如舊金山。故吾欲以舊金山代表此問題。以吾所見。則華人所長者如下。

一 愛鄉心甚盛（即愛國心所自出也）

一 不肯同化於外人。(即國粹主義獨立自尊之特性。建國之元氣也。)

一 義俠頗重。

一 冒險耐苦。

一 勤儉信。(三者實生計界競爭之要具也。)

其所短者如下。

一 無政治能力。(有族民資格。而無市民資格。)

一 保守心太重。

一 無高尚之目的。

今請先敍其情狀。次乃論其性質。

余所至之市。凡二十餘。其人數約如下。

紐約及其附近

約八千

哈佛

約一千

波士頓及其附近

約四千

費城

約一千

華盛頓

約五百

波地摩

約六百

必珠卜及其附近

約九百

先絲拿打

約一百

紐柯連及其附近

約一千

聖路易

約六百

芝加高及其附近

約三千餘

懇士雪地

約百餘

汶天拿全省

約二千

埃前荷全省

約二千

砵命及其附近

約一萬

舍路及其附近

約三千

舊金山及其附近

約三萬

羅省拔利

約五千

自餘未至之地，所至者尙不止此，數其小埠略之。約尚有五萬餘人。大約我同胞在美國者，通計不過十二萬人內外。今舉其重要之職業如下。

洗衣業

約四萬人

漁業

約萬餘人

廚工業(僮僕業附).....約二千人

農業.....約四千人

工業
採礦業.....約千人

製靴業

織帛業.....約二千人

捲煙業

通事業.....約五百人

商業
雜貨店
中國雜貨.....約五千人(儲夥在內下同)

日本雜貨.....約千餘人

成衣(西服).....約二千人

裁縫店
褻服雜件(婦女所用).....約千人

飲食店
華式.....約二千餘人

西式.....約二千人

醫生.....約二百人

傳教.....約二百人

雜
學生.....約二百人

婦女

約二千人

兒童

約三千人

無業者

約萬人

以上所列，非有精確之調查，但舉其概耳。

洗衣業實在美華人最重要之職業也。東部諸省，十有九業此。其工價最廉者，每禮拜美金八九元。（約每月合華銀七十元）最昂者，每禮拜二十元。（約每月合華銀百六七十元）以此至賤之業，而庸率如此其大，故趨之若鶩。

漁業惟太平洋岸諸省有之。舊金山舍路林命其大宗也。南部紐柯連亦間有。此業最苦，每年只有半年作工。其半年則坐食，其工價亦不昂。業此者其資本主皆西人。華人有一人為工頭，代彼招工。工人當坐食時，常先支其工價之半額。漁畢而歸，復支半額，故常僅餬其口而已。其採漁之地，或在附近海岸，或遠適他島。其最遠者，乃至亞拉悉加島。輪船約行十一日，漁者多川帆船往，往月餘。南部漁業，則皆華人為資本主。

廚工業各地皆有。東方稍盛。在西人家中，或旅館司庖者也。其工價優於洗衣業者三分之一，實最優之業也。農業惟加鱒寬尼省有之。餘則甚稀。此業不如洗衣工，然頗有獨立之姿。大率賃地而耕。華人自為資本主，賃地而儲數人至數十人，所種殖以蔬果為大宗。

採礦業前二十年加鱒寬尼最盛，今則無有矣。現惟北中部之洛士丙令等埠，南部之切市省，尚有一二。其工價甚苦云。余未至其地。又前此鐵路業為華工一大宗。蓋西部諸大鐵路皆成於華人之手，今亦無有矣。

製靴捲煙織帶三業。惟舊金山有之。他處無有。此三業前此極盛。資本主亦華人。華商以此致富者不少。後工黨妒之甚。設種種法律相脅制。如呂宋煙非經政府蓋印者不能出售。而政府於華工所搃者不蓋印。是其例也。此等事本大悖國際私法。蓋禁華工猶可言也。華工既經政府許其住美境者。而爲特別之法律。以奪其執業之自由。不可言也。豈有他哉。亦曰強權而已。使我政府而以民爲念者。仗義執言。彼無以爲難也。而惜乎非其人也。現此業日衰微。行將絕跡矣。

通事業在小法衙中或稅關或律師處爲繙譯者也。其工價自較尋常稍優。然此輩大率皆非端人。在各市中頗有權力。而鄉人最恨之。

中國雜貨店之業。在各市中最有權力者也。其與各工人。殆有貴族與平民之關係。凡一切關於公共團體之事。皆取決焉。然絕不能與外人爭利權。惟吸工人之脂膏以爲養。且業此者十有九兼業賭。以生計學理論之。實分利者也。其與外國貿易。惟爆竹草席糖果等爲大宗。絲類亦間有。茶則絕無。其輸出貨洋參麵粉兩項稍有之。然有外國貿易者。不過二十之一而已。

日本雜貨店則取外人之利者也。以日本磁器漆器絲類爲主。中國雜物亦間有。其獲利不能甚豐。各地皆有之。裁縫業有二種。一爲做西裝外衣者。一爲專用絲類做西婦裏衣及約領面巾諸雜項者。西部諸省砵命舍路舊金山等處最盛。其餘頗少。此業獲利亦不菲云。

飲食店有二種。一爲華式者。東部諸省最盛。芝加高以西則無有矣。此業自李合肥至後始有之。卽所謂「李鴻章雜碎」者是也。其利殊豐。他業無足以比之者。現紐約市將三百餘家。波士頓費城等市各數十家。芝加高市

有一家而投資本十萬金（華銀）者。陳設皆用華式。門如市焉。一爲西式者。則尋常餐館是也。華人可較西人價廉。故或在一二市爲獨占焉。汶天拿省。埃的荷省。此業最盛。柯利根省次之。餘則甚希。

醫生亦爭利權之一法門也。西人有喜用華醫者。故業此常足以致富。有所謂「王老吉涼茶」者。在廣東每帖銅錢二文。售諸西人。或五元十元美金不等云。他可類推。然業此之人。其不解醫者十八九。解者往往反不能行其業云。

傳教者各市皆有。亦衣飯碗之一端也。

學生近漸發達。下節別論之。

婦女兒童西部多於東部。然美洲大率皆求食而歸之人。與南洋及檀香山頗異。眷屬甚少也。娶西女者亦約二十之一。

無業者居一大部分。此實最怪異之現象也。此等無業者之中。其年老不能做工又不能歸去者。約十之一。其餘壯而遊手者。約十之九。其老不能歸者前此必亦壯而遊手者也。彼等何以爲業。則賭其一大宗也。在美洲之華人。幾無復以業賭爲

恥者。謹厚君子亦復爲之。真可異矣。以華工所入。每人每年平均可得千金。然其能齎以返國者。不及十之一。皆賭害之也。雖然。賭亦爭外利之一道。如溫高華舍路諸埠。賭客之大部分爲日本人。每年貢於我者。埠各十餘萬。舊金山埠之番票。西人賭白鴿票者別爲賭館以待。與華人不和。雜廁各埠皆有。當最盛時。西人之賭金。將三百萬美金。今猶五十萬美金云。

以此等文明播諸彼國。亦無怪人之相惡焉矣。

華人團體最多者度未有過於舊金山焉矣。試分類列之。

(甲) 公立之團體。

(一) 中華會館

(二) 三邑會館 (南海番禺順德)

(三) 岡州會館 (新會鶴山)

(四) 寧陽會館 (新寧)

(五) 合和會館 (新寧之余姓者及肇慶府屬之一小部分)

(六) 肇慶會館 (肇慶府屬之大部分)

(七) 恩開會館 (肇慶屬之恩平開平)

(八) 陽和會館 (香山)

(九) 人和會館 (客籍)

(十) 六邑同善堂 (不詳其縣)

自(一)至(九)是爲八大會館

以上諸團體皆有強制的命令的權力。凡市中之華人，必須隸屬各縣之人隸屬於其縣之會館。全體之人，皆隸屬於中華會館。無有入會出會之自由。故曰公立者。

八大會館與中華會館之關係，頗似美國各省與聯邦政府之關係。美國先有各省後乃有聯邦。彼亦先有各會

館乃有中華會館。美國聯邦政府成立後，尙加入三十餘省。彼亦中華會館成立後，加入兩會館。合和恩開乃後加者。美國聯邦政府初建時，其財政不能獨立，由各省供賦之。彼八大會館之於「中華」亦然。質而言之，中華會館之地位，與美國獨立後立憲前十年間，美以一七七六年獨立，以一七八七年立憲。費爾特費之總政府絕相類。今各會館皆有伯里璽天德（卽主席）惟中華會館無焉。有事集議，則八主席同到。其印則八家輪掌之。經費則八會館攤派。其大邑派一份半或兩份。如三邑寧陽，岡州之類。其小邑派一份乃至半份。如其餘五家。一切大小事，大率決於各邑之本會館。苟非關於華人全體之利害，或甲乙兩邑交涉者，不集「中華」其會館之財政，則

（一）捐助 初建時有之，近則甚希。

（二）出口稅 此最重要之部分也。其法凡歸國者每人須納出口稅若干於會館。由各邑會館派委員在船頭收之。不納者不能上船。此例蓋得政府之許可云。不納者可呼警吏索之。其所收或三元四元至五六元不等。由各會館自定。惟不論所收多寡，概以一元半納於中華會館。此「中華」經費所由出也。此出口稅惟教民抗不納。教會別以出口票給之。而警吏許其自由云。嗚呼，亦可以觀世變矣。

（三）祝稅及醮金 各會館皆祀關羽。每歲課司祝者稅若干，多或至萬金焉。又一年或兩年建醮一次。各商戶各私人皆捐醮金。所捐必逾豫算之額。因存積之以爲會館基本金。

此其歲入之部也。其歲出之部則無定。不能詳知之。其最奇者，則各會館必在內地請一進士舉人秀才其人者爲主席。是也。此費每歲例須千餘美金。多或二千餘。其人或三年或兩年或一年滿任。一語不能解，一事不能辦。

惟坐食而已。時或武斷而魚肉之。鄉人莫之敬莫之畏。然亦順受也。人人知其有害無益。而莫肯改革者。此殆所謂天然之奴性。非有一人焉踞其上者而不能自安歟。

中華會館之歲出。則以請一西人律師居其大部分。此卻是不可少之事。但得其用者亦實希耳。中華會館出口稅所入不敷歲出。往往使各會館攤派。

凡外洋之粵民。皆有所謂三邑四邑者。是最怪事。所謂三邑。則南海番禺順德也。所謂四邑。則新會新寧恩平開平也。會寧屬廣州府。恩開屬肇慶府。而會寧之人呢其異府之恩開。而疏其同府之南番順。豈非異聞。推原其故。則言語之同異爲之也。新會新寧之語在省會幾無人能解。恩開則甚相近。三邑四邑。殆如敵國。往往殺人流血。不可勝計。非直金山。卽他埠亦然。嗚呼。國語統一之法之不可不講也。如是夫。

舊金山之四邑。又分爲五會館。視前表自明。其分裂之法極可笑。最奇者則余姓。又自外於新寧是也。其故皆由人多之縣。不欲與他縣合并。人多之姓。又不欲與他姓合并。金山最多人之縣爲新寧。新寧最多人之族爲余氏。此亦其無政治能力之一大徵證也。小羣可合。而大羣遂不能合也。

(乙)公共之慈善團體。

(一)東華醫院

(二)衛良會

此皆與中華會館同。全市所公立。不以邑姓等分者也。惟入否聽人自由。

(丙)商家團體。

(一) 昭一公所

(二) 客商會館

初時本惟有昭一公所。創立實在各會館以前。其目的則防同業之競爭。相與劃定物價。且調停各商家種種交涉者也。後三邑四邑相閱。於是四邑人別爲客商會館。而昭一專屬於三邑。其岡州人則分屬焉。

(丁) 各縣之慈善團體。

(一) 福蔭堂 (南海)

(二) 昌後堂 (番禺)

(三) 行安堂 (順德)

(四) 保安堂 (東莞)

(五) 福善堂 (香山)

(六) 同德堂 (新會)

(七) 餘慶堂 (新寧)

(八) 仁安堂 (增城)

(九) 同福堂 (恩開)

尚有數家不能盡記

此等團體最奇。其目的甚簡單。僅爲客死於外者運骸骨歸耳。葬祭之禮。本吾國所最重。此實原於宗教之習慣。

也。狐死首丘，亦愛國之情之一端。然愚亦甚矣。每運一骨歸，動需數百金。故此類之團體，蓄積甚厚，少者數萬，多者如番禺之昌後堂，現存三十餘萬金云。其財政大率於會館出口稅帶徵之。嘻！以此款興學校，蔚然成一大學矣。

(戊) 加前之團體。

(團體名)

(姓別)

(團體名)

(姓別)

穎川堂

陳

榮陽堂

鄭

隴西堂

李

馬家公所

馬

江夏堂

黃

西河堂

林

忠孝堂

梁

沛國堂

朱

盧江堂

何

胥山堂

伍

風采堂

余

清白堂

楊

彭城堂

劉

武陵堂

龔

天水堂

趙

高密堂

鄧

清河堂

張

南陽堂

葉

隴西堂

關

愛蓮堂

周

光裕堂

譚

安定堂

胡

三省堂

曾

寶樹堂

謝

由是觀之。以二萬餘人之衆。而此種團體如此其多。則族制思想之深入人心。可以見矣。此種團體在社會上有非常之大力。往往過於各會館。蓋子弟率父兄之教。人人皆認爲應踐之義務。神聖不可侵犯者也。故雖以疲癯之長老。能馴桀驁之少年。舊金山所以維持秩序者。惟此攸賴。其同姓之人。相親相愛。相周相救。視內地更切密。固他鄉之感情。例應爾爾。然亦由有宗教之理想。以盾其後也。我梁氏本爲粵巨族。族人在美洲者將萬焉。所至各市。忠孝堂伯叔兄弟皆爲特別之歡迎。致可感也。族制不奇。最奇者則有所謂聯族是也。今舉如下。

(團體名)

(聯族)

龍岡公所

劉、關、張、趙、

至德堂

吳、周、蔡、

遼原堂

雷、方、鄺、

篤親公所

陳、胡、

昭倫公所

譚、談、許、謝、

鄰德堂

盧、羅、勞、

世澤堂

鄧、岑、葉、白、

鳳倫堂

司徒、薛、

或尙有而爲吾所未能盡知者

此真不可思議之現象也。彼等之相親相愛，相周相救，與同姓無以異也。彼等子弟率父兄之教，與同姓無以異也。關氏子弟率劉氏父兄之教，吳氏子弟率周氏父兄之教，他皆類是。推原其故，殆由小姓者爲大姓者所壓，不得不採聯邦之制，以爲防禦之法。於是求之於歷史上，稍有相屬者，則從而聯之。如吳周蔡蓋，謂同出於姬姓也。如陳胡蓋，謂同爲舜後也。如鄧岑葉白蓋，謂同爲楚之民族也。此等之理想，頗有趣味。吾在金山演說，嘗言之，謂推此等聯族之思想，當知我四萬萬人皆同出於黃帝。既知同出於虞舜者，當相親同出於周后稷者，當相親，曷爲舉同出於黃帝者而疏之。彼輩皆解頤若深領者，然至最奇者，若劉關張趙，則演義的歷史之思想，以下等社會之腦識觀察之，謂其非歷史的焉，不得也。尤奇者，若談譚許謝，以偏旁聯，若盧羅勞，以雙聲聯，則直是無理取鬧。觀此者，與讀野蠻人之遊記，同一趣味矣。

(己) 祕密之團體。

致公堂

保安堂

聚良堂

秉公堂

秉安堂

安益堂

瑞端堂

羣賢堂

俊英堂

協英堂

昭義堂

儀英堂

協勝堂

保善社

協善堂

合勝堂

西安社

敦睦堂

萃勝堂

松石山房

安平公所

萃英堂

華亭山房

洋文政務司

保良堂

竹林山房

此諸團體者實全市之蠹也。歷年種種風波皆自此起。其源蓋皆同出於三合會。而流派之歧多至如此。真可浩歎。潮咸同間最初有所謂廣德堂^邑協義堂^邑丹山堂^{山香}者。亦統名爲三合堂。是爲祕密結社之嚆矢。蓋四五十。年前良儒之民。憚於遠遊。其冒險往者。率皆鄉曲無賴子。迨洪氏金陵潰後。其餘黨復以海外爲尾閫。三合會之獨盛。蓋以此故。其後統名爲致公堂。致公堂者。三合會之總名也。各埠皆有。其名亦種種不一。而皆同宗致公。雖然。致公之下。復分裂爲前表所列之廿四團體者。然則致公之爲致公。亦可想矣。全美國十餘萬人中。其挂名籍於致公者。殆十而七八。而致公堂會員中。殆無一人不別挂名於以下各團體者。致公派者。以傾滿洲政府爲目的者也。而其內容之腐敗之軋轢。視滿洲政府又十倍焉。法儒李般曰。國民之心理。無論置諸何地。皆爲同一之發現。演同一之式。吾觀於中國之祕密結社。而不禁長太息者矣。

以上諸團體軋轢無已時。互相仇讎。若不共戴天者然。忽焉數團體相合爲一聯邦。忽焉一團體分裂爲數敵國。日日以短鎗匕首相從事。每歲以是死者十數人。乃至數十人。真天地間絕無僅有之現象也。痛哉。

洋文政務司者。本諸團體中之稍解洋語者。相結以魚肉其本團體。故現在二十餘團體復相結與洋文政務司爲仇。云。是一年金山祕密黨最重要之事件也。要其離合之跡。大率類是。吾不忍復道之。

(庚)文明之團體

(一)保皇會

(一) 學生會

(二) 青年尙武會

(四) 各教會 (準文明)

(五) 同源總局 (準文明)

保皇會即中國維新會也。己亥冬始成立。有會員約萬人。其組織悉依泰西文明國公黨之式。爲有機體之發達。與各埠相聯絡。近以支會太多。將美洲畫爲十一總部。而加罈寬尼省與居一焉。其本部總事務所。即在舊金山。今將保皇會總部之名列如下。

一加拿大部

所屬十二支會以溫高華爲部長

二美國加罈寬尼部

所屬六支會以舊金山爲部長

三美國西北部

所屬九支會以林侖爲部長

四美國東部

所屬六支會以紐約爲部長

五美國中部

所屬十三支會以芝加高爲部長

六美國南部

所屬四支會以紐柯連爲部長

七美國汶天拿部

所屬十二支會以氣連拿爲部長

八墨西哥部

所屬九支會以萊苑爲部長

九中亞美利加部

所屬四支會以巴拿馬爲部長

十南亞美利加部

所屬三支會以祕魯之利馬爲部長

十一檀香山部

所屬八支會以漢擲路盧爲部長

都凡太平洋以東八十六支會十一總部

學生會本內地往美留學諸君所發起。而華商子弟在學校者亦加入焉。數約七十餘人。初發達未有會所。借中華會館爲議場。

青年尙武會乃新創者。會員大率皆保皇會中之少年子弟也。現不過四十餘人。將來發達可望更盛。其規模略倣日本體育會有兵式體操。

教會凡八家。照例與內地各教會同。不必多述。華人入耶穌教者約千人。

同源總局美產之華人所立也。其始本以爭選舉投票權利爲目的。故亦可謂之文明。但其組織甚不完備。計舊金山之華人。有美籍者不下二千人。全國約有四五千人。未成年者亦尙多。現計殆止有三千之間。使果能一致投票。儘可以操縱兩

大政黨。要求種種權利。爲祖國同胞吐氣。就使在全國中無甚影響。若夫舊金山之市政。則可以爲所欲爲矣。何以舊金山之二千票。使全加於甲黨。則乙黨所弱於甲黨者已二千票。二千票之勢力。其左右一市也。必矣。余在彼時。向同源總局會員演說。極力鼓舞之。且爲之擬聯合選舉章程。未知將來能實行否也。現金山美籍者。雖有二千人。其爲同源總局會員者。不過三四百。而投票時至者不滿百人云。嘻。以自由權賦諸中國人。果何益哉。以上所列凡八種九十六之團體。其餘若俱樂部等小小之結集。尙不在此數。以人口平均比例算之。則除日本東京留學生外。其團體之多。當無有及舊金山者。

舊金山報館之多，亦冠絕內地，今舉其名。

文興日報（保皇會機關報）

中西日報

大同日報致公堂機關報（新立者）

華記日報

萃記報（來復報）

華洋報（同上）

以區區二萬餘人之市，而有報館六家，內地人視之，能無愧死，此亦文明程度稍高之明證也。

（四十）

綜觀以上所列，則吾中國人之缺點，可得而論次矣。

一曰有族民資格而無市民資格。吾中國社會之組織，以家族為單位，不以個人為單位，所謂家齊而後國治是也。周代宗法之制，在今日其形式雖廢，其精神猶存也。竊嘗論之，西方阿利安人種之自治力，其發達固最早，即吾中國人之地方自治，宜亦不弱於彼，顧彼何以能組成一國家而我不能，則彼之所發達者，市制之自治，而我所發達者，族制之自治也。試遊我國之鄉落，其自治規模，確有不可掩者，即如吾鄉，不過區區二三千人耳，而其立法行政之機關，秩然不相混，他族亦稱是。若此者，宜其為建國之第一基礎也，乃一遊都會之地，則其狀態

之凌亂不可思議矣。凡此皆能爲族民不能爲市民之明證也。吾游美洲而益信。彼既已脫離其鄉井。以個人之資格。來住於最自由之大市。顧其所齎來所建設者。仍舍家族制度外無他物。且其所以維持社會秩序之一部分者。僅賴此焉。此亦可見數千年之遺傳。植根深厚。而爲國民鄉導者。不可不於此三致意也。

二曰有村落思想而無國家思想。吾聞盧斯福之演說。謂今日之美國民最急者。宜脫去村落思想。其意蓋指各省各市人之愛省心愛市心而言也。然以歷史上之發達觀之。則美國所以能行完全之共和政者。實全恃此村落思想爲之原。村落思想固未可盡非也。雖然。其發達太過。又爲建國一大阻力。此中之度量分界。非最精確之權量。不足以衡之。而我中國則正發達過度者也。豈惟金山人爲然耳。卽內地亦莫不皆然。雖賢智之士。亦所不免。廉頗用趙。子房思韓。殆固有所不得已者耶。然此界不破。則欲成一鞏固之帝國。蓋亦難矣。

三曰只能受專制不能享自由。此實芻狗萬物之言也。雖然。其奈實情如此。卽欲掩諱。其可得耶。吾觀全地球之社會。未有凌亂於舊金山之華人者。此何以故。曰自由耳。夫內地華人性質。未必有以優於金山。然在內地。猶長官所及治。父兄所及約束也。南洋華人。與內地異矣。然英荷法諸國。待我甚酷。十數人以上之集會。輒命解散。一切自由。悉被剝奪。其嚴刻更過於內地。故亦戢戢焉。其真能與西人享法律上同等之自由者。則旅居美洲澳洲之人是也。然在人少之市。其勢不能成。故其弊亦不甚著。羣最多之人。以同居於一自由市者。則舊金山其稱首也。而其現象。乃若彼。有鄉人爲余言。舊金山華人。惟前此左庚氏任領事時。最爲安謐。人無敢挾刃尋仇者。無敢聚衆滋事者。無敢遊手閑行者。各秘密結社。皆斂跡屏息。夜戶無驚。民孜孜務就職業。蓋左氏授意彼市警吏。嚴緝之而重罰之也。及左氏去後。而故態依然。此實專制安而自由危。專制利而自由害之明證也。吾見其各會

館之規條。大率皆仿西人黨會之例。甚文明。甚縝密。及觀其所行。則無一不與規條相反悖。卽如中華會館者。其猶全市之總政府也。而每次議事。其所謂各會館之主席及董事。到者不及十之一。百事廢弛。莫之或問。或以小意見。而各會館抗不納。中華會館之經費。中華無如何也。至其議事。則更有可笑者。吾嘗見海外中華會館之議事者數十處。其現象不外兩端。(其一)則一二上流社會之有力者。言莫予違。衆人唯諾而已。名爲會議。實則布告也。命令也。若是者。名之爲寡人專制政體。(其二)則所謂上流社會之人。無一有力者。遇事會不敢有所決斷。各無賴少年。環立於其旁。一議出。則羣起而噪之。而事終不得決。若是者。名之爲暴民專制政體。若其因議事而相攘臂相操戈者。又數見不鮮矣。此不徒海外之會館爲然也。卽內地所稱公局公所之類。何一非如是。卽近年來號稱新黨志士者。所組織之團體。所稱某協會某學社者。亦何一非如是。此固萬不能責諸一二人。蓋一國之程度。實如是也。卽李般所謂國民心理。無所往而不發現也。夫以若此之國民。而欲與之行合議制度。能耶否耶。更觀其選舉。益有令人失驚者。各會館之有主席也。以爲全會館之代表也。而其選任之也。此縣與彼縣爭。館多合同數縣者一縣之中。此姓與彼姓爭。一姓之中。此鄉與彼鄉爭。一鄉之中。此房與彼房爭。每當選舉時。往往殺人流血者。不可勝數也。夫不過區區一會館耳。所爭者歲千餘金之權利耳。其區域不過限於一兩縣耳。而弊端乃若此。曠而大之。其慘象寧堪設想。恐不僅如南美諸國之四年一革命而已。以若此之國民。而欲與之行選舉制度。能耶否耶。難者將曰。此不過舊金山一市之現象而已。以汝粵山谷犢頑之民俗。律我全國。惡乎可。雖然。吾平心論之。吾未見內地人之性質。有以優於舊金山人也。吾反見其文明程度。尙遠出舊金山人下也。問全國中有能以二三萬人之市。容六家報館者乎。無有也。問全國中之團體。有能草定如八大會館章程之美備者乎。無有

也。以舊金山猶如此。內地更可知矣。且即使內地人果有以優於金山人。而其所優者亦不過百步之與五十步。其無當於享受自由之資格。則一而已。夫豈無一二聰偉之士。其理想。其行誼。不讓歐美之上流社會者。然僅恃此千萬人中之一二人。遂可以立國乎。恃千萬人中之一二人。以實行干涉主義。以強其國。則可也。以千萬人中之一二人爲例。而遂曰全國人可以自由。不可也。夫自由云。立憲云。共和云。是多數政體之總稱也。而中國之多數。大多數最大多數。如是如是。故吾今若採多數政體。是無以異於自殺其國也。自由云。立憲云。共和云。如冬之葛。如夏之裘。美非不美。其如於我不適何。吾今其毋眩空華。吾今其勿圓好夢。一言以蔽之。則今日中國國民。只可以受專制。不可以享自由。吾祝吾禱。吾謳吾思。吾惟祝禱謳思我國得如管子商君來喀瓦士克林威爾其人者。生於今日。雷厲風行。以鐵以火。陶冶鍛鍊吾國民二十年三十年乃至五十年。夫然後與之讀盧梭之書。夫然後與之談華盛頓之事。以上三條皆說明無政治能力之事。其後與之談華盛頓之事。保守心太重。一端人人共知。無俟再陳。

四曰無高尚之目的。此實吾中國人根本之缺點也。均是國民也。或爲大國民強國民。或爲小國民弱國民。何也。凡人處於空間。必於一身衣食住之外。而有更大之目的。其在時間。必於現在安富尊榮之外。而有更大之目的。夫如是。乃能日有進步。緝熙於光明。否則凝滯而已。墮落而已。個人之么匿體如是。積個人以爲國民。其拓都體亦復如是。歐美人高尚之目的。不一端。以吾測之。其最重要者。則好美心其一也。希臘人言德性者以眞善美而少言美。惟孔子謂韶盡美又盡善。孟子言可欲之謂善。充實之謂美。皆兩社會之名譽心其二也。宗教之未來

觀念其三也。泰西精神的文明之發達。殆以此三者爲根本。而吾中國皆最缺焉。故其所營營者。只在一身。其所孳孳者。只在現在。凝滯墮落之原因。實在於此。此不徒海外人爲然也。全國皆然。但吾至海外而深有所感。故論

及之。此其理頗長。非今日所能畢其詞也。

此外中國人性質不及西人者多端。余偶有所觸。輒記之。或過而忘之。今將所記者數條叢錄於下。不復倫次也。西人每日只操作八點鐘。每來復日則休息。中國商店每日晨七點開門。十一二點始歇。終日危坐店中。且來復日亦無休。而不能富於西人也。且其所操作之工。亦不能如西人之多。何也。凡人做事。最不可有倦氣。終日終歲而操作焉。則必厭。厭則必倦。倦則萬事墮落矣。休息者實人生之一要件也。中國人所以不能有高尚之目的者。亦無休息實尸其咎。

美國學校。每歲平均只讀百四十日書。每日平均只讀五六點鐘書。而西人學業優尙於華人。亦同此理。華人一小小商店。動輒用數人。乃至十數人。西人尋常商店。惟一二人耳。大約彼一人總做我三人之工。華人非不動。實不敏也。

來復日休息。洵美矣。每經六日之後。則有一種方新之氣。人之神氣清明。實以此。中國人昏濁甚矣。即不用彼之禮拜。而十日休沐之制。殆不可不行。

試集百數十以上之華人於一會場。雖極肅穆。毋譁。而必有四種聲音。最多者爲咳嗽聲。爲欠伸聲。次爲嚏聲。次爲拭鼻涕聲。吾嘗於演說時默聽之。此四聲者如連珠然。未嘗斷絕。又於西人演說場劇場靜聽之。雖數千人。不聞一聲。東洋汽車電車必設睡壺。睡者狼藉不絕。美國車中設睡壺者甚希。即有亦幾不用。東洋汽車途間在兩三點鐘以上者。車中人假寐過半。美國車中雖行終日。從無一人作隱几臥。東西人種之強弱優劣可見。

舊金山西人常有遷華埠之議。蓋以華埠在全市中心最得地利。故彼涎之。抑亦藉口於吾人之不潔也。使館參贊某君嘗語余曰。宜發論使華人自遷之。今夫華埠之商業。非能與西人爭利也。所招徠者皆華人耳。自遷他處。其招徠如故也。遷後而大加整頓之。使耳目一新。風氣或可稍變。且毋使附近彼族。日日爲其眼中釘。不亦可乎。不然。我不自遷。彼必有遷我之一日。及其遷而華埠散矣。云云。此亦一說也。雖然。試問能辦得到否。不過一空言耳。

舊金山凡街之兩旁人行處。行車中央不許吐唾。不許拋棄廢紙雜物等。犯者罰銀五元。紐約電車不許吐唾。犯者罰銀五百元。其貴潔如是。其厲行干涉不許自由也如是。而華人以如彼淩亂穢濁之國民。毋怪爲彼等所厭。西人行路。身無不直者。頭無不昂者。吾中國則一命而僵。再命而僂。三命而俯。相對之下。真自慚形穢。西人行路。脚步無不急者。一望而知爲滿市皆有業之民也。若不勝其繁忙者然。中國人則雅步雍容。鳴琚佩玉。真乃可厭。在街上遠望數十丈外。有中國人迎面來者。卽能辨認之。不徒以其軀之短而顏之黃也。

西人數人同行者如雁羣。中國人數人同行者如散鴨。

西人講話與一人講。則使一人能聞之。與二人講。則使二人能聞之。與十人講。則使十人能聞之。與百人千人數千人講。則使百人千人數千人能聞之。其發聲之高下。皆應其度。中國則羣數人坐談於室。聲或如雷。聚數千演說於堂。聲或如蚊。西人坐談。甲語未畢。乙無僂言。中國人則一堂之中。聲浪稀亂。京師名士。或以搶講爲方家。真可謂無秩序之極。孔子曰。不學詩。無以言。不學禮。無以立。吾友徐君勉亦云。中國人未曾會行路。未曾會講話。真非過言。斯事雖小。可以喻大也。

(四十一)

吾國人留學於卜技利大學者十餘人，大率皆前此北洋大學堂之學生也。每來復日，輒渡海來談，聯牀抵足，亦一快事也。此間本有一學生會，凡姓名籍貫年歲及所在校，皆備載於會籍。余攜其一冊，擬爲此遊記材料。及理叢稿時，不知何往，今不能備錄。至可惜也。今就所記憶者錄如下，其非自內地來者不載。

(姓名)

(籍貫)

(學校)

(所在地)

(專門)

(費別)

陳錦濤	廣東南海	耶路大學	紐海文	政法數學	北洋官費
王寵惠	廣東東莞	耶路大學	紐海文	法律	北洋官費
張煜全	廣東南海	耶路大學	紐海文	政治	北洋官費
薛頌瀛	廣東香山	卜技利大學	舊金山附近	經濟	自費
王寵佑	廣東東莞	卜技利大學	舊金山附近	礦務	北洋官費
陸耀廷	廣東	卜技利大學	舊金山附近	工程	北洋官費
胡朝棟	廣東	卜技利大學	舊金山附近	工程	北洋官費
譚天池	廣東	卜技利大學	舊金山附近	農務	遊學會費
王建祖	廣東	卜技利大學	舊金山附近	農務	遊學會費
吳桂齡	廣東新安	斯丹佛大學	舊金山附近	電學	北洋官費

嚴錦鎔 廣東東莞 哥倫比亞大學 紐約 政法 北洋官費

徐建侯 廣東香山 私立大學 紐比佛 工商 自費

章宗元 浙江烏程 卜技利大學 舊金山 杭州官費

稽芩蓀 江蘇 卜技利大學 舊金山

濮口口 浙江 卜技利大學 舊金山

程斗 廣東香山 私立學校 芝加高 自費

程耀 廣東香山 私立學校 芝加高 自費

黃旭 廣東香山 私立學校 抓李抓鱗 自費

梁啓勳 廣東新會 私立學校 芝加高 自費

薛錦琴女士 廣東香山 中學校 卜技利 自費

薛錦標 廣東香山 中學校 卜技利 自費

康同璧女士 廣東南海 高等學校 哈佛 自費

李國波 廣東鶴山 中學校 費城 自費

張謙 廣東新會 中學校 費城 自費

以上舉吾所記憶者其餘漏略尚多復有學生會所收得報告一紙由該會員寄贈者

(姓名)

(籍貫)

(年歲)

(所在地)

施兆祥 浙江錢塘 二四 遏沙加

故永其 安徽桐城 二四 遏沙加

黃子靜 安徽無爲 二八 遏沙加

黃子靜夫人 安徽無爲 二八 遏沙加

方和 福建侯官 十九 華盛頓

孫多鈺 安徽壽州 二十 華盛頓

孫元芳 安徽壽州 十九 華盛頓

孫季芳 安徽壽州 十七 華盛頓

孫裕芳 安徽壽州 十七 華盛頓

孫震芳 安徽壽州 十六 華盛頓

繼先 滿洲 十七 華盛頓

陶德琨 湖北襄陽 十九 波士頓

盧靜恆 湖北鄖陽 十九 波士頓

姚巨慤 湖北漢陽 二十二 維布拉罕

朱啓烈 湖北荊州 二十二 維布拉罕

劉慶雲 湖北漢陽 二十一 遏沙加

楊恩湛 江蘇武進 二十 遇沙加

張繼業 湖北鄖陽 二十 華盛頓

梁應麟 廣東香山

黃日升 廣東香山

梁賚圭 廣東南海

陳耀榮 廣東番禺

鄭垣 廣東香山

蔡國藻 廣東香山

容彭 廣東香山

林鐸 廣東香山

美洲遊學界大率刻苦沈實孜孜務學無虛囂氣而愛國大義日相切磋良學風也前北洋大學堂諸君現皆已卒業得學位尙皆留校研究其餘或有學級稍低者七八年後總可皆在大學卒業云

遊學會者北洋大學堂留學諸君所發起也現徐君建侯爲會長譚天池王建祖兩君卽該會所供養云

關於遊學之事美國遊學指南一書言之詳矣茲不贅惟余之意見復有數端一曰其程度非有足以入大學之資格者不可妄去一曰女學生不可妄去一曰宜學實業若工程礦務農商機器之類勿專鶩哲學文學政治一曰勿眩學位之虛名宜求實在之心得鄙意如是願以還諸留學者

加罇寬尼省兩大學，卜技利斯丹佛進步甚速，駸駸乎有比肩東部之勢。吾國遊學者來此甚便也。

斯丹佛大學校長佐頓氏邀余至其校演說，縱覽一周焉。佐頓氏大才樂樂，斯丹佛之進步皆由其力云。偕留學諸君遊卜技利大學一週，未嘗驚動其校長，粗覽而已。卜技利大學最壯觀者爲一戲園，聞仿古羅馬劇場式，上無覆瓦，而在臺上演說，不須用力，而萬數千之座衆，皆能聽之。西人學校學生，常自編戲劇演之，文學上一高尚之業也。

屋崙者，舊金山之隔海，與卜技利毗連者也。華人數百，有維新會，規程嚴整，會中多青年向學之士。余亦往演說一次，歡迎甚盛。

由舊金山至羅省技利

(四十二)

九月初五日由大埠入沙加免圖。

沙加免圖者，華人俗稱二埠，實加罇寬尼省政府所在也。華人約六七百，維新會新成。余在此三日，返舊金山，隨往羅省技利，初十日至焉。

羅省者，美國第三十大都會，而加罇寬尼省之第二大都會也。人口十萬二千五百五十五，華人約四千餘。維新會成立已數年，至是大擴張，各埠歡迎之盛，以此爲最。蓋西人特別相敬禮，余未至時，市會長預備行市民歡迎之典，以馬兵一隊，軍樂一隊，迎於驛站。市會長陪乘，先繞市一周，所至沿途西人觀者如堵，咸拍掌揮巾致敬。

余亦不解其何故。惟一路脫帽還禮不迭而已。

華人之熱誠尤致可敬。以無合式之演說場。特趕蓋一綵樓於街心。以供演說之用。

十三日羅省技利市舉行市民歡迎典。結綵於市會堂。全市名譽紳商咸集。市會長演說言兩年前。一歡迎前大統領麥堅尼。一歡迎現大統領盧斯福。此爲第三次云。余演說一時許。復有繼續演說者。禮畢。乃赴茶會。

西人中有數將官最相敬禮。其一少將李氏。乃前此南北戰爭時著名之李將軍。南軍大將與格爾德將軍齊名之猶子也。其熱

心於中國。視吾輩殆尤甚。其一皮將軍。嘗在菲律賓轉戰二年餘。健將也。彼語余云。美國人之克菲律賓。藉菲人之力者居其半。蓋經彼手。嘗練八萬餘之菲兵云。卽以菲兵還攻菲人。英滅印度之故技也。由此觀之。菲律賓之名譽。不逮波亞矣。豈東洋人之奴性終不可免耶。皮氏又言。凡菲兵有一美人督隊。則全軍俱勇。否則甚怯云云。亦一奇也。

羅省華人西人皆苦留。依依不相捨。余以歸期迫。留九日遂行。

行經斐士那。其地華人二千餘。舊未有維新會。余至演說兩次。會遂成。復入顯佛演說一次。二十日復返於舊金山。

歸途

(四十二)

九月初五日。遂自舊金山首塗歸亞洲。余本擬乘「高麗」輪船經檀島西返。適高麗船開罪於檀島之華人。我

同胞與之斷交通，以挾纏之，故吾不便附焉。歸後乃知檀人預備歡迎，意盛且厚，吾深媿無以對檀人也。遂由舊金山經屋崙、沙加、免岡、尼利允、林侖、舍路，復至溫高華，乘中國皇后船返日本。所經諸市，諸同志皆至車站握手依依。余亦有餘戀焉。惟林侖小住一日乃行。

余在美所見美國政俗，其感觸余腦者甚多，叢稿滿篋，欲理之爲一美國政俗評，匆匆未能卒業，姑述其略。若夫全豹，願以異日。

今年美國大總統盧斯福巡行全國，所至演說，有常用之一言焉，曰『剷除村落思想』。此實美國厲行帝國主義，日趨中央集權之表徵也。然盧斯福何以斷斷爲此言，是又美國至今日猶未能剷除村落思想之表徵也。何也？村落思想者，實美國人建國之淵源，經百餘年之進化，而至今猶未能脫其範圍者也。

吾儕以尋常之眼，瞥觀美國，見其有唯一之元首（大統領），有唯一之政府，有唯一之國會（上下議院），且也。其外交上有唯一之宣戰媾和訂盟結約之機關，其外形與他國無所異。於是心目中，惟有一聯邦政府。吾儕遊美國者，自舊金山上岸，經芝加哥，費爾特費，以達紐約，凡六七千餘里，四五日汽車，然始終用同一之貨幣，同一之郵政，途中無稅關淹滯之事，亦無復言語衣服習俗之不同，亦謂在一國內之旅行，例應如是耳。夫孰知此車聲麟麟，汽烟勃勃之間，已經過十一個之共和自治國而不自知也。

美國之政治，實世界中不可思議之政治也。何也？彼美國者，有兩重之政府，而其人民有兩重之愛國心者也。質而言之，則美國者，以四十四之共和國而爲一共和國也。故非深察聯邦政府與各省政府之關係，則美國所以發達之跡，終不可得明。其關係奈何？譬諸建築，先有無數之小房，其營造不同時，其結構不同式，最後乃於此小

房之上。爲一層堂。皇輪奐之大樓房。以翼蔽之。而小房之本體。毫無所毀滅。毫無所損傷。蓋小房非特大樓而始存立。大樓實恃小房而始存立者也。設或遇事變。而大樓忽亡。則彼諸小房者。猶依然不被壞。稍加繕葺。復足以蔽風雨而有餘。故各省政府。譬則小房也。聯邦政府。譬則大樓也。各省政府之發生。遠在聯邦政府以前。雖聯邦政府亡。而各省還其本來面目。復爲多數之小獨立自治共和國。而可以自存。此美國政治之特色。而亦共和政體所以能實行能持久之原因也。

故他國之國家。皆以國民之一原素組織而成。美國之國家。則以國民及國民所構造之小國家。凡兩原素組織而成。故美國國會之兩議院。各代表此兩原素之一。其下議院。則代表國民也。美國憲法第一章第三節云。下議院議員每三萬人以上。舉一人。

其上議院。則代表國民所構造之小國家也。第三節云。上議院議員。自各省之立法院。舉出每省二人。

論者動曰。美國人民離英獨立。而得自由。此知其一。不知其二也。謂美國人之自由。以獨立後而始鞏固。則可謂美國人之自由。以獨立後而始發生。則不可。世界無突然發生之物。故使美國人前此而無自由。斷不能以一次之革命戰爭。而得此完全無上之自由。彼法蘭西以革命求自由者也。乃一變爲暴民專制。再變爲帝政專制。經八十餘年。而猶未得如美國之自由。彼南美諸國。皆以革命求自由者也。而六七十年來。未嘗有經四年無暴動者。始終爲變會專制政體。求如美國之自由者。更無望也。故美國之獲自由。其原因必有在革命以外者。不可不察也。

法儒盧梭言。欲行民主之制。非衆小邦相聯結不可。德儒波倫哈克亦言。共和政體之要素有數端。而其最要者曰。國境甚狹。吾觀於美國。而知其信然矣。彼美國者。非徒四十四個之小共和國而已。而此各小共和國之中。又

有其更小焉者存。卽以新英倫海岸一帶論之。新英倫者今之馬沙諸些干捏底吉洛愛當時如披里門士如沙廉如查里士湯各自爲獨立之殖民地而不屬於洛愛蘭。若菩列摩士若紐胥若婆羅域達士若紐海文各自爲獨立之殖民地而不屬於馬沙諸些及干捏底吉諸如此類不可枚舉。自十六世紀殖民以來卽已星星點點爲許多之有機體。立法行司法之制度具備焉。純然爲一政府之形。故美國之共和政體非成於其國而成於組織一國之諸省。又非成於其省而成於組織一省之諸市。必知此現象者乃可以論美國之政治。必具此現象者乃可以效美國之政治。

(四十四)

竊觀美國建國之困難有深可驚歎者。當殖民時代各小共和團體之分立也。其所恃以聯合統一之之原質無一物藉曰有之。不過曰同用一國語同爲英王之臣屬而已。及其不堪英之虐政也。以同病相憐故不得不協力以相抵抗。於是一七六九年始由九殖民地各派代表人開公會於紐約。及一七七四年復由十二殖民地各派代表人開公會於費城。翌年十三殖民地復會議。是爲聯合之第一著。雖然當時此公會者不過暫時設立之革命團體。其法律上之人格毫無所存也。及一七七六年此公會宣告獨立。翌年又置一永久一致之條款。一七八一年各殖民地之政府皆批准此款。是爲聯合之第二著。始略帶法律上之性格。雖然彼時之公會謂之爲各政府之同盟體則可。謂之爲一政府則不可。何也。彼各省者。即各殖民地無大無小皆有同一之投票權。不相統屬。純爲羣龍无首之氣象。而此中央公會者對於一市民曾無有裁判權。曾無有徵稅權。中央之行政機關無有也。中央

之司法機關無有也。僅恃各省之捐款以充國用。而各省所捐。又皆緩急時或無有。至各省及其所屬之市民有不奉中央公會之命令者。公會無如之何也。此何以故。彼等實視公會爲贅疣。甚或視之爲毒物。故其所以生此妄見奈何。彼等（指各省）當抗英王而自立之時。誓不欲復戴一權力於彼所固有之權力之上。卽其所自擇者亦不願戴。故當獨立軍未告成功以前。此公會之指揮既已不靈。讀華盛頓傳。觀其軍中屢次兵變。公會種種不相接應。其竭蹶情形殆可想見。及一七八三年和議成後。外患既消。而內訌乃益甚。各省或不派代表人於公會。卽派者亦往往後期不至。公會毫無威力。不惟不能使人服從。亦且不能使人起敬。商業上交通上生種種障礙。各省又或濫發不換之鈔幣。或以金銀以外之物品爲通貨。舉國皇皇。不知所措。故華盛頓有言。惡政府固惡也。猶逾於無政府。不圖吾儕以八年血戰。易此無政府之氣象。其言愾乎有餘痛矣。是時美國之危。間不容髮。幸也。彼盜格魯撒遜民族根基甚深。經失敗之試驗。遂能幡然謀補救之方。一七八六年。五省之代表人開會議於米里倫省之安拿坡里。謀所以整頓通商之法。遂乘此機作一報告書。極言現時彫敝之情。及將來危險之象。遂乃倡議以明年開大會議。再謀聯合之鞏固。迨翌一七八七年五月十四日。遂開憲法會議於費爾特費。是爲聯合之第三著。自茲以往。而美國始得謂之一國家矣。嗚呼。破壞固不易。建設良亦難。以美國之本來有無數小房者。從而加一大樓於其上。而其層累曲折也。尙若此。苟非有羣哲之靈。與諸國民之肅。則彼美者將不亡於戰敗之時。而亡於戰勝之後也。嘻。亦危矣。

此次憲法會議。以華盛頓爲議長。各省代表人凡五十三員。皆一時之俊也。凡經五月之久。苦心焦慮。乃以祕密會議。成彼七章二十條之憲法。論者謂此舉之困難。實十倍於獨立軍云。其所難者。不徒在創前此所未有而已。

彼離羣獨立之十三共和國各有其利害，各有其習慣，地方上種種感情，不能相容，彼此以恐怖嫉妬之念相見，於此而欲調和之，難莫甚焉。故哈彌兒頓本華盛頓之書記官聯邦成後爲戶部大臣嘗云「當甲兵收息之後，乃能以國民全體之同意制定憲法，實可稱一異事。吾蓋戰戰兢兢，至觀其成效，而乃稍自安云爾。」諒哉斯言，猶幸也。此憲法成於祕密會議也。苟公議之，則今之所謂合衆國者，其終不可得建憲法案。既布之後，各省議論蠱起，以爲立此強大之中央政府，則諸省之權利與市民之自由將彼此而危。其言曰：自由將亡，我輩以血以淚從佐治第三手中所奪回之自由將亡於其子孫之手。曰：中央集權滅各省政府，滅地方自治，此等輿人之誦，囂囂徧於國中，其最重要之省若馬沙諸些，若紐約，其反對爲最力，使當時若如今日者，以普通投票法取決之。現今美國若有改定憲法之事須由全國人民投票取決則憲法之實行終無望耳。幸也。彼時未知用此法，各省皆以其代表人決事，而所舉代表人皆適當之人物，能知大勢之所嚮，毅然任之。時草案所定，謂此憲法經九省認可後，即便施行，而紐約省威治尼亞省猶且徘徊遲疑。雖他九省既已公認之後，猶自恃其省分之大，良久不從。直至千七百八十八年始畫諾焉。嗚呼！輿論之不可恃也久矣。誰謂美國爲全體人民自由建立之國，吾見其由數偉人強制而成耳。以久慣自治之美民，猶且如是，其他亦可以戒矣。

(四十五)

美國政治進化史，有獨一無二之線路焉。卽日趨於中央集權是也。語其階級，則自初殖民以至革命會議時，而進一步。至憲法成立，華盛頓爲大統領，而進一步。至林肯爲大統領，南北戰爭時，而進一步。至麥堅尼爲大統領，

西班牙戰爭後而進一步。此其最著者也。其餘百端施設，皆著著向於此而進行，不及備述。但美國支配政界之實權者政黨也。吾今請略語其政黨。

美國百餘年來之政治史，實最有力之兩大政黨權力消長史而已。兩大政黨何自起，即起於會議憲法時也。當會議之際，而兩政見之相戰，已非一日。兩政見者何？其一則重學家所謂離心力，其二則所謂向心力是也。蓋一則務維持各省自治之勢力，一則務擴張中央政府之威嚴。賴華盛頓之調和憲法案，乃僅得就。及華盛頓任大總統，網羅一時之賢俊，以組織內閣，而閣員之中，兩派生焉。即戶部大臣哈彌兒頓爲集權派之魁，國務大臣美國之國務大臣殆立憲君主國之首相譯其本名則云聯邦之書也。Secretary of State 惟性質全與宰相異其職兼掌外交。遮化臣爲分權派之桀，旗鼓相當，各不相下。初次

召集議院而國會中之此兩黨已劃然分明。及法國大革命以後，哈彌兒頓派鑑彼覆轍，益覺中央權力之不可以已持之愈堅。遮化臣怨華盛頓之袒哈氏也，率其同志退出內閣，以各省獨立地方（案）指各省所屬之市鄉獨立個人

獨立三大義爲揭櫫，號呼於國中。及華盛頓退職後，而兩黨之形遂成。哈氏所率者曰「弗的拉里士」黨。譯言聯邦

意之即今之「利帕壁力根」黨是也。遮氏所率者曰「利帕壁力根」黨。譯言共和之意即今之「丹們奇勒」黨。譯言民主

意之是也。是爲美國有政黨之始。

質而論之，則遮黨者自由之本鐸也。而哈黨者秩序之保障也。此兩義之在政治界，如車之兩輪，鳥之雙翼，缺一不可。而美國卒以此兩者之相競爭，相節制，相調和，遂以成今日之治。而國民對於此兩黨之感情，亦隨時爲轉移。當遮氏之初退出內閣也，熱心鼓吹其自由主義，民多聽之。時以華盛頓左袒哈氏之故，乃至謗言雲起。昔也尊之曰國父，今乃嘲之曰國之繼父云。艾激烈可見一斑矣。（附注）華盛頓實不偏於兩黨當時敵黨以嫉哈氏故波及之耳雖然哈黨之根據

地在新英蘭諸省爲美國最有勢力之地。且承華盛頓之教民思慕之故。華盛頓八年退任之後。繼任者爲約翰亞丹。實哈黨也。及千八百年選舉之際。遮化臣以其辯才及其伎倆。卒能被舉爲大統領。哈彌兒頓副焉復再舉共任八年。退職後。其黨人馬丁遜繼之者八年。門羅復繼之者八年。於是凡二十四年間。政權歸於利帕璧力根黨。而蕭的拉里士黨於一八一〇—一八一四年間。累失敗。以失敗而遂至滅亡。雖然。利帕璧力根黨之所以能獨占政權。非其才力之果能如是。實緣蕭的拉里士黨失其首領。而後此無復英才足以繼之也。（附注）當遮化臣再任大統領時。其黨人有名布爾者。如哈彌兒頓之能。乃挑之決鬪。遂斃哈氏。全美國無不痛惜。此實美國政黨史不可磨滅之恥辱也。嗚呼。以最文明最自治之美國。民猶有此等舉動。完全民政成立之難。如是耶。至是而美之政黨一衰。

凡生息於自由政體之下之國民。其萬不能無政黨者勢也。故舊黨一滅。而新黨直隨之而生。至千八百三十年。復有兩黨者起。一曰丹門奇勒黨。即受持舊利帕璧力根黨之主義者也。一曰利帕璧力根黨。即受持舊蕭的拉里士黨之主義者也。其時所爭者爲奴隸問題。南方諸奴隸省皆丹黨。北方諸自由省多利黨。而丹黨復制勝者十餘年。及千八百六十年之選舉。丹黨南北分裂。內訌以爭候補者。於是利黨乘此機。舉林肯爲大統領。至此而哈彌兒頓之靈魂始復繼續。利黨之勢。披靡全國。而南方十一省遂相率脫聯邦以謀自立。遂有南北之戰。而此兩大政黨及其黨名。遂繼續以至今日。

要而論之。則美國建國以來之歷史。可中分之。其上半期爲地方分治黨得意時代。其下半期爲中央集權黨得意時代。雖然。尚有一事宜注意者。即遮化臣派所揭櫫之主義。謂節制中央政府之權力也。然及其得政也。固亦知集權之不可以已。且決爲有利而無害。故彼黨柄政數十年間。人民此等僻見亦漸化去。至林肯時而全局已

大定。兩政黨所爭者，已非復國權省權之問題矣。此後所爭者，則自由關稅保護關稅其一也。用金用銀其二也。侵略主義和平主義其三也。此皆南北戰爭以後之大問題也。自林肯以還，其黨勢力繼續以至於今。中間雖亦有十數年

政歸丹黨。然總之利黨時代。近今之麥堅尼盧斯福，皆利帕璧力根黨員也。

利黨之大多數為資本家。丹黨之大多數為勞動社會。現今之美國對於內而實行干涉主義，對於外而實行帝國主義，皆利帕璧力根黨之最新政策。抑亦其最舊政策也。蓋自哈彌兒頓以來，其精神傳於今日者，殆相一貫也。二十世紀之天地，純為十九世紀之反動力。所謂自由平等之口頭禪，已匿跡於一隅。吾料利帕璧力根之黨，勢正未艾也。

(四十六)

美國政治家之貪黷，此地球萬國所共聞也。吾昔求其故而不可得。今至美，悉心研究此問題，質諸彼地之口碑，參以書報之論斷，今所略發明者如下。

凡認報國之義務以投身於政治界者，各國中固亦有其人矣。雖然，鳳毛麟角，萬不得一焉。其餘大多數，則皆有所利而為之者也。其所利若何，則社交上之特權，其最歆者也。而此物固非美國之所能有，其最可歆之一端已失矣。而彼美國之政治都會，與職業都會常分離。一國之首都與各省之首府皆在一僻陋之小市。苟投身於政治，勢不能兼從事於他職業。其視歐洲政治家之營業自由者迥殊趣矣。以此諸因，故高才之士常不肯入政治界。其說詳見華盛頓篇且美國政治家之種類，與歐洲亦異。歐洲政黨所競爭者，大率在政府之諸大臣。國會之諸議員而已。

而美國大小官吏率由民選。且任期甚短。故選舉頻繁。一投身政黨。勢不得不以全力忠於本黨。終歲爲此僕僕。毫無趣味。故上流人士多厭之。除一黨中數十重要人物之外。其餘黨員皆碌碌之輩也。而此重要人物者。又勢不得不藉彼碌碌輩以爲後援。而此碌碌輩果何所利而爲一黨供奔走乎。既無社交之特權。亦非有可歆之名譽。然則所藉以爲餌。官職而已。官職所以能爲餌者。廉俸而已。故美國殆無無俸之官。歐洲則此等名譽職多有此卽所以驅策中下等人之具也。

美國自一八二八年以後。至一八八三年以前。其任用官吏法。殆如一市場。每當大統領易人之年。則聯邦政府所屬官吏。上自內閣大臣各國公使。下及寒村僻縣之郵政局長。皆爲之一空。使新統領而與舊統領同黨派也。則猶或不至此甚。若屬異黨。則真如風吹落葉。無一留者。此實千古未聞之現象也。此例自昃臣氏爲大統領時。一八二八年始開之。一就任卽易官吏五百餘人。前此華盛頓在任八年中所免黜官吏不過九人自遮化臣至門羅爲大統領二十年間免黜者不過六十人以酬選舉時助己者之勞。此風一開。遂成爲例。故大統領林肯嘗云。『區區白宮。（案）卽大總統官邸遂將爲請謁者。（案）等謂之要求者』所踴倒。而某氏稗史記大總統加弗自就任以至被弑時。凡七月間。除應酬黨員之索官者更無他事。綱紀泯。至是而極。蓋數十年間。美國之官吏。成一拍賣場耳。

專制國之求官者則諂其上。自由國之求官者則諂其下。專制國則媚茲一人。自由國則媚茲庶人。諂等耳。媚等耳。而其結果自不得不少異。雖然。以之爲完全之制度。則俱未也。

英國亦有政黨。英國之政黨亦競爭。然其弊不如美國之甚者何也。竊嘗論之。英國政黨之戰。惟有大將有參謀有校尉而已。美國政黨之戰。則並有無量數之兵卒。兵卒者何。卽吾前所謂碌碌之中下等人物是也。此輩於生

計上學業上皆不能自樹立而惟以政治爲生涯其盡瘁於黨事也。以是爲衣食之源泉也。故此輩者實政界之蠹也。

論者或以此爲民主政治之弊。以余論之。則此弊實緣美國之地理上習慣上而生者。參觀華盛頓篇「第一流人物何故不入政界乎」

節諸使美國而易他種政體。其腐敗亦當若是。使民主政體而行於他國。其腐敗或亦不至若是。

雖然。美國國民何故默許此等舉動乎。此不得不謂爲迷信共和之所誤也。當景臣氏之破壞舊章而任其私人也。乃宣言曰。官職之屢屢更迭。是共和政治之原理也。於是國民咸翕然信之。流弊遂至於此極。此又與選大統領好用庸材同一迷見者也。

官職屢屢更迭之不利於國家。近今政治學者如伯倫知理波倫哈克輩言之詳矣。夫一國中重要諸職。屢屢更迭。猶且不利。而況於各種之實務乎。官如傳舍。坐席不煖。人人有五日常兆之心。事之所以多凝滯也。英國每次更易政府。其所變置之職位。僅五十員內外耳。大率皆中央政府各部重要之地位。日本諸國亦然。而美國乃至舉全體。而悉易之。此實共和政治之最大缺點也。迨千八百八十三年。改正官吏登庸法案。其弊稍減。然猶未能免。

歷代大統領中。雖多庸材。然其以貪黷聞者尙無一人。蓋大統領總算一黨中上流人物。終知自愛也。而其最腐

敗者莫如市政。据布黎氏美國政治論所記。紐約一市。平均每年選舉費。選舉時投票場中。建設監督各費用。二十九萬元。係由各

候補人所擔任者。無論何人欲自爲候補人可也。但無論入選不入選。必須擔任選舉費之一部分。兩候補者爭選舉。則兩人分任之。十候補者爭選舉。則十人分任之。然公費之外。尙有

各黨派之運動費。共約四十餘萬元。合公費計之。六七十萬元。(美金)。(附注)布氏書千八百九十年出版。近日不知有增否。其勢不得

不皆出諸入選得官之人。而此輩者。豈其自傾私囊以易此無足重輕之官也。其究也。仍取償之於市而已。故市

中極閑散之官吏，率皆受極厚之廉俸，得官者例須割其廉俸之一部分還諸黨中，以爲下次選舉之用。是市也者，以己之公產，扶持己之虐主，使其勢力愈積久而愈鞏固也。而其濫用職權，蹂躪公益，又事勢之相因而至。萬不能免者矣。故美國諸大市中，如紐約費爾特費等，常爲黑閹政治之淵藪，非無故也。(附注)此布黎氏著書時之現象也。近屢改

第一種聯邦官職

大統領……每四年一回
下議院議員……每二年一回

公共土木委員……每年一回

高等法官……每年一回

本省總督及政府各大臣……各每二年一回

代表本省之聯邦上議院議員……每二年一回

本省學務委員及高等法院書記……各每三年一回

本省財政檢查委員……每四年一回

巡行裁判官……每二年一回

民事裁判所法官……每二年一回

本省評定物價委員……每十年一回

縣長及縣委員……各每年一回

第三種各府官職

第四種各縣官職

醫院理事人……每年一回
縣會計員及驗屍員……各每二年一回
本縣財政檢查委員、登錄者、測量家、民事裁判所書記官、遺產裁判所委員、
等……各每年一回

警察委員……每年一回

醫院理事員……每年一回

水道委員……每年一回

第五種各市官職

市長市書記及市財政檢查委員……各每二年一回
下等法官及警察署附屬法官……各每二年一回

街道委員及工師……各每二年一回

救火局委員……每二年一回

今以該省中最大之市先絲拿打爲代表。其市中之投票所。則每一年所行之選舉凡七次。每二年所行之選舉凡二十一至二十六次。每三年所行之選舉凡八次。每四年所行之選舉凡二次。每五年所行之選舉凡一次。每十年所行之選舉凡一次。合計每年平均所行選舉約共二十二次。夫以歐羅巴各國每年平均所行選舉不過三四次。最多至五次而極矣。而美國乃四五倍之。無論其人民政治上之知識。若何發達。若何高尚。終不能舉二十種之人物而識別之。確信某甲宜於某職。某乙長於某才。此事之至易見也。於是乎不得不以政黨運動員

爲蝦。而自爲其水母。(案)余所見美國選舉多有同時並選數職者各政黨自印刷出許多投票紙上將某職舉某甲某職舉某乙印出投票者直取其紙而用之耳。此大政黨所以獨霸政界之原因一也。又如上所陳選舉費運動費如此其浩繁。其黨派非有大力者斷不克任。且不敢妄充候補人。此大政黨所以獨霸政界之原因二也。質而言之。則美國之政治史。實其黨派史之合本而已。以上所論言美國民主政治之缺點居多。雖然以赫赫之美國。豈其於政治上無特別善良之處。而能致有今日者。其所長者多多。固不待問。余亦稍有所心得。但今以編輯之無餘裕。姑略之以俟異日。

(四十七)

西人有恆言曰。欲驗一國文野程度。當以其婦人之地位爲尺量。然耶否耶。凡遊美者皆謂美國之風。女尊男卑。卽美國人亦自謂然。以余觀之。其實際斷非爾爾。不待辯也。雖然。謂美國婦人之地位。在萬國中比較的最高尚者。則余信之。觀其表面之現象。則凡旅館凡汽車以及諸等遊樂之具。往往爲婦女設特別之室。其華表遠過於男室。道中男子相遇。點頭而已。惟遇婦人。必脫帽爲禮。在高層之升降機室中。一婦人進。則衆皆脫帽。街中電車坐位既滿。一婦人進。諸男必起讓坐。此風在東方諸市如紐約波士頓等不甚行。繁文縟節。如見大賓。然此不徒對於上流社會爲然也。卽尋常婦女亦復如是。此實平等主義實行之表徵也。至其內容實權。亦有甚進步者。其在專門高等之職業。日與男子相爭競。如女醫生女律師女新聞主筆女訪事女牧師女演說家。皆日增月盛。其他如各官署各公司之書記。各學校之教師。尤以女子占大多數。男子瞠乎後焉。其法律上之權利。各省雖小有異同。然其大端不相遠。大抵一切私權。皆與男子立於同等之地位。無論既婚未婚之婦人。皆有全權自管理其財產。夫死之後。皆

得爲其子女財產之代理人。此實美國婦人權利優於他國者也。(附注)美國當一八九六年以前猶未許婦人爲子女之代理人。婦人選舉權

之議。自初建國時卽有倡之者。及放奴功成之後。其運動益盛。蓋據獨立檄文人類平等之大義。白黑種之界限

既除。則男女性之界限亦不可不破。此其理想之源泉也。自茲以來。北部及西部諸省多數之國民。熱心此事。屢

以婦人選舉權法案提出於本省立法部。且頻議修正聯邦憲法。加入此條。然此修正案殆未易得可決。惟威阿

明天達華盛頓三省之本省憲法。曾許可之。而天華兩省旋改正廢棄。今美國諸省中。惟威阿明省尙有此權云。

實則婦人干涉政治。在今日之社會。實利少而弊多。伯倫知理輩論之詳矣。其法案之久而不能通過也。亦宜。(附注)

澳洲之紐西命。得力士。澳忒斯米尼亞諸省。皆有婦人選舉權。聞前十年紐西命會有一婦人被選爲市會長。男子皆極其號令。不久遂辭職云。其學務委員之選舉權被選權。則現今

有十四省許諸婦人者。然彼等大率放棄此權。不知寶貴。聞有某市人口二十萬。當選舉學務員投票時。婦人至

者不過二三百。又馬沙諸省。初行此例時。婦人至者甚衆。其後年減一年云。由是觀之。婦人之加入政界。非徒

不可。抑亦不能矣。

美國勞力者之地位。亦日高一日。『勞力者神聖也。』此言殆美國通用之格言也。其原因蓋由社會黨自爭權

利之思想日熾。亦由上流社會慈善事業之日盛。兩者相提攜而得此進步。其庸率既日漸增高。而各大公司又

往往多建房屋貸諸職工。而不徵其塵稅。又或設特別之學校及遊戲運動場者。以教育其職工之子女。此所謂

富而好行其德者。非耶。各市中之鐵道電車。大率凡勞力者。僅收車費之半額。各遊戲場之景物。須納錢乃得入

觀者。勞力家大率皆減半焉。要之美國之優待勞力者。大率如日本之優待軍人。彼勞力者亦商戰國最重要之

軍人也。其特別優待之也。亦宜。

其餘瑣屑風俗有趣味者頗多。叢稿盈篋。檢閱眼花。太費時日。茲並略之。讀者諒焉。

(四十八)

初八日復至砵命會所已遷。煥然一新。留一夕與諸同人作長夜談。歡可知矣。翌日行。

初十日復至加拿大之溫高華。新建之會所已於一月前落成矣。輪奐堂皇。整齊嚴肅。令人起敬。加拿大爲維新會起點之地。而其內部之發達進步。亦爲各市冠。今次以會所新成。合七省選舉議員。以十一月開議會。各議員由會員全體投票公舉。純用文明國自治制度。卷端所列第二十八圖。卽其議場也。闕原

十二日遂乘中國皇后船返亞洲。其日接到各市同志送行電報九十六通。桃花潭水深千尺。不及汪倫送我情。至可感也。午後登舟。送行於海岸者百餘。爆聲巾影。綿亘一時許。夜間至域多利。未登岸。遂行。翌日晨起。回望新大陸。青山一髮。微橫海天際而已。

廿三日至橫濱。翌日諸同志開歡迎會於大同學校。

附錄一 記華工禁約

(一) 其歷史

華工之往美。實由美人招之使來也。當加罇寬尼省初合併美國之時。急於拓殖。而歐洲及本國東部之移民。憚其遼遠。來者不多。資本家苦之。及覓得金礦。盛開鐵路。而勞備之缺乏。更甚。是以渡海而求之於中國。今者加罇寬尼之繁盛。實吾中國人血汗所造出之世界也。何也。無金礦。無鐵路。則無加罇寬尼。而加罇寬尼之金礦鐵路。皆自中國人之手而開採而築造者也。

同治七年。即千八百六十八年。中美續訂通商條款第五條云。

大清國與大美國切念人民互相來往。或願常住入籍。或願隨時來往。皆須聽其自由。不得禁阻。
第六條云。

中國人至美國。或遊歷各處。或常行居住。美國必須按照相待最優之國所得遊歷與常住之利益。俾中國人一體均沾。

彼條約實最自由最平等之條約也。然其時往者。顧不甚衆。吾遊舊金山。有七十餘齡之父老。爲余述彼初至時。美人歡迎之狀。雖神明不如也。其後聞風而往者日盛一日。至光緒初年。而每歲移住之人民。殆十餘萬。夫以吾東方產業之萎靡。工價之低廉。以與彼寶藏新闢需工若渴之地相較。則吾民趨之若水赴壑。亦固其所。然自茲

以來東部工人聞西方之極樂，爭走集者亦歲增。於是美工與華工之衝突漸起。

千八百七十七年

光緒三年

加罇寬尼之產業界，忽入於恐慌時代。

生計學家言凡生計界往往有恐慌時代或十餘年而一見或數年而一見蓋人民醉於投機事業

以牽動全局也其理長不具論

一切股票盡皆下落，全省騷然，貿易不振，工事頓乏，所有工價隨而暴跌，美國工人以其所入不

敷事畜，而中國以勤儉之性質，且移住者率無家屬，以低廉工價亦足自給，不惜稍貶以相遷就，故資本家益用中國人，而美工得業愈少，於是相妒相憎相仇之念，益磅礴於彼等之胸中，全省騷然矣。未幾遂有所謂沙地黨者起。

沙地黨之首領曰奇亞尼，實市井一無賴也，薄有積蓄，因投機全歸失沒，乃發憤學演說，欲投身於政治界，其年

之末

一八七七年

適必珠卜市有同盟罷工之事，全國工人多表同情，奇亞尼乃煽惑加省之工人，設立一工黨，在舊

金山港口西方沙際一空地，集衆演說，故當時以沙地黨得名，奇亞尼指天畫地，肆口嫚罵，忽得下等社會大多

數之歡心，來者日衆，政府以其妨害治安逮捕之，詎解得免，自是名愈高，黨愈盛，馴至選舉之際，「底門奇勒」

「利巴別里根」兩大政黨，全失其勢，而沙地黨遂爲加罇寬尼省政界之中樞。

按此亦其一例也言政者不可不

深察於是新被選之議員，遂提出改正本省新憲法案，以普通投票質諸全省人民，竟得大多數之贊成，所謂千八

百七十九年之新憲法是也。

沙地黨之所最仇視者，則資本家與中國人也，故其新憲法之關於排斥中國人者大略如下。

(一) 凡各公司不許用中國人，卽有前此經與中國人定合同者，亦作爲廢紙。

(二) 凡中國人不許有選舉權，不許受雇於公家職業。

(三) 議院須定條例以罰招致華工之公司。

(四) 中國人在美國者當設種種例規限制之。苟不遵例。即逐出境。

自此憲法之成立。而舊金山所謂唐人埠者。遂爲暴民橫行之地。拋磚擲石。乾唾熱罵。毆辱頻仍。劫掠相續。蓋彼時加鱒寬尼省。幾陷於無政府之地位。而我華民始不聊生矣。如是者一年有奇。未幾市民飽聽奇亞尼之邪險演說。而覺其所益於己者。不足以償所害也。既漸厭之。至千八百八十年之市會選舉。兩大政黨相提攜。得占全勝。而沙地黨遂亡。雖然。侮辱華人之結習。終不克去。

當時華盛頓政府。固未嘗有所惡於華人也。而已漸爲輿論所動。始漸謀限制之法。乃與中國公使商議。令我政府以自願限禁之名義。定一條約。即光緒六年西曆千八百八十年北京條約是也。其第一款云。

大清國與大美國公同商定。如他時大美國查華工前往美國並在境內居住等。倘有妨礙美國之利益。或有騷擾境內居民等情。大清國准大美國議暫止。或定人數。或限年數。並非盡行禁絕。總須酌中定限。此是專指華人續往美國承工者而言。其餘別等華人均不在限制之列。所有定限辦法。凡續往美國承工者。必須按限進口。不得稍有凌虐。

其第二款云。

凡中國商民及學業生徒遊歷人等。與及跟隨僱用之人。兼已在美國境內居住之華工。均可任其往來自便。同沾優待各國最厚之利益。

此約以光緒七年互換。光緒八年實行。實行以後。美國以是年西曆五月六日由議院頒限禁華人例案。凡十五

款。光緒十年再改正增加凡十七款。其款繁不備錄摘其要者爲表附於下節是爲設禁之始。

設禁之始。原訂以十年爲期。及光緒二十年。即一千八百九十四年。美政府要求續限。我政府我公使不與較。禁約遂續。今擇錄其條約第一第二第三第五款如下。

第一款 茲彼此議定。以此約批准互換之日起計。限十年爲限。除以下約款所載外。禁止華工前往美國。

第二款 寓美華工。或有父母正妻兒女。或有產業值銀一千圓。或有經手帳目一千圓未清。而欲自美回華。由華回美者。不入第一款限禁之列。但華工於未離境之前。須先在離境口岸詳細列名下眷屬產業帳目各情。報明該處稅務司。以備回美之據。該稅務司遵現時之例。或嗣後所定之例。發給該華工。按此約章應得回美執照。但所立之例。不得與此約相悖。倘查出所報各情屬僞。則該執照所准回寓美國之權利盡失。又例准回美之權利。限以一年爲期。以離美之日起計。倘因疾病或別有要事。不能在限期內回美。則可再展一年之期。但該華工須將緣由稟報離境口岸中國領事官。給與憑批。作爲妥據。以期取信於該華工登岸處之稅務司。該華工如不在稅關呈驗回美執照。無論其由陸路水路回美。均不准入境。

第三款 此約所定限制章程。專爲華工而設。不與官員傳教學習貿易遊歷諸華人等現時享受來寓美國利益有所妨礙。此項華人倘欲自行申明例准來美之利益。可將中國官員或出口處他國官員所給執照。並經出口處美國公使或領事官簽名者呈驗。作爲以上所敘例准來美之據。茲又議允華工來往他國。仍准假道美境。惟須遵守美國政府隨時酌定章程。以杜弊端。

第五款 美國政府爲加意保護華工起見。一千八百九十二年五月五號。美國議院定例。一千八百九十三年

年十一月三號。此例又經修改。凡在定例以前。所有美國境內一切例。准住美之華工。須照例註冊。中國政府現聽美國辦理。美國政府亦應聽中國政府。定立相類條例。凡一切美國粗細工人（商人亦如議院定例不計）寓居中國。無論是否在通商口岸。均令註冊。既不收費。又美國政府允准自此約批准互換之日起。於十二個月內。將寓居中國。無論是否在通商口岸之一切他項美國人民（包括教士在內）之姓名年歲行業居址。造冊報送中國政府。以後每歲報冊一次。惟美國公使人員或一切奉公官員。在中國駐紮或遊歷及其隨從僱用人等。不入此款。

自茲以往。續訂禁例。日出不窮。法如牛毛。民無適從。於是華人往美之路。遂將斷絕。

（二）禁例

光緒二十年條約第二款。有『遵現時之例及嗣後所定之例』一語。第三款。有『遵守美國政府隨時酌定章程』一語。此皆外交家猾黠之手段。明欺我中國。為推翻兩國公權。實行自立私例之地步也。我國外交家。不知其用意之所存。漫然許之。自茲以往。雖有千百苛例。而莫得與之爭。此所謂合九州鐵鑄一大錯也。今將美國政府所頒禁例之年月及款目。略列一表如下。

（年月）

（款目）

（附考）

一八八二年五月

十五款

此為最初禁例。

一八八四年七月

十七款

將一八八二年之例改正增加。

一八八八年九月 十五款

同 年十月 四款

一八九二年五月 九款

一八九三年十一月 二款

一八九四年八月 一款

一八九八年七月 一款

一九〇二年四月 四款

一九〇二年五月 九十三款

一九〇三年七月 六十一款

增訂一八九二年之例。

此例因檀香山隸美後加入禁例而設。

此例因菲律賓羣島隸美後加入禁例並賽會防禁法而設。

此乃戶部將前此所有禁例彙列且加增訂頒行者。

此乃美國新在工商部設立管理外人入境委員。更由該委員增訂苛例頒行者。

美國禁例。非特內地人。瞠乎未聞也。卽旅居彼中數十年者。尙或茫然不能窮其形。因定例既已煩苛。而例之外。復有案一案之行。而後此復援以爲例。其稅關及司法之人。任意上下其手。而我莫能與校。故案之多。益不可思議。欲盡紀之。常累數萬言。今爲悉心排比。分類列之。以清眉目。關心民瘼者。庶一省覽焉。

(甲) 華人之有入美權利者。

(一) 官吏 (及其隨僕)

(二) 傳教 (學校教師亦歸此項)

(三)遊學。

(四)商人。

(五)遊歷。

以上五項皆光緒二十年條約所訂明者。

(六)商人之妻及子女。

(七)工人有當千八百八十二年以前已至美國。經在稅關註冊。且有合例之憑据者。則可以復來美。其合

例憑据如下。

(一)有父母妻子女現在美國者。

(二)有實業值銀一千元以上在美國者。

(三)有債權值銀一千元以上在美國者。

以上二項乃一八八四年禁例所許者。

(乙)華人之許暫入美境者。

(一)假道(如往加拿大、墨西哥、西印度羣島及中美洲南美洲等處。必須由美國假道者)。

(二)賽會(來觀博覽會。或辦貨物來賽會者)。

(丙)合例華人入境之限制。

(一)護照 甲款所列七項合例之華人。必須持有合式之護照。乃得來美。其所謂合式者如下。

(一)須由出口之港埠領有該地方官認可之護照。其有權發給此護照之人如下。

(一)中國各海關道。

(二)香港華民政務司。

(三)英屬加拿大稅務司。

(四)在外國經商之華商。能向該國政府求得護照認可者。亦作合例。

(附注)其禁例注明不得發給護照之人如下。

(一)中國駐美領事。不得發給。

(二)中國駐各國領事。不得發給。

(三)墨西哥政府。不得發給。

(二)領得護照後。須經由該港埠之美國領事。簽名蓋印認可。

(三)其護照中必須有本人照相。

(四)其護照中所列各款目。務須一一注明。不得少有欠缺。

(一)入境口岸

甲款所列七項人。除官吏外。不許由下列各口岸以外之地方入美境。

下列所列諸地皆有專理華人入境委

員駐紮

一 舊金山

六 林黨順

十一 森亞士

二 砵俞

七 律注潤

十二 麥巴

三 波士頓

八 聖亞路便士

十三 山姐故

四 紐約

九 摩戀

十四 檀香山

五 紐柯連

十 博美爐

(按)一九〇二年(即去年)戶部所頒之例尙有廿二口岸准入境者今年新例裁餘十四耳。

(丁)例中之挑剔苛禁。

(一)普通之苛禁。

(一)雖攜有合式之護照但於護照所列各款有漏注一條者即不准入境(按)上海天津各處所發給之護照多有因此致梗者余所聞有某大吏之子遊學者緣此阻延數月不得入境。

(二)雖攜有合式之護照至入境時仍由該稅關委員查詰口供若口供有一語不合則作爲冒認不許入境(按)華人以此被撥回者不計其數。

(三)雖攜有合式之護照若經醫生考察認爲有傳染病者即不許入境(按)此乃今年美國所新頒之海外移民法案特著者其例本不專爲華人而設惟行諸華人者特加嚴酷今年五六月間有北洋大學堂學生某君到美醫生謂其有眼疾可以傳染遂遞解回籍。

(二)對於遊學者之苛禁。

(一)執遊學之護照入境既入境後查有作工等弊即驅逐回籍(按)此例其阻礙於我學界前途者最甚美國寒士其且工且學者殆十而六七日本在美之私費學生大率皆半歲作工半歲讀書以供學

費。此例行使我國苦學界，永不能擴充於美國也。

(二)非習高等學問者，不許入境。今年七月新發之禁例云：所謂學生者，專指欲來美習高等學問，或專門學，因在故國無從學習者（按）此例最苛。此後非持有本國中學卒業文憑者，當不准入美。

(三)必預備學至卒業時所需之費用。其費用或以現銀，或以匯票，或由某店號擔保。經稅關委員驗明屬實，乃得入境（按）此例亦今年七月新立。要之總不許我國寒士，得求學於美國耳。

(三)對於商人之苛禁。其法律嚴密，不可思議。今更類分之。

(一)商人之資格。

(一)惟鋪店之股東，乃謂之商。其餘店中所雇用之人，若總辦人，若管銀人，若買手，若賣手，若書記，若管數人，若代理人，若學生意者，一概不得有商人之資格（按）此等例所謂無理取鬧者也。安有以一鋪之大，而僅一東家能兼諸役者。然則名為禁工，其實並禁商也。彼謂以工人庸廉爭利之故。然則華人店鋪中所用夥伴，亦豈爭美工之利耶。要之欲絕吾人往美之路而已。

(二)凡開酒樓、餐館、開呂宋煙紙煙工廠、開製靴製帽廠、開裁縫店者，皆不得有商人資格（按）彼立此例之口實，以此等業需用工人也。然業此者，其每年與美人貿易，消美貨最多。此而禁之，孰謂平情。

(二)在美華商之返國復來者。

(一)華商欲回國者，須於出口時，覓得華人以外之證人二名，矢誓證明其人曾在美國經商一年以外者（華人不得作證）。

(一)其證書必須聲明從前並未作過工業。除經商外並無別業。

(二)欲返國者。須於一個月以前報名呈請護照。其護照限一年可以復來。一年以外。則所持之證券。作為廢紙。(或有疾病及本人不能趨避之事故者。可以展限一年。惟須求得前由美國出口處之中國領事發給憑紙證明。)

(四)對於註冊華工之苛禁。中美所訂禁約。本有並非將華工盡行禁絕一語。故美政府於千八百八十二年。令現在已到美境之華工。報名註冊。其攜有冊籍者。許住美國。並可以歸國復來。然其額外之苛禁。亦有種種。

(一)必須在美國有未斷之關係者。(如甲款第七項所列)

(二)所謂有妻在美國者。須為合例結婚。並已娶一年之久者。

(三)所謂債權。必須屬於未妥之數目。非復到美不能索取者。並非債務者同到裁判所證明認欠。(以上兩條參觀甲款第七項。)

(四)註冊之華工。欲返國再來者。可以求所在地之稅關發給護照。其法如下。

(一)繕寫切實口供。註明或眷屬。或欠項或產業若干。矢誓無虛。

(二)將身材高矮。面目顏色。肥瘦輕重。四肢長短。及面龐上有何特別之痣認。一一註明護照中。

(三)須照相兩片。一正面。一側面。帖於護照中。

(四)欲取護照。須於三個月以前報名呈請。

(五)護照限用一年。過期不復來。作爲廢紙。

(五)對於外籍華人之苛禁。

(一)美籍者。

光緒二十年之條約。聲明中國人不得入美籍。此事半由美國政府之意。半由中國政府之意。至華童。產於美國者。照例不以華人論。但亦立種種苛例。其欲回國而復來美者。大約亦與回國之華商無異。

(一)他國籍者。

禁例中聲明。凡入加拿大英籍。入墨西哥籍者。皆以華人論。如欲入美。一須遵從禁例。

(戊)堵截來路。華人欲入美者。必有所自來之路。從此處堵之。正本清源。簡易直捷。其手段爲最辣。今列其

方法如下。

(一)堵截船車。

(一)一八八四年改正禁例第二款云。凡船隻由外國港口來美。其船主若有意接載華工來美。或令或幫。或准華工登岸。議監禁罰款。每帶一人。罰款五百元。或監禁一年。(惟或因避風駛入美港。或順經美港以入他國之船隻。不在此例。)

(二)一九〇二年戶部所頒禁例第十九款云。火車若載有不合例之華人入美境。其罰例與船隻同。

(三)一八八四年禁例第八第十款云。凡船隻由外國港埠來美。其船未抵埔之先。船主要將所載華客名數。及其護照所填履歷。繳交稅務司。若船主有意抗犯此例。即將其船充公。歸爲美國管業。

(二) 堵截偷關。

一八八四年禁例第十一款云。凡人或有意或幫助或引帶不合例入美之華人由岸而入或由船而登美境者。議監禁罰款。每帶一人。罰款一千元。或監禁一年。

(己) 過關虐詰。美政府定例。雖持有合式護照之華人到境。仍須盤問口供屬實。乃能過關。故種種苛待情狀。半由此而生。今舉其例。此等例非明著於公布之法律者。惟親至其地能見之。求諸法文無有也。

(一) 木屋監禁。

丙款第二項所列之十四口岸。皆各設有一木屋。其湫隘狼籍。甚於狴犴。凡華人到關者。無論合例不合例。一概先撥入此木屋候審。(大抵搭一二等客艙。且經埠上有名望人保證者。僅可免木屋之辱。)

(二) 審問延遲。

已入木屋者。常或延遲至二三十日始行開審。

(三) 審問違法。

(一) 審問者非由司法官。不過任憑稅關委員之意。上下其手。

(二) 審問時。無陪審人。亦不許旁聽。大反於文明國讞獄之通例。

(三) 未審問以前。雖本人之父母親友。亦不許探問。待之虐於重囚。

(四) 審問之口供。不許鈔錄宣布。(按)此其立心何在耶。故稅關員之若何搗鬼。雖通美國之法律家。無從知之。無從非難之。

(五)經關員批斷謂不合例者。本人若不服。欲翻案上控。必須仍經該關員之手。呈於工商部。惟上控只許一次。又批斷後經三日不上控者。以後即無復上控之權利。

(四)用罪囚法量身。

此法所用名巴太連量身機器。乃法國人名巴太連者所創。現歐美各國獄中所通用。以量囚徒者。蓋囚徒屢有逃獄之弊。故用此法。先照其相。全身半身。正面背面。左側面右側面。復以機器量其頭骨若干。闊眼耳鼻口之距離各若干。身長若干。手足長若干。肩與肘肘與腕腕與膝膝與脛脛距離各若干。伸臂而量之。復屈臂而量之。雙立而量之。復立而量之。(其量時皆裸體)又指節趾節長若干。無一不纖悉登錄。所以使罪囚逃獄者。雖在千里外。猶無從漏網也。今華工來美者。未嘗有罪。而辱之若囚徒。非徒蔑視我國家之尊榮。抑亦蹂躪人類之權利。美之野蠻舉動。至是而極。聞是而不髮。指眦裂泣。數行下者。尙得爲有人心耶。(此例乃今年七月新例所定。現僅用之註冊華工及假道華工。其甲款前六項所列之人等。尙未受此虐待。)

(五)防疫苛禁。

若遇香港等處有疫症時。則所有華人。須到港外之痘房。裸體用硫磺水薰浴。然每年防疫之月。殆及半數。行旅大苦之。

加拿大各屬。亦同此例。前張蔭桓賀英皇加冕時。一切參贊隨員。同受此辱。

(庚)暫入美境者之苛待。

(一) 賽會人員

從前芝加哥賽會時，華人因緣以入境者不少，今值明年聖路易博覽會將開，故今年七月，特頒禁例如下。

(一) 凡欲入美國賽會者，要將合例可信之憑據，遞交入口關員，內要表明得有賽會值理批准利權憑據，或表明乃係得批准者雇用在會場宜用之工人。

(二) 要將本人影相三紙呈關員，且遵從該員量度，以爲證認（此殆亦用巴太連機器）。

(三) 准入境後，要直往會場，不得中途停止，在會場中，要做入境時所認做之工藝。

(四) 賽會畢，限三十日內，要從直路即回日前入口之關，搭最先開行之船期，速離美境。

(五) 每人必具保單銀五百元（美金），或由有責任之人，或由保單公司，具備交該入口處關員（按）

余初至華盛頓時，適值中國政府所派往聖路易預備賽會做工之人將到，該關員照例索每人五百元保單，我公使與外部交涉數次，請由公使作保，該關員仍多方駁詰，僅乃得許，嘻，公使之言，竟不如

五百金之重耶，可嘆可憤。

(六) 由關員派出差役若干，到賽會場，監守此等華人，以防逃走。

(二) 假道人員

華工假道美境往別國，本由光緒二十年和約所訂明，而美政府亦設防禁諸例如下。

(一) 凡假道者，須將所買得直過美國所到之地，或船紙，或車紙，遞呈關員。

(二) 凡假道者或由本人或由有責任之人或由給彼船紙車紙之公司具保單銀五百元。

(三) 凡假道者必須用巴太連機器量度身材（非工人者不在此例）

(辛) 雜例。

(一) 冊紙。

凡現在居美國之華工如未攜有一八八二年政府所給之冊紙即作為偷關入境查得者即驅逐回籍。
(按) 此例近一兩年內到處嚴行派偵員查冊備極騷擾余在美數月所見坐此撥出境者無慮數百人。
(二) 雜工。

凡非假道之華人如船上所用水手廚役諸工皆不得以保單登岸。
以上所列雖或未能具備然罟漏亦罕矣此篇乃搜輯美國前後例案十數通由中西文比較參考分類列出者。
排比較勘頗費日力讀者鑒之。

(三) 旅美華人人數統計

吾欲求四十年來旅美華人人數統計表不能得其材料僅舉一九零二年（即去年）之統計則

美國本部

九萬八千八百六十三人

檀香山

二萬五千七百六十七人

亞拉悉加（美國所屬海島以捕魚為業者）

三千一百一十六人

海陸軍所雇用者

三百〇四人

合計

十二萬八千〇六十人（菲律賓羣島在外）

以上冊籍或不免尚有罅漏。大率現今華人在美國本部者當在十萬至十二萬內外。是爲確數。

訪諸華人故老之口碑。則當南北戰爭之時（一八六〇年）華人始有至者。及同治四年而舊金山大埠華人忽多至及萬。蓋同治二三年洪秀全敗潰於金陵。其餘黨以海外爲逋逃藪云。故三合會之盛於美國。其原因亦頗在是。及同治七年。即西曆一八六八年。美國公使巴靈兼與我續訂條約。其目的在於招工。許我民與白人享同等之權利。且有招工公司在香港極力兜攬。自是來者日衆。至八九十年間。每月來者約五六千。及光緒元二年間。僅舊金山一埠。已有七萬餘人。僅新寧一縣。已有十七萬人在美云。其時旅美華人總計當不下三十餘萬人。至光緒八年始議禁。十年而實行。二十年而再禁。自此以往。日減一日矣。略舉其消長之數。則

咸豐末年（一八六〇年）

初至極少數

同治四年（一八六五年）

約萬人

光緒元年（一八七五年）

約二十餘萬

光緒九年（一八八三年）

約三十餘萬

光緒十九年（一八九三年）

約二十餘萬

光緒廿九年（一九〇三年）

約十餘萬

以是觀之。則當初禁時（光緒九年）有三十餘萬人。及禁例行之十年。至續禁時（光緒十九年）減至二十餘萬。續禁行之十年。至現今第二次禁約將滿時。減至十萬餘人。大約禁例以後。每年減少一萬人之比例也。故

及今不議所以抵抗禁約。更展限十年。則茫茫新大陸。無復我黃帝子孫一人之足跡。可斷言矣。華人至美者。大率在太平洋沿岸諸省。愈東則愈少。今得西部諸省二十年來華人統計省別表。錄如下。

(一八九〇年)

(一九〇〇年)

加鐸寬尼省

七萬二千四百七十二人

四萬五千七百五十三人

柯利根省

九千五百四十人

一萬零三百九十七人

華盛頓省

三千二百六十人

三千六百二十九人

汶天拿省

二千五百三十三人

一千七百三十九人

埃地荷省

二千〇〇七人

一千六百四十七人

彌巴達省

二千八百三十三人

一千三百五十二人

亞里孫拿省

一千一百七十人

一千四百一十九人

可羅辣陀省

一千三百九十八人

五百九十九人

新墨西哥省

三千六百十二人

三百四十一人

維明省

四百六十五人

四百六十一人

天達省

八百〇六人

五百七十二人

由此觀之。以最近統計美國本部華人總數九萬八千八百六十三人中。而西部十一省。居六萬七千九百二十九人。實爲全數三之二有奇。故西部之人。其對於華人嫉妬厭賤之念。更深一層。亦固其所。

(四)美人排斥華人之論據

美國人相抵排之言，洋洋盈耳，不可殫舉。今年紐約尊奴盧報，有加孫氏所作一論題，爲「禁逐華人之原理者」。凡臚列二十款，最爲詳備。頃耶路大學留學生張君煜全，譯出原文，寄登舊金山大埠文興報中，茲轉載之，並略加案語如下。

華人應擯於美國外者有二十端。

(一)彼等來此，非爲美國國民也，不過欲成一中國殖民地耳。

案此論未免太高視華人，若我同胞果有此思想，則已非美人所能禁逐矣。

(二)彼等非因避苛虐政府而來美國，不過圖富足榮旋耳。

(三)彼等來美，強半爲辦華工入口商會之產物，其居留之時，卽爲該商會之奴隸也。譯者原案語云此殆專指辦客者而言

案此論殆欲以激起國民，使想及前此放奴問題，以爲斥逐之義憤也。其實此論不當，華人雖有以辦客

爲生計者，但其客入境後，辦客者不復過問，所求者但其入口時之利耳。

(四)彼等不習美國之風俗，又不達美國道德之程度。

案此論誠當，但若此者，豈惟中國人，彼南歐諸國人，豈其免此。

(五)彼國總人口之數，多於我國，如五六與一之比例。

(六)彼等中國，儘有餘地可居，僅九十七人占一方里（英里）之地耳。若我紐約者，則每百二十六人占一

方里矣。

案以中國全國統計，合滿蒙回藏而算之，其人口疏密之比例，固若是矣。若如東南沿海各省，其密率又豈讓紐約耶？至如美國之彌巴達省，每方里只合一人零六分者，又將何如？此不足爲論據也。

(七) 彼等竭力而爲者，在得資財以寄返中國。四年半之間，由彼等寄出本國外者，實五千萬美金，有奇。案我政府而知此，則當思抵抗禁例之謀，不可以已矣。五千萬美金，當我一萬萬有奇，若往美路絕，國家從何處復得此一萬萬之流通泉幣耶？

(八) 准華人移入之問題，加罇寬尼省亦嘗試驗矣。終不能有成效。當一八八五年政府調查委員之報告書，有云：唐人埠者，乃美利堅退化人類最繁生之藪也。

案華人之較白人退化，誠難爲諱。然謂加罇寬尼試驗無成效，試問不有華人，能有今日之加罇寬尼耶？況舊金山大埠，素稱爲美國下等社會之淵藪，其風俗之壞，不能專歸咎華人也。

(九) 金山大埠唐人埠，歸官查閱之時，則有神廟十三所，堅守門戶之賭館百五十間，不秩序之屋原案語云指妓館百零五間，五萬之華人，其舉動固如此哉。

(十) 屢試屢敗，而後證出華人萬不能教以遵守潔淨之規也。初猶試之，乃屢試而屢敗，則其將來如何，可資確證矣。

案以上兩條，華人宜猛省。

(十一) 以華人爲國民，其最下乎。當華人爲加罇寬尼省人數六分之一之時，其所納賦稅，僅四百分之一。

(十二) 千八百八十五年爲華埠謀治安之費。用一萬二千美金。過於所納賦稅多矣。

案此語若確。則彼之厭我也。亦何足怪。

(十三) 未有准華人入口。可以禁絕鴉片煙之害者。卽此一端。華人既當拒絕矣。

(十四) 華人無論所操何業。輒減低工價與生計之程度。

案此實爲華人致妒之最大根原。一切禁例。皆起於是。雖然。彼年年自意大利。自澳洲。自愛爾蘭。自瑞典。來美之人。其工價低廉。亦與中國人不相上下。且或有更廉於我者。不妒彼而獨妒我也何居。

(十五) 在華人衆多之埠。彼等卽不願與美國人同操工作。或且恐嚇之。而使之畏懼。

案此在前者曾有與否不可知。今則斷無有。且於理勢亦不近也。

(十六) 華人永不能受同化力。嘗有某證人對政府調查委員云。吾居加鱒寬尼省三十年。未嘗見有一華人變革舊習者。

(十七) 當一八七九年加鱒寬尼省投票議禁華人之際。贊成者十五萬四千六百三十六票。反對者僅八百八十三票耳。

案此卽沙地黨得意時代也。今則沙地黨之無狀。誰不知之。

(十八) 華人或可以破敗我民主國。如何奴溫度兒人種之於羅馬帝國然。

案華人並選舉權而無之。由何道以破敗君家之民主國耶。公等不懼拉丁民族而懼我耶。誤矣。

(十九) 以最守舊之華人。而來最進步之美國。躡等甚矣。如華人必欲來此。可令其借徑俄羅斯與大利日耳

曼與英吉利先居以上之國。最少一千年而後可來。

案此虐謹真難堪矣。我國民能忍受之否。雖然華人雖極頑下。不猶愈於黑種耶。美人以平等正義自詡。異爲放奴一舉。爲其歷史上之光榮。然則禁華人一舉。不亦爲歷史上之污點耶。若果舉全國九百餘萬黑人。悉依華人例放逐之。則吾心服無異言矣。

(二十) 凡人類最高之責任。在能保存發達世界最高之物。以美國人目點觀之。莫有高於二十世紀之文化者。其文化之根基。則實學也。商務也。創製也。民主義也。使我大開其門戶。以招徠此四百二十兆之人。彼

固鄙惡我文明者也。是豈不因我解釋大難題於將來。而可以敗我二千年來貴重之物乎。

譯者原案語云
悉照英文直譯

以上所譯。美國反對黨對於我華人之感情。可見一斑矣。大抵禁例之來。起於美國人之強權者半。起於吾國人之自招者亦半。其美國之部分。由於相妬者半。由於相厭者亦半。其中國人之部分。由於政府漠視者半。由於僑民不自愛者亦半。詩曰。他山之石。可以攻錯。我同胞亦宜鑒於仇我者之言。而一自省焉。有則改之。無則加勉。不然。日日怨美人。責政府。猶無當耳。

雖然。美國輿論。除工黨外。其持華人不可禁之說者亦不少。今年上議院之禁例問題。委員長摩頓氏。嘗揚言於國會云。『近者太平洋沿岸諸省。利源日闕。需用勞傭亦日多。然所以致此之由。實前此藉華人之力。有以啓闢之。其功決不可沒。』云云。此亦可見公論之尙在人心也。

近年來西部諸省。對於日本人之嫉妬。亦囂囂益耳。然以日本政府強有力之故。其議案卒不敢提出於國會。嗚呼。人生世上。勢位富厚。願可以忽乎哉。

(五) 華人對於禁約之運動

十年續禁之期。瞬又將滿。故旅美商民。咸汲汲研究此問題。九月間。集議於舊金山中華會館者數次。欲瀝訴苦況。以求政府官吏之助力。遂共陳意見。爲一公稟。今將其稟稿全文錄下。

具稟人旅居美國商民等。稟爲美國禁約。將次期滿。懇請籌策抵制力爭。以全國體而順輿情。挽利權而培邦本事。竊商民等。僑居海外。遠沐國恩。身雖居於重瀛。心常繫於故國。孳孳勤動。於茲有年。惟美國自光緒

十年。卽西曆一千八百八十四年。與中國訂定禁工之約。訂以十年期滿。迨光緒二十年。卽西曆一千八百九十四年。復再展限其約。以西曆二月十一日。在美京簽押。以西曆十一月七日。互換實行。聲明再以十年爲期。如有不滿意。當由滿期前六個月。先行知會等因。計此二十年來。美政府所頒苛例。日新月異。法如牛毛。僑民之困。莫可名狀。此中隱況。想久在賢明洞鑒之中。現察美國政府之意。嚮民間之輿論。一若中國政府必默許此約之繼續。無俟再更者。續頒苛章。方日出而未有已。商民等竊計。朝廷關心民瘼。軫念僑氓。斷無漠焉不校之理。諒既早經擘畫。具有權衡。碩謨宏遠。固非商民等所能仰窺。外交謹嚴。尤非商民等所能參議。特以事中之甘苦。每身受者言之較詳。彼族之情形。亦習處者能窺其隱。況聖世每採輿人之誦。河岱不辭涓壤之微。是用不揣疏遜。謹集衆議。試籌挽救之策。爲我王爺。中堂大人陳之。竊查美國禁工之議。本起於西方加罇寬尼省之沙地黨。不過一無賴市儈。欲煽惑愚民。以徼權利。一唱百和。吠影吠聲。舉國若狂。每下愈況。彼美國者。民政之國也。上自總統政府。下及各省庶僚。必順民情。乃獲選舉。以故工黨之勢愈橫。則禁約之

立愈密。雖然禁華工之議。持之最力者。西方一二省。而東方諸省。未甚以爲意也。矧我最深者。爲下等工人。而官吏紳商。殊不與同情也。卽以工人而論。其真正美產者。尙不肯太爲已甚。其最叫囂強暴無禮者。大率從歐洲新來入籍之意大利人。猶太人。德意志人耳。彼等驟入膏腴之新地。分茲餘潤。而其作苦及其技巧。皆不逮我華人。故因劣生忌。因忌生凌。禍源之起。皆由彼輩。試問彼輩之專橫於上流股實之人。果有利乎。彼輩以聯盟挾制爲不二法門。日索增其工價。日索減其時刻。稍有不遂。立刻罷工。全國紳商。病之久矣。幸有華人不隨波逐。易就範圍。故紳商之歡迎華工。非特昔日惟然。卽至今未或有改也。而國中立法行政諸人。皆所謂上等紳商者。乃竟甘舍其所利。而就其所害。何也。則以工黨之勢頗大。國中兩大政黨。恆視其所加以爲輕重。緣其所附以爲升沉。故無或有一黨焉。敢大拂其意。且相率以仇視華人爲取悅彼輩之一法門。爲擁護黨勢之一捷徑。此卽禁約之所由來也。夫彼所藉爲口實以禁華工者。豈不曰奪美之業乎哉。然意大利人及其他拉丁民族之人。歲入美國者。殆八十萬。彼工黨何以不憂彼之奪。而顧日尋癥索垢於區區歲進不滿千百之華人。則以彼等入境後。旋卽入籍。入籍後卽有選舉權。而爲工黨傅翼故耳。知此病源。則我國所以乘間抵隙以圖補救者。殆亦非無道矣。其道云何。則利用其上等紳商使爲我助而已。或曰。彼紳商昔既受制於工黨。不惜就其所害而助彼以禁我。今昔等耳。而何從易之。此又不然。夫工黨雖橫。而國中兩大政黨。固非事事仰其鼻息。聽其指揮也。時或出全力以制之。苟遇重大事件。而兩政黨各出全力以制工黨。工黨終非兩政黨之敵也。願其於他事則制之。而於華工之事。獨順之者何也。我國既不與力爭。然則有華工焉。不過其一人一公司。稍覺便利。禁之則稍損焉爾。而於大局無害也。故彼中政治家。不惜以此區區權利讓諸工黨。而借以賣其歡心。

苟中國非挾持一物，牽動其全國之休戚者，則無以轉移其輿論。於此而欲彼兩政黨中有一袒我者，而必不可得。何也？甲黨一袒我，而乙黨將乘其隙，挾工黨以掩襲之也。然則所謂牽動其全國休戚之一物，維何以商民之愚。竊謂關稅問題，可以當之矣。夫關稅問題，我國向來不甚以爲意，而各國動斷斷而爭之者，蓋主國藉此以保護本國之工業，而使利不外流。客國藉此以推廣工業於他國，而使利可壟斷也。今美國已由農國而進爲工商國，有旭日初升之勢，其工商業能制勝地球與否，全視其能推廣於中國與否。故中美關稅問題，美國一國休戚所由繫也。夫今日之中國，殆非與美國爭稅則之時也。雖然，或可借此以爲弛禁約之地步焉。商民等之愚，竊謂莫如趁此與美國定通商新約之時，將禁約併爲一談，由我外務部先行提議，謂十年期滿，請廢斯約，彼政府必仍前十年之議，謂華工多來，有妨民業，有害治安，固也。吾亦可反唇以稽之曰：貴國既絕我民海外謀生之路，貴國作俑，各國效尤，我民相率株困，不得不圖擴張工業於本國，以圖自存。如是則我國必當爲保護關稅之策，以蘇民困。夫條約者，必兩利而後可久者也。貴國既大拂我損我，以求自利，則我亦宜求一保護我利我者以相償。貴國可獨行其志以禁工，我國亦可獨行吾志以加稅，各爲內治計，不能相難也。如此則美國之輿論，必大譁囂，而禁約之轉機，必伏於是。此所謂圍魏救趙之謀也。夫關稅輕故美貨賤，美貨賤故多銷於中國，美貨多銷於中國，故土貨滯，土貨滯故吾民失業，失業故貧，貧故求餬口於外，然則今既禁我，而我加關稅爲補救，理之至順者也。美廷不能難我者一也。藉曰華工奪美工乎，則歐洲各國貧民，歲至者以數十萬，何以彼不奪而惟我爲奪，且更何以解於日本人之源源而至也。美廷不能難我者二也。論者或曰：以吾今日國勢之弱，他國不有挾以要求我，亦云幸矣。我安能復有挾以要求人，萬一以此再傷邦交，禍將不測。

矣。夫國威未張，則外交無一事不棘手。此中曲折，雖商民等之愚，亦能窺見一二。朝廷慎重邦交之苦心，早已爲薄海所共諒。雖然，商民等竊聞弱國之待強國，非徒以順從而能買其歡也。時亦以強立而能起其敬。子產有言：國不競亦陵。何國之爲以鄭之弱，而時能左右晉楚，亦視其所以利用之者何如耳。夫關稅內治也，各國常以此爲抵制權利之衡樞。此近今數見不鮮之通例，亦彼中政治家所習聞也。歐洲列國，其弱小於我什伯倍者何限，未聞懾於他人之強，而於此事不敢提議也。英國之屬地，疇昔且以施諸母國矣。豈其中國而獨憚之，且今日之美國，昌言以保東亞平和自任，其斷不至因此以傷我邦交，又昭昭明甚矣。然商民等之獻此議，抑非謂欲以我政府之提議，而抵制彼政府也。實欲以我政府之提議，而使彼政府及上等紳商有所藉口，以抵制工黨人，以商民等考之，東方諸省之紳商，其本心實袒禁華工之議者，百不得一焉。即西方一二省，索以仇視華人著名，而其紳商之袒此者，亦十不得一焉。若夫上下議院之議員，卽以是爲比例，至如輪船公司、鐵路公司，亦一國之最有力者也。而其袒華人，則明目張胆矣。凡此皆我欽憲、領憲所熟知，而無異言者也。而彼尸立法行政之職者，往往作違心論何也。我國既無所要求，而彼忽袒我，則工黨集矢，無辭以自解免。而誰肯爲之。我若堅持關稅問題，則紳商有辭矣。曰：是一國利害所關也。此議既發，自紳商則兩大政黨皆共之，工黨不能藉詞以獨傾一黨，是可望決勝之道也。蓋自禁工以來，彼紳商受種種損失，厭之已久。商民等間與彼輩交接，往往相語曰：貴政府殆已默許此約之永行乎。窺其意若深爲中國惜者，又若欲援手而無從著力者，歎惋之聲，溢於言表。比比然矣。故商民等以爲我外務部果有所挾以求，則美國人挺全力以相助者，必接踵起，無可疑也。若能一面提議，一面特派名望素著且嫻習西語諳練美例之人，遊歷全美，到處演說，

陰相聯絡。則力更倍徙。而事立就矣。凡此所陳一得之見。未必有當。或久爲賢明所洞知。無俟喋陳。位卑言高。自知其罪。但獻曝之誠。不敢自外。抑亦切膚之病。難已於言。觸犯威嚴。敢求憫鑒。抑商民等更欲有言者。自互市以來。漏卮日甚一日。近年出入口貨。不相抵者。歲且四五千萬。似此朘削。何以克堪。夫商務之尾閭。既已若此。而民間彫敝。尙未至遠甚於前者。賴有海外華僑。取諸彼者。稍足以相償也。僑美人數不過十萬餘。而每年匯歸本國之工銀。尙可及千五百萬。其辦華貨入美口者。所值亦將千萬。若華工絕跡於美國。則華商亦不能自存。彼之千五百萬。既喪。而此之千萬者。亦隨減。是流通國中之泉幣。歲缺二千五百萬矣。溯光緒八九年間。旅美華人三十餘萬。迨禁約行後。至光緒十八九年間。銳減至二十萬。今光緒二十九年。餘十萬人耳。以此比例推之。苟禁約不廢。則十年以後。全美國無一華人足跡。有斷然矣。況美例既行。各國紛紛效尤。前年澳洲既已禁絕。近則英屬加拿大。加抽入口人頭稅至美金五百元。明年西曆正月一日。實行此例之後。加拿大之路斷矣。雖以墨西哥新闢之地。數年前殷殷求立約招華工。近且效尤。翻反而古巴檀香山菲律賓。皆同美例。苛章日施。率此以往。則茫茫大地。竟無復我華人託足之區。數年以後。諸路皆絕。則我國每年損失。殆不下五六千萬。夫一國通寶。而驟減於今日五六千萬。民生之彫敝。尙可問耶。況入口貨之率。年增一年。數歲以後。漏卮必又倍徙於今日。加以償款本息。每年攤派。是歲輦一百兆以上之金錢。瀉洩於外國。國力幾何。何以堪此。民苟非窮。必不肯餬口於四方。餬口路絕。勢不得不還歸於本國。當彫敝之際。而復增百數十萬失業之民。鷹聚於一隅。不餓。即盜賊耳。此又不徒爲商民等一人一家之近憂。抑亦一國之隱患也。故商民等以爲此事所關。似小實大。雖朝廷稍費周折。猶當爲之。失今不圖。禁限再展十年。大局已不可問。爲此不避僭越。竭

盡其愚。伏惟 王爺 中堂大人公忠體國。視民如傷。碩畫嘉謨。當更有進。商民等生長市廛。不學無術。區區芻蕘。何足以瀆 清聽。獨是上念 宗社。下撫身家。急切屏營。罔知所措。是以連合全美百餘埠僑民。公同商議。計惟有直抒所見。以呼籲於 賢父母之前。冀 垂哀憐。俯加采擇。除專稟 欽憲外。理合具稟。瀝陳商民等壹得之見。是否有當。伏乞 王爺 中堂大人鈞鑒。謹稟。

於正稟之外。更有附片一通。條陳必須駁之。苛例十八條。所謂不得已而思其次也。今並錄之。

再稟者。議約之際。若能藉 國家之威稜。當軸之碩畫。竟廢全約。聿奏膚功。此所謂如天之福也。但近今外交之難辦。商民等亦略知一二。豈敢好爲大言。不求實際。或不得已而思其次。則禁約雖不克全廢。亦當有所要挾。廢其續增條例之已甚者。以爭回權利於萬一。謹再將鄙見爲我 王爺中堂大人瀆陳之。

(一) 禁例本起自美國。迨檀香山菲律賓改隸美版。相繼照辦。華僑益困。無路可行。今縱不能逕廢全約。則檀菲兩島。必須力爭。以期豁免。夫檀島以糖業爲出產最大宗。自禁華工以來。糖商大窘。財政日細。此檀人所同病也。菲律賓土人難用。美國新經營此區。非有華工。不能得力。此又美國報紙所常論及也。況美國本境。白人居多。華工分彼工之利。故工黨持之最堅。若夫檀香山所爭者。則日本人之工耳。菲律賓所爭者。則該土人之工耳。本於美國工黨無甚大關係。其所以仍禁我者。不過以是爲國例所在云爾。故若吾國以此等實情。指明抗辯。持之稍堅。美廷必讓步無疑矣。

(二) 美國禁例。本爲工人而設。然則凡非工人。皆在例外。明矣。查光緒二十年條約第三條。內載除官吏商家。教習遊學遊歷各人員。皆許入境云云。夫此五種以外之人。其非傭工者。尙多多也。約僅禁工。乃并此而禁之。

其悖戾於論理莫大焉。推原立約之始。美國作此含糊字面。實以爲藉口舞弊之地也。商民等以爲若能徑廢全約最善也。就令不能。亦宜與之斷定界限。凡工人之外。一切不禁。所謂工人。亦須指明某項某項資格。如鐵路工。洗衣工。洋廚工等數項。作爲工人。凡在此外者。卽以非工論。庶幾界線分明。不至礙及他色人等。

(一) 美廷禁例日新。不可思議。其意非徒欲將未來者拒之不使來也。實欲將已來者驅之使盡去。彼見夫通商有約。凡爲商者不能拒絕也。於是乎務縮窄商字之範圍。自光緒廿四年以後。而開酒食館者。謂爲非商矣。迨至今年。而開捲煙廠。織帶廠。縫衣廠者。皆欲謂爲非商矣。以前此等諸商。可以不取冊紙。可以取商照來往。華美。今乃強辭厲禁。冤抑孰甚。夫酒食館裝修之費。動數萬元。中西紳商往來入口貨物。充斥稅關。歷歷可稽。至如華人所開捲煙廠。縫衣廠。其大者。每歲向西店購買煙葉。絨布等類。以爲原料。所值動以百萬計。此而猶謂爲非商。則商之名義。謂何矣。充此類也。則華人雖集千數百萬之公司來美。開大機器廠。謂之非商。焉可也。此實強詞奪理之甚矣。其故皆由條約中語句不分明。未嘗云於工之外不禁。而馴至於彼五等人以外皆禁。故也。故劃清界限。爲議此約第一義。酒食館爲東方大利源所在。捲煙織帶縫衣諸廠爲西方大利源所在。應請實力保護。庶安僑岷。

(二) 條約中載明。凡合例來美者。經地方官吏發給文憑。由該處美國領事簽名蓋戳。卽可入境。乃近年以來。美國屢設苛禁。多方留難。在各稅關建設木屋。凡華人到者。無論持何種文憑。皆須拘禁屋中。遲至一月半月。方始提審。審時若供詞稍有牴牾。便撥回原籍。似此苛制。實出情理之外。夫領事者政府之代表人也。美領事既已簽名蓋印。則是已認此人爲合例。是不啻美政府之認此人爲合例矣。然則其人持照抵境時。只須辨認。

領事之名及印之真贋焉可耳。苟非贋矣，則其人雖不合例，亦非其人之咎。實美領事之咎，亦不啻美政府之咎也。此而留難，孰謂合情。應請我國政府與美廷申定前約，再加切實。凡華民來美，其在本國出口者，經地方官發給文憑，美領事簽名。其在別國屬地出口者，經該處華民政務司發給文憑，美國領事簽名。則到境時驗照屬實，即便放行，無得留難。稅關木屋，制同狂狴，玷辱國體，莫此爲甚。應請力爭，務求撤去。即有疑竇，或須審問，只得取保上岸，隨時到案。

(一) 條約原文，凡已居美國之華人，可以隨時來往華美，惟須由關吏給以憑據，爲復來時登岸之證。乃近年以來，亦復多方留難。當領憑之時，動須候三四十日，始回覆准否。持據復來，仍拘木屋中待訊，費時誤事。其害實深。應請申明前約，凡有在美境領憑者，務須立即給與，如光緒八年所出應紙一樣，俾隨時出口。其持此憑復來美者，不論從何處稅關登岸，皆要准入，不得阻延至二十四點鐘以外。又該華民回國，不拘久暫，但持有此據，即能隨時任意回美。

(二) 歷次條約，皆聲明已居美境之人，美國一律保護，與最優待之國同例。乃近年以來，復有查冊之例。溯原此例之起，所藉以爲口實者，因光緒十九年，前欽憲楊許其以前入境之工人，一律註冊。此後無冊者，即撥回原籍。開此厲階，至今爲梗。近一二年，因無冊之故，押令出境者，每月以百數計，致使我民騷擾驚惶，岌岌顧影，病民之政，莫此爲甚。夫當註冊之時，其例必須註者不過工人耳，則其餘非工者，自應無冊也。明甚而美吏尋瘢索垢，無論工與非工，動輒逮捕。況工人之冊，亦容有遺漏，遺漏之後，則雖合例，而亦不准居矣。甚至本年八月間，使署參贊，瀛車途中，亦以查冊爲名，橫遭盤詰，其辱我國體，孰甚焉。查美廷所以嚴設此例之意，殆

以爲我華人時有不合例而私逸入境者。故爲此以相驅除也。夫立約只禁其來。既來之則安之。若有偷漏擱入。是不過該關吏之不慎耳。只當自咎。而烏可以波及無辜之人。平等優待之謂何矣。此例爲現在華僑人人切膚之痛。懇乞持理力爭。務求剷除。不然。不及數年。全美華民。將盡繫以去矣。

(一) 華民有從美國假道往別國屬地者。或往英屬加拿大。或往墨西哥。或往哥林比亞。或往西印度羣島。或往祕魯。或往智利。皆以美國爲孔道。勢不得不經過其間。或搭火車。或候火船。總須踏入美境。但其人所往既非美屬。則必當准其來往。無得阻留。美員亦無權可以審問之。昭昭然也。乃近年種種盤詰干預。甚或以供詞一言之誤。強檢回籍。其損吾民身體自由之權利實甚。應請與美廷訂約。凡有此弊。致我民失時損財。許向美政府要求賠償損害之費。

(二) 近年又往往以傳染病爲詞。雖合例亦不准登岸。其甚者如本年七月間。有學生江某。由北洋大學堂卒業。持有合例遊學護照。乃竟謂有眼疾。恐致傳染。強檢回華。夫眼疾傳染。誠前古所未聞也。似此上下其手。非特條約所無。抑亦例案所未有。推此以往。則雖朝廷官憲前來。苟欲拒絕。何患無辭。蓋近來苛例。類此者更僕難數。此不過其一端耳。推原其朔。實由光緒六年十月十五日北京條約。許美國有隨時限制華工之權。所以日出日新。而我無以爲難。懇乞將前約修改。凡此等語句。務請刪除淨盡。即云禁也。亦當有一定之法律。免致朝令暮改。使我民迷惑。無所適從。

以上八條。皆所謂不得已而思其次者也。縱不能逕廢全約。苟爭得此數事者。亦可稍爲補苴。以得所慰藉。苟王爺中堂大人始終堅持。以商民等度之事。未有不濟者也。若更不得已而再思其次焉。則猶有數條。萬不

可以不爭者。且如入口時審問之例。必不能免也。則外國審問罪囚。猶有定例。有律師以爲之抗辯焉。有陪審員以爲之判證焉。乃現在美國關員盤問入境華人之口供。不許一人在旁知狀。苟非最野蠻之國。其認庭未有若此者也。應請凡遇此等案。必須許我使署領署人員臨場聽審。許聘律師代辯。此萬不能不爭者一也。又近例華民到埠。其父母妻子親朋到船探問。一概不准。據美國刑律。雖罪犯極等。猶許親友入獄問訊。華人何辜。而待之苛於死囚。曾是公理。而若茲耶。此萬不能不爭者二也。又西例審案。凡有被屈不服者。例得上控。求再審。今華人入口之案。除持美國土生護照外。其餘各種人。一經冤屈批駁。即便撥回。不准上控。不公實甚。此萬不能不駁者三也。且如查冊之例。終不能免也。則萬不得已。亦宜將現在所有工人。重新再給冊一次。以後無冊者。乃作爲違例。不然。前此失去冊紙之人。既有許多。濫肆逮捕。何太强暴也。此萬不能不爭者四也。雖然。此舉不過暫救一時。而貽患於後日者方長。苟能稍進。似斷不應行此下策。又光緒八年。美國初行禁例之時。每工人發照一張。名爲鷹紙。許其持此復能返美。此種紙連發至光緒十二年。乃忽戛然而止。計前後所發。凡萬餘張。及十二年五月。有工人五百餘持此紙來。稅關不認。強撥回國。以一國政府而失信如此。豈謂合情。應請持理與辯。凡前此鷹紙。務准復來。此萬不能不爭者五也。又近日美國新例。雖持合例護照以入境。其入境之時。關員即將其護照留下。不再給與。然則其人甫離岸數武。萬一有陰持之者。指爲無冊。繫之而去。彼人無憑據。以自明也。此係最新之例。行之不過兩月餘耳。其所以設此例之故。立心殆不可問。此萬不能不爭者六也。又今年新例。凡入口之華人。由關員特設量身機器。將其人全身骨節之長短。乃至耳目口鼻。肘指膝脛之距離。一一度之。此種機器。乃法國所創。今日歐美諸國專用之於獄中。以防囚徒逃逸者也。今吾民之來美。

爲經商也。爲作工也。非罪人也。烏得以此而污衊我。此萬不能不爭者七也。又如學生。或屬寒士。不能全備學費。往往於晝間晚間。或暑假之時。傭工以自給。此其志之可嘉亦甚矣。漢之丁寬。明之王艮。爲世大儒。皆從此起。日本學生在美者數百人。其且傭且學者十而七八。卽美國學生。類此者亦十五六。斯亦可謂天下之達例矣。而美廷於中國學生。或有持遊學護照前來。不得已借此以自給者。則從而逮之。曰是工人也。其冤孰甚。夫中國今日。亟思變法而苦乏才。則遊學歐美之人。愈多愈妙。無待言矣。官派既難於籌費。私家又每多寒士。得此一途。庶可補助於萬一。若復塞之。是杜絕全國之生機也。應請訂明。凡有我國學生。經在某校肄業者。雖其晨暮及暑假時。爲人傭工。不得以工人論。此萬不能不爭者八也。又男女居室。人之大倫。查美國現例。惟商人許攜妻來住。其餘工人。一概不准。夫既在美國之工人。美已準其居住。則何能使其夫婦離羣。號稱文明之國。似不應爾。此萬不能不爭者九也。又華商店鋪中。皆應有管庫買賣手等種種職員。此等人不能以工人論。今美例凡此等人。皆入禁中。然則一鋪店中。僅有店東一人。遂足乎。如此禁法。實何異制華商之死命也。此萬不能不爭者十也。以上所陳。略舉大概。自餘煩苛苦擾之情形。雖更數僕。難悉數焉。要而論之。苟能力持全廢。禁約之一大事。則前此之八端。不爭而自除。卽不得已。而能爭前此之八端。則後此之十事。亦不解而自破。若他不能得。而惟於茲區區小節。相辨難焉。是孟子所謂放飯流歎而問無齒決也。卽能得之。亦百步與五十步耳。雖然。今日外交艱難。商民等具有天良。亦豈敢過於求備。誠恐我賢父母於僑民困苦之狀。雖哀之而未能盡得其情。萬一所求廢約之一大事。稍有所窒礙而不能行。更思小小補苴。以蘇民困於一二。而又不知實情。無從按條批駁。則憾莫甚焉。是以不辭冗沓。縷述下情。伏惟王爺中堂大人哀憐焉。而一援手之。僑民

幸甚。大局幸甚。抑商民等更有一言。竊聞天下事理。求其上者。僅得其中。求其中者。必得其下。故今日之約。非從大處落脈。不足以收功。就令僅欲補苴一二。似仍當以徑廢全約提議。搓磨之極。雖極不得手。猶足以爭回種種之權利。況美國上等紳商。有可以利用之道。而廢約之事。實非空懸奢望者耶。此則王爺中堂大人自有權衡。無俟商民等再爲詞費者矣。商民等焦灼下情。干瀆清聽。伏惟鈞鑒。謹附片陳明。旅居美國商民再稟。

此稟稿由美屬百數十埠十餘萬人聯名上遞。凡所遞者七處。

一 外務部

二 商務部

三 駐美京梁公使誠

四 上海議商約大臣

五 前任駐美公使伍侍郎廷芳

六 兩湖總督張制軍之洞

七 兩廣總督岑制軍春煊

若當道者果能一省。則此事未必不可挽救於萬一。但斯區區一紙。果足以動袞袞諸公之垂顧否耶。則非吾之所敢言矣。

檀香山新中國報總撰述陳君儀侃。建議謂不可仰鼻息於政府。惟我民以自力抵制之。其論尤爲痛快直捷。今

節錄如下全文曾登新民叢報第三十八九號合本中故不全錄

(前略)今之所謂駁例者。吾知之矣。彼其意以爲禁約受虧。故苛例百出。今縱未能盡除。宜去其太甚者。而存其稍輕者。慰情聊勝於無。卽鄙人之初意。亦若是已矣。然條約中所謂以最優之國相待。固久矣。視爲隨例之文章。而別見於他款者。則又子矛子盾。大相逕庭。然則此等條約。無勢力以護持之。則有約與無約等耳。卽幸而駁除。淘汰略盡。而以自爲刀俎之美人。而視我魚肉之中國。不旋踵而別出一途。以相難。其事愈酷。其毒亦愈甚。我華人又將何以處此。矧無理可言。今日之花旗人。有理不能言。今日之中國人。其必不能得志者乎。駁例者固極天下之有心人也。而皆知吾國之弱。不能遽然廢約。遷就其詞。而曰駁之云爾。庸詎知惟國弱之故。則愈不能駁。且無所用其駁。遷就其詞者。盍反而思之。然則今日聽此約之續行乎。曰烏乎可。我有國民。而我自禁其出境。如今日之日本政府所謂權自我操也。我不自禁。而人禁我。且組織慘毒之例法。以禁我。主權何在。國體何在。有心人所爲痛哭而流涕也。藉曰華人不知主權。不爭國體。惟試問禁例已行以來。華僑之財產。失喪者幾何。華人之生命。傷害者幾何。工黨鼓其無滋。他族滅此朝食之蠻氣。無端而寸地可之警告來。無端而望淺。拿之惡耗至。無端而查冊。無端而毒打。紛紛擾擾。倉倉皇皇。昨日今朝。眼內心頭。亦旣飽嘗之。而既聞之矣。禁約何物。此而續行。又何事不可行。

吾今正言以告我華僑同胞曰。禁例不能廢。而必廢之。廢之之道。將奈何。曰。抵制之。夫美國強國也。中國弱國也。船不堅。砲不利。何從而抵制。曰。美人之禁華人也。亦以其敢爲而已矣。太平洋之海軍未調。鋼快砲之準頭未施。以一紙空文。而百數十萬之華旅將死。而二十行省之政府被縛。外交受其害。生計蒙其災。則亦曰敢爲

之而已矣。然則我行我法，則此抵制之術，爲今日獨一無二之法門。抵制之術奈何？曰：辦貨者不辦美人之貨，用物者不用美人之物，爲辦此抵制之術之絕妙宗旨。而儲力於碼頭者，惟美貨則不起，買賣於市上者，於美貨則有禁，爲辦此抵制之術之絕妙政策。（下略）

此論誠簡易直捷之一法門也。雖然，今者吾政府之力固薄弱，而吾民間之力之散渙，亦與之相埒。然則此策遂果能實行乎？吾不能無疑。聞檀香山華人已派陳君往美遊說聯合，並派人歸國運動云。此事若成，亦國民對外思想發達之一先聲矣。

附錄二 夏威夷遊記（舊題汗漫錄又名半九十錄）己亥

余鄉人也。於赤縣神州。有當秦漢之交。屹然獨立羣雄之表。數十年。用其地與其人。稱蠻夷大長。留英雄之名譽。於歷史上之一省。於其省也。有當宋元之交。我黃帝子孫。與北狄賤種。血戰不勝。君臣殉國。自沈於崖山。留悲憤之紀念於歷史上之一縣。是即余之故鄉也。余自先世數百年。棲於山谷。族之伯叔兄弟。且耕且讀。不問世事。如桃源中人。余生九年。乃始遊他縣。生十七年。乃始遊他省。猶了了然無大志。夢夢然不知有天下事。余蓋完全無缺。不帶雜質之鄉人也。曾幾何時。爲十九世紀世界大風潮之勢力所簸盪。所衝激。所驅遣。乃使我不得不爲國人焉。浸假將使我不得不爲世界人焉。是豈十年前熊子谷（熊子谷吾鄉名也）中一童子所及料也。雖然。既生於此國。義固不可不爲國人。既生於世界。義固不可不爲世界人。夫寧可逃耶。寧可避耶。又豈惟無可逃無可避而已。既有責任。則當知之。既知責任。則當行之。爲國人爲世界人。蓋其難哉。夫既難矣。又無可避矣。然則如何。曰學之而已矣。於是去年九月。以國事東渡。居於亞洲。創行立憲政體之第一先進國。是爲生平遊他國之始。今年十一月。乃航太平洋。將適全地球。創行共和政體之第一先進國。是爲生平遊他洲之始。於是生二十七年矣。乃於今始學爲國人。學爲世界人。曾子曰。任重而道遠。吾今者上於學爲人之途。殆亦如今日欲遊阿美利加。而始發輒於橫濱也。天地悠矣。前途遼矣。行百里者半九十。敢不懼歟。敢不念歟。昔賢旅行。皆有日記。因效其體。每日所見所聞所行所感。夕則記之。名曰汗漫錄。又名曰半九十錄。以之自證。且貽同志云。其詞蕪。其事雜。日記之體宜然也。光緒二十五年己亥十一月十八日。

西曆十二月十九日。卽中曆十一月十七日。（以後所記皆用西曆）始發東京。昔八詩曰。客舍并州已十霜。歸心日日憶咸陽。無端更渡桑乾水。卻望并州是故鄉。吾於日本。真有第二個故鄉之感。蓋故鄉云者。不必其生長之地爲然耳。生長之地。所以爲故鄉者何。以其於己身有密切之關係。有許多之習慣。卽於腦中。欲忘而不能忘者也。然則凡地之於己身有密切之關係。有許多之習慣。卽於腦中。欲忘而不能忘者。皆可作故鄉觀也。吾自中日戰事以來。卽爲浪遊。甲午二月如京師。十月歸廣東。乙未二月復如京師。出山海關。丙申二月南下。居上海。十月遊杭州。十二月適武昌。丁酉二月復還上海。十月入長沙。戊戌二月復如京師。八月遂竄於日本。九月初二日到東京。以至於今。凡居東京者四百四十日。自浪遊以來。淹滯一地之時日。未有若此之長者也。此四百四十日中。師友弟子眷屬來相見者。前後共五十六人。至今同居朝夕促膝者。尙三十餘人。日本人訂交形神俱親。誼等骨肉者數人。其餘隸友籍者數十。橫濱諸商。同志相親愛者。亦數十人。其少年子弟來及門者。以十數。其經手所辦之事。曰清議報。曰高等學校。此外有關係之事尙數端。倡而未成。成而未完備者。亦數端。又自居東以來。廣搜日本書而讀之。若行山陰道上。應接不暇。腦質爲之改易。思想言論。與前者若出兩人。每日閱日本報紙。於日本政界學界之事。相習相忘。幾於如己國然。蓋吾之於日本。真所謂有密切之關係。有許多之習慣。卽於腦中。欲忘而不能忘者在也。吾友葉湘南。以去年十月東來。今年七月一歸國。十月復來。語余曰。鄉居三月。殆如客中。惟日日念日本。如思家然。湘南且然。況於余哉。孔子去魯。遲遲吾行。去齊接淅而行。孟子之去齊。則三宿而後出。晝亦因其交情之深淺而異耳。吾之遊美。期以六月。今背秋涉冬。始能成行。濡滯之誚。固知不免。愛根未斷。我勞如何。是夕大同學校幹事諸君。餞之於校中。高等學校發起人諸君。餞之於千歲樓。席散。與同學諸君作竟夕談。於清

或問曰：子中國人也。作日記而以西曆紀日，毋乃無愛國心乎？答之曰：不然。凡事物之設記號，皆所以便人耳。記號之種類不一，如時月日度量衡之類皆是也。乃至於語言文字，亦記號之繁而大者耳。記號既主於便人，則必以畫一爲貴。孔子大同之學，必汲汲於協時月正日同律度量衡是也。（吾昔有紀年公理一篇論此義）當各人羣未交通之時，各因其習慣而各設記號，此是一定之理。及其既交通之後，則必當畫一之。不然，有十羣於此，則一事物有十記號；有百羣於此，則一事物有百記號。如是，恐人類之腦筋將專用之於記此記號，而猶且不給矣。然則畫一之不可以已，無待言。雖然，此羣彼羣，各尊其所習慣，將一於誰氏乎？曰：是有兩義。一曰：強習俗以就學理，以公議比較其合於公理最簡易者而用之是也。一曰：強少人以就多人，因其已行之最廣者而用之是也。既知此義，則無論何羣之人，皆不可無舍己從人之識量。夫然後可引其線以至於大同也。且亦使各羣之人，皆留其有用之腦筋以施之它事也。如彼太陽曆者，行之於世界既最廣，按之於學理亦極密，故吾不惜舍己以用之。且吾今所遊者，乃行用西曆之地，吾若每日必對繙中曆乃錄日記，雖此些少之腦筋，吾亦愛惜之也。抑所謂愛國云者，在實事不在虛文。吾國士大夫之病，惟爭體面，日日盤旋於外形，其國家之實利實權，則盡以予人而不惜。惟於毫無關輕重之形式與記號，則出死力以爭之。是焉得爲愛國矣乎？吾則反是。

二十日正午乘香港丸發橫濱，同人送之於江干者數十人，送之於舟中者十餘人，珍重而別。午後一點，舟遂展輪。

二十一日風浪漸惡。船搖胃翻。偃臥一牀。蜷伏不敢動。經一日。大覺其苦。因自思。我去年本九死之人。脫虎口者。幸耳。若就法場時。其苦較今日何如。卽不爾。在縲絏中。坐臥一漆室。與蠻蚤爲伍。其苦又較今日何如。乃強起行。船面然遂苦吐。終蜷伏將息之。

是夕嚮晦卽睡。沈沈然至明日午飯時乃醒。償數日前之睡渴也。其夜風大作。船簸蕩如箕。上下以百尺計。然竟不知之。毫不覺其苦也。因觸悟三界惟心之真理。蓋暈船者非船之能暈人。人之自暈也。六祖曰。非風動。非旛動。仁者心自動。因此可以見道。

二十二日風益惡。濤聲打船如巨壑雷。浪花如雪山脈。千百起伏。激水達桅杪。船如鑽行海心者然。忽焉窗戶玻璃。爲衝浪擊碎。水噴射入數斗。牀氈衣服書籍俱溼。強起啓篋。易服遷他室。暈漣不可支。舟人以木板徧護窗外。室中白晝然。電燈者兩日。

嚮晦。船忽停輪。盤旋良久。詢之。則舟中服役一日本人。爲浪所捲。落於海也。汨浴於海面者。殆兩刻之久。然遂不能救。聞之驚惋久之。嗚呼。古人曰。死生有命。諒哉。苟其不死。雖日日投身於硝烟彈雨之中。不死自若也。苟其死也。則何地無巖牆。何日無虎疫。又豈獨今之一舟子哉。死而可避。則此生存競爭之劇場中。無繭足而立之隙地矣。其以避而不死者。必其未至死期。未得死所者也。然則直多此一避耳。觀於此。使人冒險之精神。勃然而生。其明日船員爲死事者。募恤孤之金。附者咸有所贈。余亦贈十金。

二十三日風如故法。旣已安之。能飲食行坐。無大苦。因思人聰明才力。無不從閱歷得來。吾少時最畏乘船。每過數丈之橫水渡。亦必作嘔。數年以來。奔走燕齊吳越間。每歲航海必數次。非大風浪。則如陸行矣。此次之風色。爲

生平所僅見。然不數日。已習而安之。知習之必可以奪性也。歷觀古今中外許多英雄豪傑。少年皆如常見耳。董子曰。勉強學問。勉強行道。吾因此可以自慰。可以自厲。

二十五日。風稍定。如初開船之日。數日來。偃臥無一事。乃作詩以自遣。余素不能詩。所記誦古人之詩。不及二百首。生平所爲詩。不及五十首。今次忽發異興。兩日內。成十餘首。可謂怪事。余雖不能詩。然嘗好論詩。以爲詩之境。界。被千餘年來。鸚鵡名士（余嘗戲名詞章家爲鸚鵡名士。自覺過於尖刻）占盡矣。雖有佳章佳句。一讀之。似在某集中。曾相見者。是最可恨也。故今日不作詩。則已。若作詩。必爲詩界之哥倫布。瑪賽郎。然後可。猶歐洲之地。力已盡。生產過度。不能不求新地於阿米利加及太平洋沿岸也。欲爲詩界之哥倫布。瑪賽郎。不可不備三長。第一要新意。境。第二要新語句。而又須以古人之風格入之。然後成其爲詩。不然。如移木星金星之動物。以實美洲。瑰偉則瑰偉矣。其如不類何。若三者具備。則可以爲二十世紀支那之詩王矣。宋明人善以印度之意境語句入詩。有三長具備者。如東坡之溪聲。便是廣長舌。山色豈非清靜身。夜來八萬四千偈。他日如何舉似人之類。真覺可愛。然此境。至今日。又已成舊世界。今欲易之。不可不求之於歐洲。歐洲之意境語句。甚繁富而瑋異。得之可以陵轍千古。涵蓋一切。今尙未有其人也。時彥中能爲詩人之詩。而銳意欲造新國者。莫如黃公度。其集中有今別離四首。又吳太夫人壽詩等。皆純以歐洲意境行之。然新語句尙少。蓋由新語句與古風格。常相背馳。公度重風格者。故勉強避之也。夏穗卿。譚復生。皆善選新語句。其語句則經子生。澀語佛典。語歐洲語雜用。頗錯落可喜。然已不備詩家之資格。試舉其一二。穗卿詩。有帝殺黑龍才士隱。書飛赤鳥太平遲。民皇備矣三重信。人鬼同謀百姓知。等句。每一句皆含一經義。可謂新絕。又有有人雄起瑠瑯海。獸魄蛙魂龍所徒。等句。苦不知其出典。雖十日思。

不能索其解。復生贈余詩云：大成大闢大雄氏，據亂昇平及太平。五始當王訖獲麟，三言不識乃雞鳴。人天帝網光中現，來去雲孫腳下行。莫共龍蛙爭寸土，從知教主亞洲生。又有眼簾繪影影非實，耳鼓有聲聲已過等句。又虛空以太顯諸仁等句。其意語皆非尋常詩家所有。復生本甚能詩者，然三十以後，鄙其前所作爲舊學。晚年屢有所爲，皆用此新體，甚自喜之。然已漸成七字句之語錄，不甚肖詩矣。吾既不能爲詩，前年見穗卿復生之作，輒欲效之，更不成字句。記有一首云：塵塵萬法吾誰適，生也無涯知有涯。大地混元兆螺蛤，千年道戰起龍蛇。秦新殺翳應陽厄，彼保興亡識軌差。我夢天門受天語，玄黃血海見三蛙。嘗有乞爲寫之，且注之。注至二百餘字，乃能解。今日觀之，可笑實甚也。真有以金星動物入地球之觀矣。其不以此體爲主，而偶一點綴者，常見佳勝。文芸閣有句云：遙夜苦難明，它洲日方午。蓋夜坐之作也。余甚賞之。邱倉海題無懼居士獨立圖云：黃人尙昧合羣義，詩界差爭自主權。對句可謂三長兼備。邱星洲有以太同胞關痛癢，自由萬物競生存之句。其境界大略與夏譚相等。而遙優於余。鄭西鄉自言生平未嘗作一詩，今見其近作一首云：太息神州不陸浮，浪從星海狎盟鷗。共和風月推君主，代表琴樽唱自由。物我平權皆偶國，天人團體一孤舟。此身歸納知何處，出世無機與化遊。讀之不覺拍案叫絕。全首皆用日本譯西書之語句，如共和、代表、自由、平權、團體、歸納、無機、諸語，皆是也。吾近好以日本語句入文，見者已詫贊其新異，而西鄉乃更以入詩。如天衣無縫，天人團體一孤舟，亦幾於詩人之詩矣。吾於是乃知西鄉之有詩才也。吾論詩宗旨大略如此。然以上所舉諸家，皆片鱗隻甲，未能確然成一家言。且其所謂歐洲意境語句，多物質上瑣碎粗疏者，於精神思想上未有之也。雖然，即以學界論之，歐洲之真精神、真思想，尙且未輸入中國。況於詩界乎。此固不足怪也。吾雖不能詩，惟將竭力輸入歐洲之精神思想，以供來者之詩料可乎。要

之支那非有詩界革命。則詩運殆將絕。雖然。詩運無絕之時也。今日者革命之機漸熟。而哥倫布瑪賽郎之出世。必不遠矣。上所舉者。皆其革命軍月暈礎潤之徵也。夫詩又其小焉者也。

二十七日。三日來風雖稍息。然舟尚甚簸。日往船樓望海。吸新空氣。神氣殊旺。詩興既發。每日輒思爲之。至此日共成三十餘首。余生平愛根最盛。嗜欲最多。每一有所染。輒沈溺之。無論美事惡事皆然。此余愛性最短處也。卽如詩之爲道。於性最不近。生平未嘗一染。然數日來忽醉夢於其中。廢百事以爲之。自觀殊覺可笑也。禹飲儀狄之酒而甘之。遂疏儀狄。吾於今乃始知鸚鵡名士之興趣。不及今懸崖勒馬。恐遂墮入彼羣中矣。乃發願戒詩并錄其數目來所作者爲息壤焉。

二十八日風復大作。船頭之桅爲折。晝然電燈者又兩日。浪浸灌船中。水深數寸。船主自言航太平洋數十年。未見有遇風互九日之久如此次者也。余既戒爲詩。乃日以讀書消遣。讀德富蘇峯所著將來之日本。及國民叢書數種。德富氏爲日本三大新聞主筆之一。其文雄放雋快。善以歐西文思入日本文。實爲文界別開一生面者。余甚愛之。中國若有文界革命。當亦不可不起點於是也。蘇峯在日本鼓吹平民主義甚有功。又不僅以文豪者。三十日風已盡息。海平如鏡。時已入熱帶界線。天氣炎煥。如廣東七八月之交。余在東京首途前一日。雨雪尺許。汽車中御重裘猶慄慄。海行十日。間日輒易服。至是御單袷矣。

三十一日舟抵檀香山。午後兩點登岸。此行在舟中。余以不解英語之故。頗爲寂寞。幸有耶穌教士二人。久在甘肅傳教者。善操北語。日夕相談。且屢爲余通譯。余甚感之。船主英人。溫厚勸懇善人也。船員前島彌君。乃前島密之子。途中爲余照料一切。殷勤備至。同舟有德國將官一人。曾在膠州兩年者。其餘白人。尙五六人。日本人四五

人舟將及岸，忽聞島中新有黑死疫癘，經過之客，不許登岸，而埠中華人，不許越雷池一步。余之登岸也，埠中同志無知者，一人獨行，言語不通，甚苦之。於是投亞靈頓客寓中暫居。是日即往見日本領事齋藤君，適外出，未得見。見副領事田中君而歸。夕間同志已聞余之來，其不在禁限內者，有數人來談。

西曆一千九百年正月一日，寓亞靈頓旅館。島中同志來訪者十餘人，相見咸驚喜出意外。午間偕十餘人同往觀華童學校，校中生徒七十餘人，土人數名，其餘皆我百粵子弟也。校爲耶穌教會所設，掌教者牧師化冷爹文，美國人而老於廣東，能操粵語。其夫人尤嫻熟，相見握手如鄉人。二日復往見日本領事齋藤氏，相偕往晤本島外務大臣蔦士茂氏。吾邦領事某聞余之來，驚懼失措，移文外務請放逐，即不爾，亦請監察，不許有舉動。外務辭以無名，蓋檀島近已歸美屬，一切從美例。凡足跡踏本島之地者，即應享有本島人一切之自由權，非他人之可侵壓也。見外務畢，一遊覽其公署而歸。

四日數日以來，埠中鄉人紛紛咸集，詢問國事，日不暇給。

中國人旅居此島者，凡二萬人之間，而熱心國事，好談時局者，殆十而七八。風氣之開，冠於海外各埠。余推原其所以能致此者，蓋亦有故。蓋此島雖小，昔固儼然一國也。而今華人所居，號稱正埠者，則其國都也。部名漢
椰路慮

此都十年以來，經三次倡革命，卒倒舊朝，興新政府。其事歷歷接於吾邦人之眼簾，印於吾邦人之腦膜。故政治思想，比他處人爲優焉。觀於此而，知法國大革命之風潮，其影響所及，披靡全歐者數十年，決非無故也。觀於此而，可識改鑄國民腦質之法矣。重學之公例曰：凡物有永靜性者，非加以他力使之動，則雖歷千萬年，不能動焉。吾國民之永靜也久矣。雖然，其中非無有能動之性質存，特視乎轉捩之外力何如耳。

檀山全島統名夏威夷。凡爲連珠形大小八島。其首府則漢挪路盧都城也。其次爲夏威夷。

又爲八島之一專名。

爲道威。爲茂

宜。爲莫洛雞。爲蘭尼。爲卡富拉威。爲尼孝。而華民所居。以夏威夷爲最多。漢挪路盧道威茂宜次之。其餘各埠。皆

不過數百人。海港惟漢挪路盧。

即俗稱正埠。

一處。故商務咸集於斯。其餘各小埠。皆由此轉運者也。華人業種蔗製

糖植穀者最多。其商務則皆販運土物。供工人之用者也。與西人爭利者甚稀。近者開設數個有限公司。以機

器製糖作米鋸板。頗見起色。自全島歸美屬以來。百物騰踊。需用日繁。商務日盛。故一兩年來。商人受其益者。

亦頗不少。而工價亦漸增。昔時種植之工。月給最厚者十八圓。

美國銀。

今漲至二十四圓。謀生者頗易。然自屬美

後。美人布其國例。禁止華人登岸。今登岸之難。尙過於金山焉。而日本人來者日衆。每一船至。輒運載五六百

人。今島中外國人民。以日本人爲最多矣。吾國外交官吏。能無媿死。

六日。同志諸君爲儼一屋於嘸嘛街。是日始遷寓。數人同居。護衛出入。

檀香山雖在赤道線內。而因有非常之高山。故地面之氣候。變更殊多。產物因以極盛。而貿易風自大洋四面

吹來。不斷。比靈海峽之寒潮暗流。環繞於島。故其氣候。比之他處。同緯度之地。常低冷十度內外。平時華氏寒

暑表。大抵升降六十至八十之間。終歲御單夾衣。夜間蓋秋被。東坡在瓊州有句云。四時皆是夏。一雨便成秋。

此二語。可以移詠檀島。竹林果園。芳草甘木。雜花滿樹。遊女如雲。歐美人謂檀島爲太平洋中心之天堂。非虛

言也。

七日。檀島政府以防疫故。始火我華民所居鋪屋。初議有病疫者之家。則火之。其後則議一家有疫。殃及左右兩

鄰。其後又議一家有疫。火其全街。禁令一日數變。又以防疫故。禁止集會。雖禮拜堂戲院。亦一概停止。故余到此

經一來復之久。不能得演說之地。殊爲悵然。是日同志十餘人。集於保皇會總理黃君之宅。共議論國事。十日。從坊間購檀島志一部。詳讀之。

檀香山幅員不過六千六百四十英方里。其半徑之長二千二百英里。而將來爲全地球上軍事商業一大關鍵之地。此天下有識者所共認也。當今萬國兵力商力。齊集太平洋。而此地實爲太平洋一中心點。故檀島之發達。實與太平洋之發達。形影相隨者也。風景之優美。如彼。地形之要害如此。白種人之耽耽逐逐。日夜垂涎。務求必得之而後已。不亦宜乎。自一千七百八十八年。英人倂頓廓氏。始到此地。至今百餘年。白種勢力。逐漸擴張。近三十年來。法權教權財權。盡歸於美國之手。握其國之實權者皆白人也。本島土王。守府而已。至一千八百九十三年。遂終其臂而奪之。行革命。改民主。九十五年。土人有倡義謀恢復者。事不就。爲白人所繫。投諸狽狽。而白種之主權遂定。九十八年。改隸美國。爲其一省。前者島中女王。今屏居華盛頓府。夷爲編氓。江山如此。坐付他人。月明故國。不堪回首。讀李後主眼淚洗面之詞句。旁觀猶爲傷心。不知彼婦獨居深念。何以爲情也。嗚呼。莫過烏衣巷。是別姓人家新畫梁。壯哉此夏威夷之山河。美哉此太平洋之樂園。獨惜享受之者。非彼都之主人耳。今將全島戶口總數。列其國別。觀其數年間之比較。有可以令人劇心怵目者焉。

一千八百九十年人口統計表

夏威夷人

三萬四千四百三十六人

半土人
即土人婦與黃人白
人結婚所生之子

七千四百九十五人

中國人

一萬五千三百〇一人

日本人 一萬二千三百六十人

葡萄牙人 八千六百〇二人

美國人 一千九百二十八人

英人 一千三百四十四人

德人 一千〇三十四人

挪威人 二百二十七人

法人 七十人

其他外國人 一千〇〇五人

一千八百九十六年人口統計表

夏威夷人 三萬一千〇十九人

半土人 八千四百八十五人

日本人 二萬二千二百二十九人

中國人 一萬九千二百八十二人

葡人 八千二百三十二人

美人 二千二百六十六人

英人 一千五百三十八人

德人

九百十二人

挪威人

二百十九人

法人

七十五人

其他外國人

八百三十三人

兩者比較。卽六年之間。全島人口總數。共增二萬三千一百二十九人。內夏威夷土人減去二千四百十七人。而雜種之半土人。增二千二百九十二人。其餘增高之律。以日本爲最速。中國及美國次之。近五年來。調查新籍。尙未出。烏例每六年調查戶口一次明年卽其期也。然其增減之率。可以推見矣。除中國人被禁登岸之外。其餘大率照前表比例之差也。惟土民之減少聞更甚云。

嗚呼。當彼頓廓初到檀島時。此島土人之數。二十餘萬。曾幾何時。所餘者僅得十分之一。而以此十年間統計。表觀之。每六年殆又減去十分之一。依此比例。則百年以後。全島中將無復一土人矣。今者以英語爲國語。卽土人中亦有過半不能解其祖父之鄉音者。自古之亡國。則國亡而已。今也不然。國亡而種卽隨之。殷鑒不遠。卽在夏威夷。咄彼白人。天之驕子。我東方國民。可不儆懼耶。自革命以來。島中商務日盛。謀生容易。彼蚩蚩之土民。方且自以爲得意。而豈知其絕種之禍。卽在眉睫間耶。生存競爭。優勝劣敗。天下萬世之公理也。彼白人者。豈能亡夏威夷哉。亦夏威夷人之自亡而已。

光緒二十五年冬先生由日本到夏威夷島居半年。庚子夏將入美旋因義和團之變。知友促速返國。匆匆東歸。後遊南洋澳洲各地。又到日本。至光緒二十九年始遊美。舊有夏威夷遊記之作。收入文集。茲附於新大陸遊記後。以類相從。記其歲月先後如右。編者識。

附錄三 遊臺灣書牘 辛亥 宣三

第一信

編輯部諸君鑒。僕等以二月二十四日成行矣。茲遊著志五年。今始克踐。然幾止者且屢。若再荏苒。則彼中更炎歊不可住。又當期諸一年以後。故毅然排萬冗以行。首塗前蓋數夜未交睫也。吾茲行之動機。實緣頻年居此。讀其新聞雜誌。盛稱其治臺成績。未嘗不愀然有所動於中。謂同是日月。同是山川。而在人之所得。乃如是也。而數年以來。又往往獲交彼中一二遺老。則所聞又有以大異乎前。非親見又烏乎辨之。此茲行所以益不容已也。大抵茲行所亟欲調查之事項如下。

一 臺灣隸我版二百年。歲入不過六十餘萬。自劉壯肅以後。乃漸加至二百餘萬。日人得之僅十餘年。而頻年歲入三千八百餘萬。本年預算且四千二百萬矣。是果何道以致此。吾內地各省若能效之。則尙何貧之足爲憂者。

二 臺灣自六年以來。已不復受中央政府之補助金。此四千餘萬者。皆臺灣本島之所自負擔也。島民負擔能力。何以能驟進至是。

三 臺灣政府前此受其中央政府補助數千萬金。又借入公債數千萬金。就財政系統言之。則臺灣前此之對於其母國。純然爲一獨立之債務國。今則漸脫離此債務國之地位矣。此可謂利用外債之明效大驗也。

吾國外債可否論方暄於國中吾茲行將於茲事大有所究索。

四 臺灣爲特種之行政組織蓋沿襲吾之行省制度而運用之極其妙也吾國今者改革外官制之議方曉曉未有所決求之於彼或可得師資一二。

五 吾國今後言殖產興業要不能不以農政爲始基開臺灣農政之修冠絕全球且其農事習慣多因我國他山之石宜莫良於斯。

六 臺灣爲我領土時幣制紊亂不可紀極日人得之初改爲銀本位未幾遂爲金本位其改革之次第如何過渡時代之狀態如何改革後之影響如何於我國今日幣制事業必有所參考。

七 日本本國人移殖於臺灣者日見繁榮今日我國欲行內地殖民於東三省蒙古新疆諸地其可資取法者必多。

八 臺灣之警察行政聞與日本內地系統不同不審亦有可以適用於我國者否我國舊行之保甲法聞臺灣采之而卓著成效欲觀其辦法如何。

九 臺灣之阿片專賣事業自詡爲禁煙之一妙法當有可供我研究者。

十 臺灣前此舉行土地調查備極周密租稅之整理其根本皆在於此何以能行而民不擾又其所行之戶口調查係適用最新技術日人自誇爲辦理極善今者日本本國將行國勢調查卽以爲法欲觀其實際詳情如何。

吾茲遊所調查之目的略如右其他則俟臨時當更有所觸發也首塗以來入夜必爲遊記歸後當更布之或亦

吾國治政聞者所急欲觀乎。舟次百不備。文蕪不可讀。惟亮察。

某頓首

笠戶丸門司舟次發

第二信

編輯部諸君鑒。昨二十八日抵臺矣。沿途水波不興。雖深畏海行如明水先生者。亦飲啖勝常。致可喜也。前日舟掠溫臺界而南。遙望故國。青山一髮。神往久之。占一絕云。

滄波一去情何極。白鳥頻來意似關。却指海雲紅盡處。招人應是浙東山。

舟中設備極新。娛樂之具畢陳。日本人航海事業之發達可驚也。已置無線電報。在舟中發行報紙。未至前一日。遺老林君獻堂即以無線電報歡迎。且祝海行安善。亦占一絕云。

迢遞西南有好風。故人相望意何窮。不勞青鳥傳消息。早有靈犀一點通。

舟次多暇。日以詩自遣。得十數章。當以入遊記。不復鈔呈矣。

舟入雞籠。警吏來盤詰。幾爲所窘。幸首塗前。先至東京。乞取介紹書。否則將臨河而返矣。臺灣乃禁止我國人上陸。其苛不讓美澳。吾居此十年而無所知。真夢夢也。

雞籠舟次。遺老歡迎者十數。乘汽車入臺北。迎於驛者又數十。遺民之戀戀於故國。乃如是耶。對之惟有增慙。舍館甫定。匆匆奉布。不盡萬一。

某頓首

臺北日之丸旅館發

第三信

編輯部諸君鑿首塗後奉兩書計以次達抵此已五日日則詣各局所調查夜則與遺老相晤對無片晷得休息也雖爲日尙淺然已起種種異感諺所謂百聞不如一見不虛也根觸萬端豈片紙所能述俟諸異日耳此間百無所有惟有一總督府耳總督天帝也立憲國之君主視之蔑如矣其官吏別有一種習氣居日本十年所不能觀也吾至此不得不以禮往謁乃適如昔人所謂因鬼見帝者殊可一笑三謁不得要領卒辭以疾殖民地之官吏如是其尊大也猶謝其派一通譯官爲嚮導乃得徧歷諸局所調查獲種種便利此莫大之人情耳劉壯肅所營故城毀矣留其四門以作紀念今屹然於西式聖室與東式木屋之間日過其下劇心怵目故撫署今爲總督府吾曾入之歸而累歎得一絕云

幾處樓題敝舊椽斷碑彫剝草成煙傷心最有韓南澗凝碧池頭聽管絃

遺老之相待有加無已自顧何以當此昨日乃集百餘輩大設歡迎會於臺北故城之蒼芳樓吾席間演說之辭真不知如何而可屬耳在壇笑顰皆罪耳他日當以入遊記此弗述也夜歸賦長句四首以謝今錄呈其一傷心人讀此應同茲懷抱耶

遠遊王粲漫懷歸却踏天涯訪落暉花鳥向人成脈脈海雲終古自飛飛尊前相見難啼笑華表歸來有是非料得隔江諸父老不緣漢節始沾衣

明日將入臺中矣懷抱殊惡不罄百一悉容續報惟眠食自攝

某頓首

臺北日之丸旅館發

第四信

編輯部諸賢鑒。吾茲行乃大失望。臺灣之行政設施。其美備之點。誠極多。然此皆一般法治國所有事耳。不必求諸臺灣也。吾所爲殷然來遊者。徒以臺灣居民。皆我族類。性質習俗。同我內地。欲求其制度之斟酌。此性習而立者。與夫其政術之所以因此性習爲利導之者。吾居此浹旬。而不禁廢然思返也。臺灣之足稱爲善政者。則萬國之公政。無論措之何地。而皆準者也。若夫臺灣特有之施政。爲日本內地及他文明國所未行者。斯則非直吾國所能學。抑又非吾之所忍言也。吾旬日來。劇心怵目。無淚可揮。擬仿白香山秦中吟。爲詩數十章。記之。今先寫三首奉寄。以當面語。

斗六吏

警吏陣斗六。數百如合圍。借問此何者。買地勞有司。赫赫糖會社。云是富國基。種蔗當得由。官價有程期。小人數畝田。死父之所遺。世守亦百稔。饘粥恆於斯。願弘一面仁。貸此八口飢。欲語吏先曠。安取閑言辭。府令卽天語。豈天乃可違。衆雛各有命。何不食肉糜。出券督畫諾。肘後吏執持。拇印失爛熳。甘結某何誰。昔買首縉強。今賈不半之。便願不取直。方命還見笞。一日買十甲。一月千甲奇。入冬北風起。餓殍闔路歧。會社大煙突。驕作竹筒吹。

墾田令

府帖昨夜下。言將理原隰。自今限名田。人毋過十甲。聞官方討蕃。境土日安集。墾草宜待人。官寧親畚鍤。官云汝母國。齒稠苦地陘。每每此原田。將以世其業。舊田不汝追。帝賚已稠疊。安得非分求。無厭若馮銖。貴人于子來。生事須長鬣。汝能勤四體。自足丐餘汁。吁嗟討蕃軍。巨萬費楮帖。借問安所出。毗隸與蠶妾。舊田賣已空。新

田取難喫鬻身與官家。救死僅猶及。悠悠彼何人。哀哀此東溼。

公學校

道周逢羣童。人言是學生。借問何學級。所學何課程。此間有良校。貴人育其英。島民賤不齒。安得抗顏行。別有號公學。不以中小名。學年六或四。入者吾隸萌。所授何讀本。新編三字經。他科皆視此。自鄧寧足評。莫云斯學陋。履之如登瀛。學塗盡於斯。更進安所營。貴人豢我輩。本以服使令。豈聞擾牛馬。乃待書在楹。漢氏謁學官。自取壞長城。秦皇百世雄。談笑事焚阮。

右詩不過舉其一二事。卽一事亦不過舉其內容之百一。實則重傷累感。豈筆札所能傳者。臺灣自有所謂土地收用規則者。與日本現行之土地收用法迥別。凡官吏認爲公益事業所必要者。得任意強取人民之所有。而所謂行政訴訟行政訴願者。絕無其途。前年斗六廳下。至出警吏數百合圍強攫。猶其最著者耳。其他類此者。月有所聞。臺灣人之財產所有權。固無一時可以自信自安也。至於教育事業。則更如兒戲。詩中所言。乃其學制耳。若夫學校教授管理之內容。乃更有意想所萬不及者。吾別有要之。臺灣識字之人本少。更十年後。則非惟無識中國字者。亦將並無識日本字者矣。寄語國中父老昆弟。勿以亡國二字爲口頭禪。勿謂爲大國順民。可以耕食鑿飲也。懷抱萬千。書何能究。

某頓首

臺中丸山旅館發

第五信

編輯部諸公英鑒。奉手示。並翦寄神州日報。已讀過。真可發矇。吾在此方無限懊惱。無限憤抑。觀此亦不禁破涕

爲笑也。彼言臺灣總督招我往，豈知我親往東京求介紹書，費爾許周折耶。豈知吾至雞籠，幾於臨河而返耶。豈知吾在臺時，因鬼見帝之難耶。彼謂我將頌揚彼都功德，彼安知我頃者每夕所作之日記，作何語者。又安知我懷抱無量數深痛隱恨，而爲遺老計，投鼠忌器，猶不敢盡以形諸楮墨耶。前寄尊處數書，想已達。吾非萬不得已，又何苦居人國而非其大夫耶。曾是受人指使者，而許作此等語耶。此種報紙，閉門造新聞，真大省事。所惜者，未免自污損其價值耳。公等恚怒何等者，桀犬之吠，而與校耶。

顧吾有不能不一言者。吾茲遊本欲察臺灣行政之足爲吾法者，而記述之以告國人。今固大失望也。雖然，其中又豈竟無一二可師者。就中若改幣制、辦專賣、興水利、調查土地戶口、干涉衛生等，多有獨到之處。應用最新之技術，萬國所共稱嘆。吾又安能違心以詆之耶。吾國人又安可不虛心以效之耶。吾他日有所言，彼輩則將曰：是劇秦美新也。是李完用也。天下有此無理取鬧之輿論耶。夫以現在無法律之中國，爲報館者，安心欲誣陷一人，亦誰得捫其舌。但君子惜其太不自愛耳。

臺灣之治，其最可佩服者，在於整齊嚴肅。使其將外視本島民之一點除去，則真官僚政治之極軌也。吾所最生感者，在其技師之多而賤。吾國欲效之，則養成各項技師，最少亦須十年，真不易哉。至此深有味乎南悔之物質救國論也。今日清明，旅思增重，俯仰身世，云何可言。惟自愛千萬。

某頓首
臺中霧峯莊萊園發

第六信

編輯部諸君鑒。頃行矣。歸舟所滿載者，哀憤也。舟中西望故國，豈惟慨嘆，直不寒而栗耳。此行所最生感者，則生

計上之壓迫是也。一受此壓迫。殆永劫無擺脫之期。吾於全臺遊歷過半。見其一切日用品。殆無不來自日本。即如所穿之履及草履。所食之麵及點心。皆然。舉其小者。大者可推矣。中國貨物。殆杜絕不能進口。保護關稅之功用。其可畏有如此者。臺灣本絕無工藝品。而中國貨則稅率殆埒其原價。其舍日本貨外。更無可用亦宜。而日本貨之價。亦遠貴於日本本境。以物價比例於勞庸。則臺灣物價之昂。蓋世界所罕見也。以故臺灣人職業。雖似加於昔。每日所得工錢。雖似增於昔。然貯蓄力。乃不見其增。而惟見其減。就此趨勢推之。其將來豈堪設想。而還顧我祖國。其將來又豈堪設想也。

舟中檢點日來所爲雜詩。得十餘章。錄以奉覽。

臺灣雜詩

千古傷心地。畏人成薄遊。山河老舊影。花鳥入深愁。人境今何世。吾生淹此留。無家更安往。隨意弄扁舟。

九點齊煙外。蒼茫別有天。下田猶再熟。甘果不論錢。處處泉通脈。村村花欲然。歲時不改舊。信是漢山川。

故老猶能說。神功締造深。廢興三國志。戰伐百年心。幾擊張騫孔。仍來陸賈金。早知成覆水。休誦白頭吟。臺後

爲荷蘭西班牙法蘭西三國所陷我族卒光復之日本入足跡前固未一履臺土也使鄭氏能保其世臺灣或不至有今日乎

桓桓劉壯肅。六載駐戎軒。千里通馳道。三關鞏舊屯。卽今非我有。持此欲誰論。多事當時月。還臨景福門。肅治

臺六年規模宏遠經畫周備後此日人治績率襲其舊而光大之耳鷄籠至新竹開鐵路二百二十餘里卽壯肅舊物其他新闢容輸之道尙數百里鷄籠滬尾澎湖諸礮臺皆壯肅手建臺北省城亦壯肅所營今毀矣獨

留四門以爲飾景福門卽其一也余頗過其下

幽尋殊未已。言訪北投泉。大壑陰陰轉。清流曲曲傳。玉膏溫弱苻。溪色澹霏煙。苦憶華清夢。無慆閉閣眠。北投

臺北府治二十里有溫泉地殊幽遠沿溪數里噴烟若霏霧溫流中水藻遊魚生焉

蕩蕩臺中府當年第一州桑麻隨地有城郭入天浮江晚魚龍寂霜飛草木秋斜陽殘堞在莫上大墩頭劉壯本

擬建臺中爲省治築城工未歲而去位今城亦毀移城門一角於大墩頭公園

曉破千峯霧迢迢爆竹聲重爲萬里客又過一清明舍館傳新火兒童報晚晴故山路幾許南望涕縱橫清明日客

霧峯莊之萊園

臺南南郭路勝跡鄉王祠肅肅海天晚沈沈故國悲簷花馴鳥雀壁影護龍蟻落日懷名世回風欲滿旗鄭廷平王

祠在臺南府南門外日人改稱開山神社

三百年前事重重入眼明天開一柱觀月照受降城胡虜到今日兒童識大名孰非軒頊裔哀此乞塵氓亦俗

稱王城在安平之海隅荷蘭人所築也據舊志方廣二百七十六丈高三丈有奇鄭延平克荷蘭受降於此今圯矣受降時儀式日本人猶傳以圖畫吾曾見之

五妃從死地竹淚滿南州銅蝨成千古冬青共一丘珮環青冢月蘭芷渚宮秋愁絕思公子靈旗肯少留明隆

以寧靖王朱術桂督鄭成功軍永曆十八年王遂入居臺鄭氏事以王禮克塽降王佩印綬殉國五妃王氏袁氏荷姑梅姑秀姊從死臺人既葬王於竹滬之元妃舊園復在臺南府南門外之桂子山合葬五妃即地建廟焉

鹿耳山形壯鯤身海氣麤重關常北向衆水總南趨事去勞精衛年深失湛盧東風最無賴綠到海桑無七鯤身及

鹿耳門皆臺灣八景之一觀濤稱奇極鄭延平進取時荷蘭人沈舟塞鹿耳一夜水驟漲鄭軍飛渡荷人詫爲從天而下也

會聞民主國奄忽落人間卽事真如戲呼天亦苦艱薜蘿哀楚鬼禾黍泣殷頑暗記留蠶紙愁來一洗顏故老

臺灣民主國之鈔幣及郵政局券相贈者

西北濤頭起。故人曾獨來。徒薪謀議苦。橫海壯心摧。碧血隨青史。名山託古哀。欲尋舊碁迹。溽雨長莓苔。死友譚壯

飛於甲午前後。曾兩渡臺。欲有所建樹。不得志而歸。其所著仁學初題曰臺灣人所著書。

聞道平蠻使。追逋竟未休。網張隘勇線。器漆社蕃頭。弱肉宜強食。誰憐祇自尤。物情如可翫。不獨惜蒙鳩。口方

銳意犁掃生蕃。廣張所謂隘勇線者。覺之於叢箐中。戰略與名稱皆變。劉壯肅之舊也。今殆廓清無子遺。吾遊博物館。見藥漬生蕃頭。纍纍然。

暫掩新亭淚。相傾北海尊。春歸萬梅嶺。地闢一菜園。魚鳥忘賓主。杉松長子孫。不逢催課吏。或恐燬桃源。萊園在霧

峯之麓。萬梅墮下。逸民林獻堂所築。以頤養重闈者。極山水林木之勝。余茲行獻堂實先後之。連輿接席。備極攀濕。館余於萊園者旬日。爲徧題池館而去。獻堂爲剛愎公。從子與諸昆。並好學能文。使人生故家喬木之感也。

零落中州集。蒼茫野史亭。看花成壙垠。耽酒得沈冥。一夢風吹海。無言月過庭。只愁絃絕處。俛俯失湘靈。滄桑後遺

老佗際無所適。相率以詩自晦。所至有詩社。萊園社之外。汐社。欒社。竹社。南社等。其最著也。

慘綠相思樹。殷紅躑躅花。能消幾風雨。取次送年華。北首天將壓。南來日又斜。金仙行處斷。鉛淚滿天涯。

復有詞數闋。託美人芳草以寫哀思。並以寄上。試請讀之。或可喻其言外之意耶。三年不填詞。今又破戒矣。

蝶戀花 感春遊臺灣作

倚徧黃昏人瘦削。愁對陰陰。舊日閑池閣。燕子不來風動幕。是誰偷覷秋千索。一雨做成新夢惡。夢裏羅衾。

恰似郎情薄。早識金鈴成漫約。餘英悔不春前落。別路屏山天樣遠。苦怨斑駁。不放入留戀。波底題紅餘片片。憑君量取愁深淺。恨雨懸煙朝暮捲。便到春回。

憔悴羞重見。何況夢中時鳥變。東風已共遊絲倦。

歲月堂堂人草草。數盡花風。冷透春懷抱。鎮日西園鶯不到。斷紅零粉誰知道。多事庭蕪青未了。和月和煙。牽惹閑煩惱。誰遣南雲音信杳。一年又見吳蠶老。

依約年時攜手處。謝却梨花。一夜廉纖雨。兩底蜀魂啼不住。無聊祇勸人歸去。剗地漫天花作絮。饒得歸來。狼藉春誰主。解惜相思能幾度。輕軀願化相思樹。

莫怨江潭搖落久。似說年來。此恨人人有。欲駐朱顏宜倩酒。鏡中爭與花俱瘦。兩橫風狂今夕又。前後啼痕。還耐思量否。愁絕流紅潮斷後。情懷無計同禁受。

臺人多有欲脫籍歸故國者。故第四首及之。其第五首則當英俄邊境正劇時。故不自覺其詞之哀。實則中國若亡。則吾儕將來之苦況。又豈止如臺灣人哉。

舟中復得詞一首。

浣溪紗 臺灣歸舟晚望

老地荒天闕古哀。海門落日浪崔嵬。憑舷切莫首重回。費淚山河和夢遠。彫年風雨挾愁來。不成拋却又徘徊。

此行乃得詩八十九首。得詞十二首。真可謂玩物喪志。抑亦勞者思歌。人之情歟。擬輯之題曰海桑吟。有暇或更自寫一通也。匆匆作茲遊。廢文課者浹月。所爲責任內閣論。尙未廢續。其他銀行政策。私議政黨論等。皆亟亟欲成之者。過返後當併日從事耳。不具。

某頓首

讚岐丸舟中發